

**Sahdaytinàn Garwak Baadinàn**

**Baxxaqso**

**Becissem Ityoppiyak sahdaytinàn**

**Garwak Komiishini**

**l.L.L.ximoliy, 2005**

**Addiis Ababa**

**© Sahdaytinàn garwak Baadinàn Baxxaqso**

**Becissem ltyoppiyak sahdaytinàn**

**Garwak Komiishina**

**2005 (I.L.L)**

## **Kaxxa Komishinerih Farmo**

Ityoppiyah Federaaliyyoh Dimokraasiyyoh Ummuunoh dastuur sahdaytinan garwak amo xer mudooda dacriseeh, sahdaytinan garwak baadinan sittin-geyitte inkih tan baaxol, madqâ xagar abeeh, sahdoytinan garwah dacrissoh migdal, doori leh tan massoynaani xisak aracat hee rakiibô sanada. Dastuur wohuk kalah kay addal dacayri geyteh tan mudoodah maqnisso, sahdaytinan garwak baadinan baxxaqsooy, Ityoppiya ferma elle haak oggolteh tan sahdaytinan garwak baadinan sittin –geyittek kee, radmoomâ luk elle gexsitannal maqnisaanam faxximtam muda.

Ta sittin-geyitte kaadu, baxacca luk akah tamixxigê nah, Ityoppiyak Sahdaytinan Garwah Komiishinih tontocowweh tan duddoo kee qaaqak tiyak teyna, Ityoppiya fermal faaticisseh tan baadinan sittin-geyitte baaxoh afittet haanama.

Takkay immay , a baadinan sittin-geyitte akak yaanam is macaay? Maca tascasseemiiy? itta esseroora, axcih ni baaxol tan, madqâ tu-taaxagooy, gar-kuraa kee geeri madqâ mehrat-leelah garil, mariiy tu kak yaamâ kal, inkim kak yaanam akke kal raagteh. Too afkunul axcaxcih mablô cooxul rakaakayittech afittet, woo sittin-geyitte korteh ma tana. Geeri kabuk kaadu , baadinan sittin-geyitte Dinkaara maybalaalaqal mawqinna yaanamih sababal, kaaxa uduro tekke.

Tonna takke way, axcaxcih Federaal Sangerraa kee Digloytah Ankacsoh caxa, woo sittin-geyitte faxximta afittet kore wayta way,edde taamita axcuk tatruse giffu-le margaqa le. Takke way woo margaqak wadiril, wohim massowteh iyyaanam ma dudna. I.L.Loowrk 2003<sup>uh</sup>, Ityoppiyak Sahdaytinân Garwah Komiishin inkih tan baaxoh caddol kaxxa gaaboynay, gar-kuraa kee, geeri wagitta xagoorak elle walal iyyeh gexsiise. Woo walalih addal, Sahdaytinan Garwak Baadinan mudooda abtol akah ase wayta asbaab agaardimeh.

Axcaxcih Baadinan sittin-geyitte baaxoh afittet gaccateh baxcisime wayteemih numma kaxxam tumbullee. Tahat axawoh gacak, ifu luk

ambulleeh meqem, Ityoppiyak Sahdaytinan Garwah komiishin edde sooleh yan kuktal kaah tontocowwoh tan duddoo kee, abtootak tiyak teyna, Sahdaytinan Garwak Baadinan Sittin-geyitte baaxoh afittet korisaanama.

Tonna kinnuk madqá muda, geeri afittet haanam kee yitbiqeenimih baxcissoh duddo, soolisiyyi kuktal a komiishinih tontocowwe abto kinni waqdi, Barlamaan ta madqooqi geeri afittet maqnisimmiteh Dinkaarâ maybalaalaqal tawqem faxximta axcuk, yescesseh yen. Tohuk gexak barittô buxaaxih , mablô coox kee madqá mehrat-leelaa kee baaxô-xayloh inkih, ayfaafay taceê gid, a sittin-geyitte baaxoh afittet gactam naharsiino le abto kinnim, a komiishin yaamineh.

Tonna kinnuk , Ityoppiya fermá elle hayteeh, Galli-Maroo kee Afrikah Eglah iraaawot tewqe sahdaytinan garwah sittin-geyitte itbiqqi heenih, baxcisaanam naharsiino yaallem faxximta caagidi. Toh rakiibo abak, kullimi addat le Sahdaytinan Garwah Baxxaqsooy, Madduruuy, Ayyuntinan kee, Qaadâ Garwak Baadinan Sittin-geyitteey, Sadar kee Siyaasâ Garwak Baadinan Sittin-geyiyi, Saymarat Nadol yakke Lagô-baxsih Baysih Sittin-geyiyi, Qansarissoo kee Nacrur sinni digalah Waasoh Sittin-geyiyi, Alaaqâ Garwah Sittin-geyiyi, Lagô-baxsi Waasok Baadinan Sittin-geyiyi, Afrikak Sahdaa kee Ummattootik Garwah Charteriiy, Afrikak Urri Garwaa kee Nagaytaniinoh Charter kee, Erginna-leelâ Garwah Sittin-gey Amcaraay, Oroomoo kee Tigreh afittet tewqeh tan.

Focâ fan kaadu, a Komiishin ni baaxok geeri afitte ta sittin-geyitte korissi heeh, faxxiima ayfaafay, caagid wagita xagooraa kee, inkih yan ayyunntah akah tantacawwê, neh kulli arac gufusak baxcisaanam , a Komiishin abu-waam, naysixxige.

Tiruneh Zeena (safiri)

Ityoppiyak Sahdaytinan Garwah

Komiishinik kaxxa Komiishineri

	Cuttuksó	Gali
1	Sahdaytinan Garwak Baadinán Baxxaqso ( 50 <sup>hee</sup> le Qaffaydá)	1 - 11
2	Kulli Qaynatih Lagô-baxsih Baysah Baadinán Sittin-geyi	12 -31
3	Kulli Qaynatih Lagô-baxsay Saymarat Nadol yakkeh Baysa	32 - 50
4	Erginná-leelâ Garwah Sittin-geyi	51 - 90
5	Urri Garwah Sittin-geyi	91 - 120

# **INKIH TAN SAHDAYTIINÔ GARWÁ INKIH YAN MARAH**

## **1. Sahdattiinô garwak Baadinan Baxxaqsok kontomhaytô Qaffaydá 1948-1998**

### **(Geeri afitteh exxá)**

Kaxxa Koboxih margaqá 217 A (III) kaxxa-Garabluk 10 aracat gacteeh, baxxaqsimte.

Kaxxa-Garabluk 10,1948, Galli-Marok Kaxxa Kobox, sahdaytiinô Garwak Baadinan Baxxaqsosoy aracat heeh baxxaqisek, addâ-fakoot a ciggilta galittel gee liton. Ta kaxxá, aydaadi abtok amakkaquk, Kaxxa Kobox, adoytiitih tan baaxooxal inkih, a baxxaqso hebek haanam yeexege. Toh is, kulli kel akah baxcismtâ nah, akah tambullee nah, akah tankirriyê naa kee, akah iffowtâ nah abaanama.

Axcaxih barittô buxaaxiyy, barittô massoynaanah addal, baaxooxaa kee rakaakayitte, siyaasal leh tan baxsa cisbatat hee kal.

### **Culemyná**

Sahdaytí samad inkih, ken lih toobokeh tan konnabna leeh, ken sahalaytiinok baxsimtu duude waytaah, inkigid keenih takke garwa lem, oggolaanaah, raabitaanam, curriyyataay, qadaalat kee baád wagarik rakiibo kinnuk, sahdaytiinô garwat tú akkale waanaah, burutaanam, binaadamtu uma caxxat haytaah, kay misinkicaa kee, kay afqado dallessaamaksah xiqtem mali. Toh massoosaanaah sahdaytuh yab kee iymaan curriyyat yaceenih, meysii kee ceyak kaa naggoysaanam, kaxxa qaaqah amballayuk,

Sahdayti rafliinoo kee, xukko isaamok kalu caylat xoqoysimam fidgâ dooroh haysite-waâ gid, sahdaytiinô garwa madqa tassakaxximem kaxxam faxximtaamah abaluk,

Baaxoosak fanat kataysiiní qalla, dadlisak, warraysaanam, kaxxam faxxintam kinnim cedak,

Galli-Maroh adoytiitih tan baaxooxa, rakiiboh tan sahdaytiinô garwaay,sahdayti konnabnaa kee, muddaqiyannuu kee, nadoh inkigidakkiyyal aben sittin–geyil qagam-qagisak diggoyseenim dibuk hinnay, farakka-le curriyyatat xoqoysimak, ayyuntiinô dadal kee, tayse mano aracat haanamal yemeeteenih yaniinim aaxaguk,

Adoytiitih tan baaxooxa Galli-Marô luk cattimam, sahdaytiinô garwaa kee rakiibô curriyyatitteh, baadinan assakoxxaa kee, amô–wagit abtu waytaamih xagana cullem kassitak,

Ta garwaa kee ta curriyyatitteh abnissoh , kulli marih garil dudda le mablaa kee, inkigid yakke cedeyyi yanim faxximtaamah abaluk,

Taway, toysarrah KAXXA KOBOX SAHDAYTIINÔ GARWAL BAADINAN BAXXAQSO KUKTISA.Wohim inkih yan baadih caddol takku, ummaan baaxoh caddol takku, hinnay kaadu ken gubat tan rakaakayitteh caddol takku, a baxxaqso elle faxximmi ittâ nal aracat gactaah, wohuk gexak kulli num kee ummaan ayyunti exxá , tet abnissoh isini misinkicah kassit kee, gabâ tabur abaanam dibuk hinnay, geeri marih arraba kee gabá intaah, abtam kataataanaah, faxxintam , yascasseenim.

## **1<sup>haytô</sup> Maasayya**

Sinam inkin inkigid takke konnabnaa kee garwa luk, currik taabuke,kas kee afqado luk. Tohuk gexak sittâ luk aabukiyyi gexsit yaalleenim faxximta.

## **2<sup>haytô</sup> Maasayya**

Kulli num a baxxaqsol baxxaqinte garwaa kee, curriyyatitteh, hebeltô baxsa sinnim yaalleeh, geyam faxximta.

Toh, lagol,samadal, bisul, nadol, afal, diinil, siyaasaay, mablaay, agat kee ayyuntiinán raceenannul; kalah kaadu, ikol, ubkaa kee, geeri caalootal inkih baxsá lem ma faxximta yaanama. Tohuk amot kaadu, siyaasaay, madqinanaay, hinnay kaadu kay baaxo, kay rakaakay, isi amô-baxxaqqa yaallay, aalle waay, amaantal yanay, muddaqiyannuk faxe caddot tanay/ yanay, wohuk gexak hebeltô baxsi kaat yakkem ma faxximta.

### **3<sup>haytô</sup> Maasayya**

Ummaan num manooy, curriyyat kee, nagay-taniinô gar le.

### **4<sup>haytô</sup> Maasayya**

Faxe num naqasu akkek, naqoosannu ceela abbaxat yanim kalaata. Naqoosannuu kee kay kabxak, faxe qaynat kalaata.

### **5<sup>haytô</sup> Maasayya**

Faxe numul qadaab kee gibdaabina oobisaanam, ma faxximta. Racmatta sinniih , sahdaytiinok iro kaa abta, digaalah diggalsimam ma faxximta.

### **6<sup>haytô</sup> Maasayya**

Ummaan num, faxe marih garii kee madqâ foocal, num kinniimih mamaxxaga lem faxximta.

### **7<sup>haytô</sup> Maasayya**

Kulli mari madqâ foocal inkigid yakkeeh, hebeltô baxsá aalle kal ikkigid takke dacyari teetik geyam faxximta.



## **8<sup>haytô</sup> Maasayya**

Ummaan num doolát – madqá akkek, geeri madqal akke takkê may, kaal baaheenimih qadaalat caxal, xibó geyam faxximta.

## **9<sup>haytô</sup> Maasayya**

Faxe num annaak yabbixeeih, casbit haanam kee, dabboh xiiriyaanam, ma duudimta.

## **10<sup>haytô</sup> Maasayya**

Ummaan num kaak wannaan imih, duddo le caxay qaxiita aalle-waytal xayyoowam faxximtaah, qadaalat le margaqá geyaamih gar le.

## **11<sup>haytô</sup> Maasayya**

1. Faxe num kaal heenim, caxal kaal sollu intâ fan, barih yanim deqsita. Woo caxal xayyoowa waqdi, madqá kalalu kaah haanamih gar le.
2. Faxe num baaxô caxal takku, baád caxal takku, kaak waanam, usuk abe saaku, madqal baatil orobtam akke waytek wadirllah, akah ma mataakima. Kalah kaadu, woo baatil, woo saaku yen cokmik bisu, kaal ma yakka.

## **12<sup>haytô</sup> Maasayya**

Faxe numut dibuukiyyinul, buxâ, mariinul, buxal hinnay kaadu muraasalatat, anaak culaanam ma duudimta. Kaadu kay konnabnaa kee kay migaq–gexxo wassakoysaanam ma duudimta. Ummaan num tanna tannah fanat-culiyyaa kee, migaq baysak dacayri geyaamih gar le.

### **13<sup>haytô</sup> Maasayya**

1. Ummaan num elle yan baaxoh addal angoyyaa kee sigô gar le.
2. Ummaan num baaxok yawqeemih gar le---kay baaxo edde anuk, kaadu isi baaxoh yaduureemih gar le.

### **14<sup>haytô</sup> Maasayya**

1. Kulli num isi baaxol umansek meysitek, dabboh geeri baaxooxal gacaamih (daffeyaamih) gar le.
2. Ta gar, siyaasah afkun aalle-waa caagidih waqdi takku, hinnay kaadu Galli–Maroh madmoomik/radmoomi sada waqdi takku, ma taamita.

### **15<sup>haytô</sup> Maasayya**

1. Ummaan num baaxô-baxiinu geyaamih gar le.
2. Faxe numuk, baaxô-baxiinu annaak, bukkusaanam ma duudimtaay, kalah kaadu baaxô-baxiinu korsam, kaal cinaanam ma bicta.

### **16<sup>haytô</sup> Maasayya**

1. Labhaa kee sayyo dudda le qumril, faxe diiniiy yaalloonay, faxe lagok yanoonay, faxe agatak/agattinah yaabakoonay sittal digibaanaah, buxâ – mariinu haysitaanamih gar lon.

Digiban waqdi takku, kaat yanin waqdi takku; hinnay kaadu cabbiiman waqdi takku, inkigid takke garwa lon.

2. Digib elle yakku duudam, dibuk abita nammayih oggol kee raabiti
3. Buxá, ayyuntak ginoo kee rakiibô horta kinniimih taagah, ayyuntaa kee, doolát dacayri inkih taallem faxximta.

### **17<sup>haytô</sup> Maasayya**

1. Ummaan num iko, numtin-amol takku, geeri mara lih takku, yaddareemih gar le.
2. Faxe numuk le ikoytá annaak, bukkusaanam ma duudimta.

### **18<sup>haytô</sup> Maasayya**

Kulli num le mablá, yaallu duudaamih gar le. Afqadohim kee, diinim kaadu tonna. Too gar, num le diini korisaamih dudda addat le – dibuk takku, geeri marâ luk takku. Too diini barisuuy, abnisuuy, kattaatu duudah.

### **19<sup>haytô</sup> Maasayya**

Ummaan num isih tu edde yable inti yascassu duudaamih curriyyat le. Ta garal num isit ceela raayi yaallu duudaah geeri marat tabisu duudah, afah takku, kutbeh takku---faxe baaxoh addal. Geeri marih kaadu hirgitu duudah.

### **20<sup>haytô</sup> Maasayya**

1. Kulli mari, wagaril gaaboowaah, xissiiamaamih gar le.
2. Faxe num, faxe-waa maasoynat, dirkimak cule waamih, gar le.

## **21<sup>haytô</sup> Maasayya**

1. Ummaan num is baaxoh doolatih taamoomit, gaba yassagallu duudaamih gar le. Hinnay kaadu, currik doorimteh tan wakiilteeh gitaak, gabah assagolla yaallem bicta.
2. Ummaan num, isi baaxol, sadárah yakke ayfaafay geyuh, inkigid yakke, gar le.
3. Doolát abbootan rakiiboh leeh, elle soolam shaqbi fayxi. Too fayxi waqdiik waqdi takke doorol, tascassime. Too dooro nummal xissimtaah, kulli num isi warkat cuumit elle qidah iyya akkiy, hinnay kaadu, too gid yakke currik yan, anayih gexsay akki, yakke.

## **22<sup>haytô</sup> Maasayya**

Kulli num, ayyuntak numuk teyna kinniimih sabbatah, manô caabi geyaamih, gar le. Le konnabaa kee, le sahdayiinoh dadalah, kaah faxximta madduruuy, ayyuntinan kee qaadá garwa, le baaxo xisnee kee, gaddak aallinnaanah gidel, agattinan macal kee, baadinan catol kaah kibbimtam faxximta.

## **23<sup>haytô</sup> Maasayya**

1. Ummaan num taamitaamih gar le. Taama dooritak geyam le. Taamita waqdi kaah faxximtam kaah kibbimtam le. Kalah kaadu, taama wee wayu-waamih caabi, kaah daccarsimtam le.
2. Ummaan num, hebeltô baxsa maleh, inkigid takke taamah, inkigid takke meklá geyaamih, gar le.
3. Ummaan numuy taamita, abah yan taamah gid takke meklá geyaamih gar le. Toh kaa kee, kay buxah mara

sahdaytuh faxximtah gidel tayloolu duddaama.  
Faxximtek geeri gitittel ayyuntiinô dacayri yaalleemi.

4. Ummaan num isi maslacat dacrisuh, xooquh xiinah eglat adoytah gacek, xise yakku duudaamih gar le.

## **24<sup>haytô</sup> Maasayya**

Ummaan num ramaqqaa kee hallal gar le. Toh taamah caddo le wakti yaalleenim kee, waktiik waktil taamak, meklá le ruksat geyaama.

## **25<sup>haytô</sup> Maasayya**

1. Ummaan num manô caddoy kay qaafiyat kee, nagay-taniinoh, kaadu kay buxah marah,maaqqooy, sartanaay, qarriy, dayla, faxximtek kaadu ayyuntinan ayfaafay edde anuk xiqtah iyya, geyaamih gar le. Kalah kaadu taamâ sinnaay ,biyaakay , erginnaay, gubbinaanaay idoolinnaa kee kay koboruk iroh tan manô caaloota kaa geyta waktitte edde xoqoysima, saay caabih gar le.
2. Ullaa kee urru baxsa-le abbax kee, cato le. Urri ginnaaqot yaabaku, aabuke-wayu inki ayyuntinan dacayri le.

## **26<sup>haytô</sup> Maasayya**

1. Kulli num barittô gar le. Barisso cindah akkele , daggowwutek rakiiboo kee naharsi caddoodal. Naharsi caddoh baritto dirki le.

Metteebannuu kee mehrat barittoo mangih akah geytimtannah akkele. Fayyá le barittoh tu gactek, kulli num isih taguudem akak geele.

2. Baritto sahayti xagarah, dudda le dadalat afknue le, kaadu sahaytiinô garwaa kee, rakiibô curriyyatitteh konnabá arqo bahsissaamat afkune le. Is titta cediyyaay, xiq kee kataysiinu, baaxooxaay, lagoo kee diini hortitte fanal daabisele. kalah kaadu Galli-marô wagari daabissuh abtah tan abititte, bisoh heele.
3. Xaltani, isi xaylo geytam faxximta barittôh doorol, naharsi gar le.

## **27<sup>haytô</sup> Maasayya**

1. Kulli num ayyuntak qaadâ manot, currik gaba yassagalleemih gar le. Fannii kee missô waraysoo kee, teetik geytima xoqoysit gaba yassagalleemih gar le.
2. Faxe num isih aracet hee, missooy , kutbeey hinnay kaadu, misikicak geeri taamoomik maqnaa kee, lakqô xoqoysi geyaamih gar le.

## **28<sup>haytô</sup> Maasayya**

Kulli unni, a baxxaqsol addâ fakoot luk daffeyteh tan garwaa kee, curriyyatitte, elle baxcisimteh tan ayyuntinan kee baadinán siiratat loowimaamih gar le.

## **29<sup>haytô</sup> Maasayya**

1. Faxe numul, ayyunti kol-tanitteeta tan. kay curriyyat kee kaak numiinô dadalih duddo elle takku, duddam dubuk gaantah adday garit tu sinni, rakiibo kinni,
2. Isi garwaa kee curriyyatitte yasangayeeh, tamsiisa waqdi, sahdaytu waadot ayseedee kee, wee takkem, geeri sahdah garwaa kee curriyyatih assakoxxah, madqal takeh tan dacayri. Tohuk kalah, kaa debertu duddam, dimokraatak yanih yan ayyuntih addal, sahdâ moraalaay, sadâr siirat kee, amolladi maqaaney, inkigid sinaamah takke.
3. Ta garwaa kee curriyyatitte, faxe caalatal, galli-maroh madmoomi kee radmoomak saduh abnisimtam ma xiqqimta.

## **30<sup>haytô</sup> Maasayya**

A Baxxaqso akak xissimta garwaa kee, curriyyatittek tiyá, faxe doolat, faxe horti, hinnay faxe num , tet edde bayisaah, hinnay teetik tu edde kala, gar yaallu ma duuda.

**2. Kulli Qaynatih Samad Baysah yekke Baadinan**  
**Sittin-Geyi**

**Kah bicteeh, kah fakkimtem Galli-Marok Kaxxa**  
**Koboxih margaqá 2106 fermaa kee faatacisso**

**Kaxxa-Garabluk 21/1965**

**Abtol assem Qunxa-Garabluk 4/1969 19<sup>haytô</sup> Maasayyak**  
**amakkaquk**

**A sittin-geyit tan baaxooxa**

Galli-Maroh charteriy, kulli sahdayi leh yan konnabaa kee inkigid akkiyyih radmoomak xissiiima cisbatat haak, kaadu adoytiitih tan baaxooxa hittâ luk takku, caglitak takku, massoynâ luk cattiiimak abnissô xagana akah culte caagid kinnuk;toh Galli-Marok akah solte madmoomik tiyak teyna kinni; sahdayi garwaa kee, curriyyatitteh yakkem faxximta assakoxxay, kulli num Samadal, nadol ,afal , hinnay kaadu diinil, baxsa aalle kal, aalleh meqe iyya kinnim cedak,

Baád caddol tekke sahdayi Garwah kuktih Baxxaqso cisbatat haak;is akah tascassê nah , sahdayi currik yaabukeeh, inkigid takke konnabá le. Toysá , too baxxaqsol escessimite garwaa kee, curriyyatitte, kulli num, hebeltah imil baxsa aalle kal, yaallem faxximtah iyya. Axcaxcih lagooy, bisuu kee agattiinul baxsa lem faxxiime waytaamal aamanuk,

Kulli num madqâ foocal inkigid yakkem kee, inkigid takke dacayri teetik geyam faxximtam cisbatat haak faxe baxaabaxsaa kee, wohuh takke gutqo kaat takkem faxxime waytaah, aguude waytam cedak,

Galli-Marok, kü-amol-ayyoo kee, teetit axawah enewwitta baxaabaxsittaa kee, assuqunxiyyi faxe qaynatak yanu, faxe aracak yaku, katay itteh kuktissem kee, teetik kaxxa koboxih margaqay 1514(xv) kinni, kaxxa-



Garabluk 14/1960<sup>ah</sup> tatusseh ten. Toh,kü-amol-ayyo tamurrqay! kulli baaxo isi amô-baxxaqqa geytay! Kak itteh tene cisbatat haak, too umaaneena, hebeltôh adaf maleh, sissikuk kattam faxximtaamal aamanuk,

Galli-Marok 20/11/1963<sup>uh</sup> kuktime kulli Qaynatih Samad Baysih Baxxaqosk Kaxxa Koboxih margaqá 1904 (xvlll) kulli qaynatih baxaabaxsi, baad caddol sissikuk akah bayannaa kee, Adam-baxiini garwaa kee, sahdaytiinô konnaba akah daabimtâ nah abaanam faxximtaamal aamanuk,

Iyyi-yi-gid-yakkell soola lagô baxsih, hebeltô numma soolewaaah, moraalak ceele-waynaanuuu, ayyuntiinol gita maliiy, osod kinnim aamanuk, lagol yakke burraa kee, assaqunxiyyi, tiyorii kee abtol inkih, arac lem akke waytam cedak,

Sahdá lagol ,bisuu kee agatal, sittat abta baxaabaxsi, gita maliiy, sinam hittin fanal aalleh muquk ten meqe qallat, adaf yakkem diggoysak, ummattooti fanal salaam kee saay baysaah, cuggaaneh yan mari fanal – inki baaxoh adda takke way, xintoh umaane lem asmatuk,

Lagol yakke baxaabaxsih duugaagih mano, ayyunti nagay-taniinoo kee, meqem fayxil, kaxxa gibdaabina katasaamal aamanuk,

Lagô baxsi manoy, uxi fan baadak mango aroocal tambullee kee, doolatittek garab gexissa iyyi-yi-gid-yakkê siyaasak didda axcuk; toh appersaayid lagô-baxsay Gabbi Afrikal gexasak sugeenih iyyah innah taniimi----woh yamakkaqu duudime waa umaaneh xalu, katassam aaxaguk,

Kulli qaynatih lagô baxsa sissikuk baysoonuh, faxximmita maaqattooti beyak, usuk kah bayannaa kee, kay aracad baád ummattooti fanal, assakoxxaa kee, meqe qalliini gacam faxximtaamal aamanuk,

Baadak Taamâ Massoyná F.L.L. (Farangi Liggidih Loowok) 1958<sup>ah</sup> sahdak taamâ gar wagsiisak tatusse madqaa kee, Galli-Marok, Barittooy, Missoo kee , Qaadâ Massoyna F.L.L.1960<sup>ah</sup> tatusse madqá

misinkicat luk, a namma sittin –gey sahdá taamaa kee, tû barittol lagô baxsa taallem faxxiime waytaamal aamanuk,

Galli-Marô kulli qaynatih lagô baxsi bayuh, kuktisse baxxaqso elle solta radmoomi aracat sissikuk gactam faxak, tet abnissoh ahak lakal taniimil hitta geyne.

## **EXXÁ I**

### **1<sup>haytô</sup> Maasayya**

1. A sittin-geyih addal “ Lagô baxa” yaanam, sahdat lagol, bisul , samadal, hinnay kaadu agattiinol baxsa abak, sinam inkigid kak geytam faxxiimak ten sahdaytinan garwaa kee, rakiibô curriyyatittek marahaay tu abaanama.

Tohim siyaasaay, madduruuy, qaadaa kee geeri booxaaxil inkih , sissinim sinaamah abaanama.

2. A sittin-gey ma tamita, kaat adoytáh tan baaxoy sissinaaneey, irot –cabiyyaay, deberiyya, hinnay kaadu, naharsiino aalliyya baaxô-xayloo kee , baaxô baxiinu aalle-waa marih fanat, gexissah iyyal,

3. A sittin-geyik hebeltô ximmoy,kulli baaxo isi agatih adda agatinanaay,baaxô-baxiinu kee,hinnay kaadu, baaxô-baxiinu tacayu tayyaaqe madqooqit boodda ma tana.

Takkay ikkal toh, madqooqi , xaquk teyna baxsá lentit tableemih qalaama, aalle waytâ fana.

4. Rikeek tan maaqattootiy salafah raaqeh yan mara, bisoh iyye marat matrissonu beyaanah iyya, lagô baxsah abaanam ma deqsissa. Takkay immay, woo

namma marih fanal sugte baxxo, katteek wadiril, rikeek tan maaqattootih faxxiimak raqtam matan.

## 2<sup>haytô</sup> Maasayya

1. A sittin-geyit tan baaxooxa kulli qaynatih lagô baxsa nacnissaah, wohuk gexak usuk udurro malih elle bayannah, faxximmita migditte acassaluk, kulli marih fanal meqemmariini akah dabqâ nah abta. Too madmak amakkaquk:
  - (a). A sittin-geyit tan baaxooxak kulli tiyá, sahdak numtin-amô caddol takku, hortittel takku, hinnay kaadu xisoosâ caadol takku, lagô baxsa celtaamak hebettoh imit gaba rube waytu-waytam diggossa.
  - (b). A sittin-geyit tan baaxooxak kulli tiyá, lagô baxsa gexisa maraa kee, xisoosah amô-wagitiy, kalaluu kee, cato abe waytu-waytaamah xagana culta.
  - (c). A sittin-geyit tan baaxooxak kulli tiyá cokoomatitte, agat kee rakaakáy caddol gexissah tan polisitteh addá qagitak wagittu waytaamah xagana culta. Toh kah abtam , woo qagitiyya abta wak lagô baxsa agiirissaamak dagoom takke way, tuk teynah amo tewqek, woo aracal woh kah massowtannah abek, inkinnah kale takke gide.
  - (d). A sittin-geyit tan baaxooxak kulli tiyá, faxe gitak /migdal- takkay----madqâ giti edde anuk, lagô baxsa celli haytam kalaata abeleeh, ellecaboh baahele. Numtin-

amol,hortal, hinnay kaadu, xisô caddol inkih.

(e). A sittin-geyi tan baaxooxak kulli tiyá, elle bicinnaan ikkel. Ittat-culah tan, mango lago le xisoosaay, angoyyittee kee geeri migditte inkih agiirisak, ummattooti fanal angale-kaltitte akah abyannah abele. Geeri kabuk kaadu, lagô baxsa aytikumussaah, ilsissa qaadoodit angicillele.

2. A sittin-geyit tan baaxooxa, caaloota faxsiisak macsissa waqdiina, ayyuntinanaay, madduruuy, qaadaa kee gersi booxaaxil inkih, rikeek tan maaqattooti beyak, rike edde raqte hortitteh dacayrii kee, dadalah faxximmi ittaamat asele. Takkay immay rike edde raqte marah beyan maaqattooti, usun dadalah bisoh iyye marat, xakbimeenik wadiril, raqtam hinna.

### **3<sup>haytô</sup> Maasayya**

A sittin-geyit tan baaxooxa, lagô baxsa, walandalam sinni nacnah nacnissa, keenih xinta rakaakayittel, lagô baxsal aceelem celli hayta qaadoodi, inkih waassaah, kalaatisaah, bayissa.

### **4<sup>haytô</sup> Maasayya**

A sittin-geyit tan baaxooxa kulli daqaayat kee, kulli xisoosay kaxxa mariinitiyyi mablaa kee, abinal xissimta, a num woo numuk nabah, a mari woo marak nabah yaanamih gexsit leh iyya, digga luk nacnissa. Toh dibuk hinnay, faxe qaynatih lagô baxsa uguugusaah, woh gitat tanim celsiisaamih, gabbatu aba mara, kaadu nacnissah. Geeri kabuk kaadu

sahdaytinán Garwak Baadinan Baxxaqsoo kee , a sittin-geyik 5<sup>haytô</sup> maasayyah gubal tanim, aracat kah gactannah abele.

- (a). Madqal diggalsima baatilih orbisele, iyyi-yigid-yakkeey, naqabi maxcoocah baxcissoo kee, lagô baxsi cuscuso.

Tohuk kalah kulli dirkissok/meysissoy buxá buxat, hinnay kaadu num,numut bisul takku, samadal takku aba, diggalsima baatilih orbisele. Woo migdal sinaamat aban catohim kaadu, tonna aallele-maali cato edde anuk.

- (b). Xisoosa takku, xisoh gurrah yan mara takku, hinnay kaadu faxe qaynatih daqayatay, lagô baxsa yascasseeh, warraysa inkih, madqal diggalsima baatilih orbiseleeh, kalaata abele. Tonnah tan xisoosat adoytiinuh gacaanam digaalá aallele.

- (c). Agat caddol takku, rakaakáy caddol takku, sadár abbobtii kee, sadár xissoosa, lagô baxsa uguugussam keenih moggolta.

## 5<sup>haytô</sup> Maasoyya

A sittin-gey 2<sup>haytô</sup> maasayyal tescessimeh tan rakiibô kol-tanitteetak amakkaquk, a sittin-geyit tan baaxooxa, faxe qaynatih lagô baxsa, kalaata abtuuy, bayissu, isil teexegeh tan. Kulli mari lagol, bisul , agattinal baxsa aalle kal, madqâ foocal inkigid yakkeenim kee, axcaxcih a ciggilta garwa yaalleemi.

- (a). Caxaa kee qadaalat wagitti haytaamih foocal inkintit yambulleeniimh gar yaalleeniimi.

- (b). Saayah xiinaanamih gar kee, caylal xissimta umaanek doolat dacayrl geyaanamih gar yalleenimi---woo dadho doolát abbootan le marih gabat takku, cankah yan marih gabat takku.
- (c). Siyaasâ garwa, axcaxcih waraakit-qidnel takke dooroh, dooriiy/doorime yakkeenimih gar yaalleenimi. Kalah kaadu faxe caddol tan doolat kee, sadár taamoomit, gaba yassagalleenimih gar yaalleenim---taama geyaanamih gar edde anuk.
- (d). Geeri gabqasâ garwa , axcaxcih
- (i). Elle yanin baaxol angoyyaa kee sigô gar yaalleenimi
- (ii). Elle yanin baaxok, gexoy-gacti gar, yaalleenimi
- (iii). Baaxô-baxiini gar, yaalleenimi
- (iv). Rihim kee qasaalâ dooroh gar, yaalleenimi
- (v). Ikoytá cankah takku, sinam lih takku loonumih gar, yaalleenimi
- (vi). Nagrâ gar, yaalleenimi
- (vii). Misinkicaay,afqadoo kee diini dooritaanamih gar, yaalleenimi
- (viii). Isinnit celtam kee anxác curriyyatih gar, yaalleenimi
- (ix). Wagarit gaaboowaanam kee, eglalah xissiimaanamih gar yaalleenimi.
- (e). Madduruuy, ayyuntinan kee qaadâ garwa, axcaxcih:
- (i). Taamâ garwa : taamat currik gacoonu duudaanamih gara, tet addal meqe abbax yaalleenimi, tet waytik

abboode waanama, inki qaynatih taamak inkigid takke meklá geyaanama,aben taamah taguude meklá geyaanamah gar, yaalleenimi.

- (ii). Taama abah eglat adoytiinuh gacoonu duudaanam kee tet soolisoonu duudaanamih gar, yaalleenimi.
- (iii). Dabqi yaalloonu duudaanamih gar, yaalleenimi.
- (iv). Daylak/diwaa kee ayyuntiinoh caabii kee, ayyuntinan ayfaafayih gar, yaalleenimi.
- (v.). Barittoo kee aydakaakán gar, yaalleenimi.
- (vi). Qaadah abitittet inkigid yakke gabah assagollih gar, yaalleenimih

## **6<sup>haytó</sup> Maasoyya**

A sittin-geyit tan baaxooxa, isi xintootah addal, kulli numuh, le sahdayiinooh garwaa kee, rakiibô curriyyatitte dacriissu dudda qadaalát buxaaxi (caxá) aracat haak,a sittin-gey sadda haytam inkih, abtol kah ase waytannah abta. Abtol kak assem tenek, baatil edde yekke mara xibtah.

## **7<sup>haytó</sup> Maasoyya**

A sittin-geyit tan baaxooxa, lagô baxsâ fan mirractimtu dudda umâ-niyaa kee, uman kaban, ugutul elle bayisak, axcaxcih barittoo, qaadaa kee xaagi caddol. Aki kabuk kaadu hittin-geyiyi, xiiqiyi, kataysiinu ummattâ fanal akah dabaqtâ nah abta. Galli-Maroh charteriyy, sahdayi Garwak Baadinan Baxxaqsoo kee, a sittin-geyil escessimmi ittem inkih abtol asissa.

## EXXÁ II

### 8<sup>haytô</sup> Maasayya

1. Lagô-baxsi baysah taban kee bacra tu-yaaxigik xissimte komite soolele (ahak wadiril komite deqsita). Too mari kaxxa duddol yimixxige maray a sittin –geyit tan baaxooxa isi marih fanak, qaxiita aallekal, qadaatal doortah iyya.

Too komiteh adoytiitiy, kuli num kak is misinkkat celtaamat kak taamitu-waa, baxaabaxsa le rakaakayittee kee, qaadaâ madqooqi cisbatat haak doorime mara, akkelon.

2. Too komiteh adoytit a sittin-geyit tan baaxooxa, xayyossa marih fanak cuumi waraakit-qidnel doorime le. Kulli baaxo, isih baaxô-xaylok inki num muggaaqisak ruube le.

3. Qimbô dooro, a sittin-gey , abtol elle asa ayrok lacalsih lakal akkele. Kulli doorok daggowwu intek, sidiicalsak naharat Galli-Marok kaxxa Cuumi Mabbaxii a sittin-geyit tan baaxooxah jawaab ruubele; usun muggaaqisan mara, nammalsih addat akah xayyosan innah. Kaxxa Cuumi Mabbaxi xayyowte migooqa warâ yaakumik ciggiilil massossuuy, ken muggaaqiseh rubte baaxooxah migooqa foocal akak hayya heeh, keenil gacsele.

4. A komteh adoytit elle doorima-waam Galli-Maroh salalay, Kaxxa Cuumi Mabbaxi, a sittin-geyit tan baaxooxah elle seeceh iyya. Too daffeynay, adoytiitih tan baaxooxak, nammâ-sidoctá elle geytimtek daffeyné-kibo kak kibbimtah iyyal,



daffeynal geytime marak , komiteh adoytiitih doorimtam, giffole gabâ-ruuboh magga geya mara.

- (a). Komiteh adoyti akah doorimtam affara liggida. Tokke way, 9 num keenik taamittam inki namma liggida Nanarsi dooro tikkiteek lakal, woo saglá numih meexo komitêl saqal keenih qida saamil akkele.
  - (b). Komiteh adoytiitik num yunkuse kaa tekkek, adoytiitih tan baaxooxak, woo num muggaaqisseh rubte sugte baaxo, kay aftok num muggaaqiseh rubta. Woo oggol geyam, komite kaa raabitta waqdi.
6. Komiteh adoytit taamal tanî fan, ken mawqooqa, ken rubte baaxooxa sarissa (dudda)

## **9<sup>haytô</sup> Maasayya**

1. A sittin-geyit tan baaxooxa, Galli-Marok Kaxxa Cuumi Mabbaxih gitaak, komite wagittah tan gabbaaqu rubtu waytam isil teexegeh tan. Too gabbaaqi, madqah ayyaaqiyyaay, abtol assiyyaay , xiinissooy, kalah tan maaqattootiy beenih iyya ascassuk, a sittin-geyih kaxxa tû-xiq aallele.
  - (a). A sittin-gey , wagta baaxol, abtol edde ase waktik xabba haak inki liggidih addat,
  - (b). Wohuk lakal kulli namma liggidal , kalah kaadu komite esserta waqdi. Komite a sittin-geyit tan baaxooxak, mango xaagitte essertam bictah.
2. Komite kulli sanat abtah tan abitittek, gabbaaqu xayyoysese. Woo gabbaaqi kaxxa Cuumi Mabbaxih

gitaak Galli-Marok Kaxxa Koboxuh xayyoowele. Tokkel, malaa kee woh-takkem-meqeh ascossitte elle xissimtu-waytam, a sittin-geyit tan baaxooxa, rubtah tan gabbaaqitteh kusaaqa.

Too aham-celtaa kee, ah-akkeh-meqe Galli-Marok Kaxxa Koboxuh gabbaaqmele, a sittin-geyit tan baaxooxak anni-aysuk-yeneh ascossa luk; /yeelleenik/

### **10<sup>haytô</sup> Maasayya**

1. Komite isi siiratah gexsit madqá mudele.
2. Komite taama gexissah tan abnisá, namma liggidah doorele
3. Komitê Cuumi Mabbaxeynah faxximtam, Galli-Marok Kaxxa Cummi Mabbaxi abele.
4. Komitek qaadik tan daffeynaani, Galli – Marô salalal akkele.

### **11<sup>haytô</sup> Maasayya**

1. A sittin –geyit tan baaxooxak tiyak teyná, geeri adoytáh tan baaxo, a sittin-geyil wallossam tubelek, woo caagidih komite, ayti kah taceê nah abtu duddah.  
  
Komite too waqdi caagid wagitah yan baaxo taysixxige. Woo xaagu kah tatrusen baaxo, sidiicalsih addat a cagiidik abtem komiteh kutbeh taysixxige abtem teellek, aalle-waytek, kah abe wayta sabab iffossak.
2. Namma baaxo , nammay-yakki walal takku, hinnay geeri gital takku, sitta gee waytek, caagid wagita

baaxoh warseenimil, lecalsi duudeek lakal, tiyak teyna keenik komite taysixxigeemih gar le. Komite dibuk hinnay, woo aki baaxo kaadu taysixxigem faxximta.

3. Komite teetil tatusen caagid a maasayyah,lanik 2<sup>hayto</sup> elle tascassê nal abele. Takkay immay, toh abtam a caagidih kulli migdal dayla weenim ismitti keenik hayta waqdi. Abte tet tekkek, elle abtam baadinan madqay imixxiggi tan radmoomal xissimta. Toh gitah moorobta, woo abnah iyya dayli ceele waah , faxxiime-waa xexxaarah, yaxxeere kaa tekkek.
4. Komité faxemiyy tet fanah hoonay, a sittin-geyit tan baaxoosak caagid wagita exxaaxik, addâ fakoot le ossantanî xaagu abtu taaxige.
5. A maasayyak amakkaquk, komite elle walalta caagid teellek, a sittin-geyit tan baaxoosak, a qaada wagittah tan exxaaxi, daffeynat yangale wakiiliy, marol loowima anay yaallu duude waa, ruubitaanamih gar lon.

## **12<sup>haytô</sup> Maasayya**

- 1.(a). Komité faxxiimah kak itta xaagu geyteeh, gaabosseek lakal, komité saqal wagrissiyyah Adhook kommiishin a hak wadiril kommiishin deqsita muggaaqisa. Too kommiishinih adoytitih konooy, komitek yanu duudaah irok yanu duudah. Woo kommiihinih adoytit sitta wayta, namma buxah oggol kee, raabitik muggaqsima. Kay biiroora kaadu caagidih meqe niyaa kee bica,luk,a sittin-geyih assakoxxa luk, caagid le baxoosah fakimit tan.

- (b). Caagid leh tan baaxooxa, kommiishin adoytiitik garabal takku, inkih takku, sidiicalsih addat sitta gee waytek komite isi adoytiitih fanak, cuumi waraakit-qidnel, komiteh adoytiitik namma-sidoctah anay gee mara dooritel e.
2. Kommiishin adoytit isinni awakkaluk taamite loonú kal, a caagidil sitta wayta baaxooxa ma yawikkilan. Nammeyhaak kaadu, a sittin-geyit anee wayta baaxooxa, ma yawikkilan.
  3. Kommiishin saqalah haysita num dooriteleh, isi siiratah gexsit madqá haysite le.
  4. Kommiishin daffeynaani Galli-Maroh salalal akkiyy, wohuk kalah bica le aroocay, kommiishin isih doorital akki, akkele.
  5. Cuumi Mabbaxeyná a sittin-geyik 10<sup>haytô</sup> maasayyah lanik 3<sup>ll</sup> akah tescessimê nah, kommiishinih ayfaafay abele, sittin-geyit tan baaxooxah sittin-wayah, kommiishin muggaqsima waqdi.
  6. Sittin-geyit tan baaxooxay sitta wayta, Galli-Marok Kaxxa Cuumi Mabbaxi, maaluk kommiishin mawqooqah yascassem, inki gidel mekle le.
  7. A sittin-geyit tan baaxooxay, sitta wayta, kommiishin mawqooqah mekla udurrussek, Galli-Marok Kaxxa Cuumi Mabbaxi, usun meklaanah gide,woo lakqo amrisu duudaamih duddo le, a maasayyah lanik 6<sup>haytol</sup>
  8. Komite geyteeh, gaabosse xaagu kommiishin geyu yaaxige. Kommiishin wohuk kalah caagid wagtah yan baaxooxak , geeri xaaguy faxxiima ruuba iyya yaaxige.

## **13<sup>haytô</sup> Maasayya**

1. Kommiishin, elle faxximittâ nal caagidik adda tabeek lakol, komitê saqalah bicissi hee gabbaaquy, geyyi heeh nummaami addat lem dibuk hinnay, wohim isih edde yable intik, amakkaquk, tû-bicah yescesseh yan ximmooma addat le, ruubele.
2. Komite saqal, kommiishin ruubeh yan gabbaaqu, sitta wayta baaxooxah inkih ruuba. Too baaxooxa komitê saqal keenih ruube gabbaaqu edde tubele inti,(cintuu/oggoltu) sidiicalsih addat gacissu taaxige.
3. A maasayyah lanik 2<sup>al</sup> yessessimeh yan uddurih lakal, komite saqal, kommiishin gabbaaqu kee, caagid wagtah yan baaxooxah gacsa, sittat hayya heeh, a sittin-geyit tan geeri baaxooxah ruuba.

## **14<sup>haytô</sup> Maasayya**

1. A sittin-geyit tan baaxoh addal, kay addal tan garwat nek yeeqeteenih axcuk, mataaká xayyooya num yenek, hinnay mari yenek, komite woo ceelewayaanu kusaaqissu duddaamih duddo lem, woo baaxooxa teetih taaxigem faxximta. Too mamaxxaga baxxaqise wayte baaxok xayyowta mataaka, komite ma hirigta.
2. A maasayyah, lanik 1<sup>haytol</sup> akah tescessimé nah, mamaxxaga baxxaqisse baaxo, isi addal nee biyaakeenih iyya marih weeqá yable, madqal xissiiima xagar soolissu duddah. Too xagar, le rakaakayal bica akah wayya heen mataakooki kusaaqisu duddah.

3. A maasayyah lanik 1<sup>haytol</sup> tescessime mamaxxagah, 2<sup>haytol</sup> tescissime xagarih sooloh sanad, a sittin-geyit tan baaxo Galli-Marok Kaxxa Cuumi Mabbaxah rutba. Kaxxa Cuumi Mabbaxi, a sanadih korraqitte sittin-geyit tan baaxooxa, akah gufta nah aba. Mamaxxagâ baxxaqsot faxe waqdi yaduureenim bictah, Kaxxa Cuumi Mabbaxa aysaxxaguk. Takkay immay too edde aduuriyyi, komitê foocal tan caaggiida ma wagta.
4. Mataakookî maysaqarra, a maasayyah lanik 2<sup>haytol</sup> soole xagarih garil, daffeele. Woo maysaqarrak diggoysen korraqitte, bica le migditteh gitaak, liggidal , Kaxxa Cuumi Mabbaxáh ruubimele; takke way, adda-fakoot kak ma baxxaqsimma.
5. A maasayyah , lanik 2<sup>hayto</sup>, rakiibo abak soole xagar madqeemit cayye wee kaa tekkek, weeqá xayyoysé, lecalsih addat komite yaysixxigeemih gar le.
6. (a). komitê isil xayyowte weeqá, mataakisen baaxoh, cuumit tatrussa; takkay immay , xayyooyse numih/marih migaq ma warissa----usuk /usun faxeenih akke waytek.Tah tanna kinni wakaay takkay, komite, migaq elle anee waa mataaka ma hirigta.
  - (b). Hirigta baaxo, sidiicalsih addat a caagdiik abtem, kutbeh komiteh
 

taysixxigem le. Daylá, akah geyteh tenek, woh taysixxigem le.
7. (a). Komite, weeqá kak xayyowte baaxoo kee, xayyooyse numuk geyte xaaguk gexak, kusaqa qimbissa. Komite weeqá xayyoysa numuk weeqâ hirigtam, kulli migdal bica akah gee weem diggossa waqdi. Tonnâ may,

woo bici faxxiime-waa xexxaarah yaxxeerem tublek,  
woo tiya tet ma wagitta.

- (b).Komite, ah-celtaa kee,ah-akkeh-meqe, teellek weeqá akak xayyowte baaxoo kee, xayyoyse numuh inkih taysixxige.
8. Komité liggidal xayyossa gabbaaqut, abteh tan angaarawitteh uxxoysoo kee, sittin-geyit tanó xayyosse baxxaqsok maxcoocah taybeleeleqe. Kalah kaadu isi ah-yot-celtaa kee, ah-akke-meqe edde osissa.
9. Komité, ta maasayyal mohoodisen taamoomi abtu duddam, teetik maasayyah lanik 1<sup>haytol</sup> tescessime mamaxxagah baxxaqso doggowwu intek, a sittin-geyit tan baaxooxak tabanak geyta waqdi.

## **15<sup>haytó</sup> Maasayya**

1. Galli-Marok Kaxxa Koboxih margaqá 1514(XV) Frangi liggidih loowok (F.L.L.) diisembér alsak 14/1960 madqimtey, kü-amol-ayyô gubat tan baaxooxaa kee, ummattooti le amô-baxxaq geytay, kak iyyeenih abnissohim elle taninnal elle anuk; a sittin-geyih addal tanim, a maritteeta geytok xayyoyssitta weeqá , geeri baadinan massoynaanah gabat takku; hinnay kaadu Galli-Maroo kee tet exxaaxih gabat takku, debrimtu ma duuda.
- 2.
- (a). A sittin-geyik 8<sup>haytó</sup> maasayyah, lanik 1<sup>haytó</sup> rakiibo abak solta komite xayyowta weeqak korraqite hirgeleeh, isit celtam edde osissi hayteh, Galli-Marok caagiida wagitta xagoorah tatrusele. Toh, amaanatah gabat

lon baaxooxaa kee, isi amô-baxxaqqa gee wayte baaxooxay Kaxxa, Koboxih Margaqa 1514(xv) tascasseh iyya.

- (b). Komité, Galli-Marok qaadoodi gabat le xagoora haytah tan gabbaaqitteh korraqitte hirgele. Too gabbaaqitney, madqah ayyaaqiyyaay, abtol asisiyyaay, xiinissoo kee geeri maaqattootiy, a sittin-geyih radmoomaa kee, madmoomit axawah tani iyyah adda, wagitele. Isih edde table intik amakkaquk, isit celtam edde ossele. **Toh** a qunxa maasayyak (a)<sup>al</sup> galab kak xagne baaxooxa wagittaamal.
3. Tet gufte caagiida wagsiisak komité Kaxxa Koboxuh rubtah tan gabbaaqut xayyowte weeqaa kee Galli-Maroh xagoorak hirigte gabbaaqitteh uxxoyso heele . Tohuk kalah kaadu, isit celtam kee akkeh-meqem edde ossissi hayteh ruubele.
4. Komité , Galli-Marok Kaxxa Cuumi Mabbaxak, a sittin-geyih madmoomi wagsiisak faxxiima xaaqu inkih esserele. Wohuk kalah a a masayyah lanik 2<sup>haytok</sup>(a)<sup>al</sup> galab kak xagne baaxooxak xaaguh, kay garil tanim hirgele.

## **16<sup>haytô</sup> Maasayya**

A sittin-geyih maasayyooyi, sittin-wayittee kee, mataakooki yafdigoonuh edde xoqoysiman, geeri migditte ma sadda.

Baxsa le farmo le Galli-Maroh wakaalatitte, bood kee sittin-way fidgah, edde xoqoysimtah tan siiratittee kee madqooqi kaadu, ma sadda. Kalah kaadu a sittin-geyit tan baaxooxa sittin-fanal haysitta tan baadinan sittin-geyitte kaadu, ma sadda.



## **EXXÁ III**

### **17<sup>haytô</sup> Maasayya**

1. Galli-Maroo kee, tet gubat baxsa le farmooma kah tontocowweh tan wakaalatitteh adoytah enewwita baaxooy, Baadak Qadli Caxa elle solteh tan madqá oggoltê baaxoo kee, Galli-Marok Kaxxa Kobox, a sittin-gey oggoltuh seeco kah abeh aninnan baaxo, a sittin-geyil ferma haytuh fakimut teetih yan.
2. A sittin-gey faatacisimam faxa. Kaa edde faatacisan aaloota Galli-Marok, kaxxa Cuumi Mabbaxih garil (gabat) tan.

### **18<sup>haytô</sup> Maasayya**

1. A sittin-gey digga yaallem 17<sup>haytô</sup> maasayyah 1<sup>haytô</sup> lanil galab kak xaggiime baaxooxa, kaa oggolta waqdi.
2. Diggoyso kaak aracat gactam, Galli-Marok Kaxxa Cuumi Mabbaxih gabat tan faatacisiyyi aalootat, diggoowa waqdi.

### **19<sup>haytô</sup> Maasayya**

1. A sittin-gey abtol asam, Galli-Marok Kaxxa Cuumi Mabbaxih garil tan faaticissok/diggoysoh aalootak 27<sup>haytô</sup> kaal xayyowteek lakal soddomeele ayro.
2. Sittin-gey faatacissok/diggoysoh aalootak 27<sup>haytô</sup> Galli-Maroh xayyowteeh, faatacissa baaxooxal isinni sanad edde xayyosse ayrok soddomeele ayrol, kaa takkuqeemih dirkisimtah.

## **20<sup>haytô</sup> Maasayya**

1. Galli-Marok Kaxxa Cuumi Mabbaxi, a sittin-geyik adoytiitih tanim kee, yakkoonu bictah kak iyyan baaxooxah, a sittin-gey faatacsime waqdi, baaxooxa bagi-way kak teellem, inkih keenit mermerisa. Faxe baaxoy,a bagi-way sadda, tet edde yiysixxigen ayrok xabba haanam tan sagla-tabanih ayroh addat, Kaxxa Cuumi Mabbaxa ciná taysixxigem le.
2. A sittin-geyik rakiibô hadaf kee, madma sada bagi-way, oggol ma yaalla. A sittin-gey taamal asissa gideh solte xagoorah adaf yakkem ma duuda. A sittin-gey faaticissa baaxooxak namma sidocotá bagi-way kaak teellek , toysa usuk oggol ma geya.
3. Yeyseqerren bagi-way, kaxxa Cummi Mabbaxa aysaxxaguk, edde nuduureh iyyaanam bictah. Too aysaxxaage edde gufte ayrok loowimta.

## **21<sup>haytô</sup> Maasayya**

A sittin-geyit tan baaxó, a sittin-gey Galli-Marok Kaxxa Cuumi Mabbaxah kutbeh xayyoysak gididiyu duddah. Woo gididi aracat gacu duudam, Kaxxa Cuumi Mabbaxa edde gufe ayrok , inki liggidih laka.

## **22<sup>haytô</sup> Maasayya**

A sittin-geyit tan baaxooxak nammay fanat, hinnay kaadu wohuk biso takke aydoytiitih fanal, a sittin-geyih maqnissok/abnissol sittin-way yekkeeh, woo umaane walal akkek, geeri gurral tanfidiggiimu duudime-waytek,woo baaxooxak tiyak,teyná, caagid Baadak Qadaalat Caxah margah xayyossu duddah; xayyossa exxaaxi , geeri migdi neh yayse, iyyan ken akke waytek.

## **23<sup>haytô</sup> Maasayya**

1. A sittin-geyit tan baaxoosax faxe tiyá, faxe wak, a sittin-gey naysiisem faxximta yaanamih essero, Galli-Marok Kaxxa Cuumi Mabbaxa, kutbeh aysaxxaguk essertu dudda.
2. Galli-Marok Kaxxa Kobox tonnah tan essero, elle yabbixê naa kee, beya maaqatta/tenek/margaqá, aracat kah heele.

## **24<sup>haytô</sup> Maasayya**

Galli-Marok Kaxxa Cuumi Mabbaxi, a sittin-geyik 17<sup>haytô</sup> maasayyah lanik 1<sup>haytol</sup> cussumte baaxoosah inkih, a ciggiltam aysixxigele.

- (a). Fermaamiiy, faaticissoosaa kee diggoysoosa, maasayyak 17 kee 18 gubal.
- (b). A sittin-gey abtol edde asa ayro, maasayyak 19 gubal
- (c). Tekke angaarawittee baxxaqsoosa kee maasayyak 14,20 kee 23 gubal
- (d). Giditte, maasayyak 21 gubal

## **25<sup>haytô</sup> Maasayya**

1. Chaaiinaay, Ingliiziiy, Faransaawiiy, Ruusiyaa kee Asbaaniyah afittet bichte sanaditte inki nihir leemih sabbatah, Galli-Maroh maysaqarrittel daffeele.
2. Galli-Marok kaxxa Cuumi Mabbaxi numma kinnim akak diggoyse sanaditteh korraqitte a sittin-geyik 17<sup>haytô</sup> maasayyah, lanik 1<sup>haytol</sup> gelab kak xaggiime marah inkih baxcisele.

### **3. Kulli Qaynatih Xukkoy Nado Baxisak Takke elle Bayisan**

#### **Sittin-Geyi**

##### **A sittin-geyit tan baaxooxa**

Galli-Maroh charteriy sahdak rakiibô garwaay sahdaytinan konnabnaa kee, labmaraa kee saymarih inkigid-akkiyyal yaaminek amakkaqak,

Sahadaytinan Garwak Baadinán Baxxaqso, baxsal xissimtaamak hebeltehim oggole waytaah, raabita waytam kinnuk, sahdá currik taabukeeh, inkigid takke garwaa kee konnabna le mara kinnuk, kalah kaadu, faxe num tet addal tan garwaa kee curriyyatitte hebeltô baxsa maleh---nadô baxsi edde anuk,xoqoysimam faxximtam digga luk tascassem cedak,

Sahadaytinan garwah, baadinan xaganitte culte baaxooxak, labmaraa saymara madduruuy, ayyuntiinooy, gabqasiinooy kee siyaasâ garwat inkigid akkuk akah xowoysimtannah abtaamih dirki teeti tanim cedak,

Galli-Maroo kee, tet baxsa – le wakaalatitteh amô – wagitil tekke baadinan sittin – geyitte labhaa kee sayyoh inkigid akkiyya diggoysak faatacismtem kinnim aaxaguk,

Kalah Kaadu Galli-Maroo kee tet baxsa-le wakaalatitte, saymaraa kee, labmarih garwah inkigid-akkiyya wagsiisak, tatusseh tan margaqooqiiy, baxxaqsoosaa kee, woh-akke -meqe cisbatat haak,

Woo maaqaattooti beysimtaamah, saymarat nadô caddol takke xukkooka uxik a barah gexsittam asmatuk,

Saymaral takkeh tan baxsá le xukko, garwah inkigid akkiyya bayissaah, sahdayti konnabna saddam kinnuk, sayyo, labhâ luk isinni baaxoh siyaasaay, ayyaatinanaay, maddur kee, qaada manot inki gabah - assagolla yaalleenim adaftam kinnuk, kee saymari binaadamtuu kee,

isi baaxooxah yaceeh yan ayfaafayih dadalah, leh yan niyaa kee arqot booddam kinnik,

Tu – dagiini caalootah addal saymari maaqooy, qafiyataay, barittooy, aydanaakan kee, tu kak orbisa taamoomih geytoo kee, geeri fayxiixa kibuh, leh yan saami ceya lem cedak,

Qusba baadinan maddur siirat ritqii kee fitcil inkih xissiimaamih taagah, labhaa kee sayyô fanal inkigid-akkiyya daabisuh, gifto le caddol catelem aamanuk,

Appersaayidiiy, kulli qaynatih lagô-baxsaay, samadal baxsiyyaay, kü-amol-ayyooy, wararaay, baaxoh abbaxaay, amol-gaciyyaa kee, geeri baaxooxah caagiidat culiyyih baysi, saymara kee labmarih garwah assakooxah kaxxam xiqaamih sabbatah dahni akah acayuk,

Baadinán wagarii kee saayih diggoysiyyaay, baadinan umaaneenah xabboysiyyaay, faxe ayyuntinan kee maddur siiratitteh baxsá yaalloonay, baddooxâ fanal sitta cataanamih qallih manooy, silac fidgaay, axcaxcih kokkobi girá digga le baadinan koborih gubat gaciyyaay, qadaalataay, inkigid-akkiyyaa kee, baaxooxâ fan inkih kah xoqoyi geyan qallih manooy, ku-amol-ayyooy, amol-gaciyyaa kee, irô gabah abbaxih gubat yan shaqbi, isi cakki isih madgitaamih duddoo kee, amô baxxaqqa गयाamaay; wohuk kalah kaadu le muddaqiyannuu kee, le baaxoh inkittinaane sittah yasakaxxeenim, ayyuntinan dadal kee, bisô-maxco warrassam kinnuk, tet xali saymaraa kee, labmarih fanat aneh meqe inkigid akkiyya, kaxxam diggoyselem aamanuk,

Inki baaxok dudda le dadalaay, inkih yan baadih nagay-taniinoo kee, wagari dacayri, saymari, labmarâ luk inkigid akkuk aba gabah-assagollá faxxam kinniimit cayyak,

Taham fan dudda le mamaxxaga akah gee waan way, saymari buxaa kee ayyunti dadalah edde asah yanim kaxxam kinnim cisbatat haak, iná, ayyuntah tacee gabaa kee, xaltani buxah addal, urri manubut leh tan gabá cedak, sayyo , sahdayti samadih aydorrat digirtah tan doori,

huri intit tambulleem akke waak, urri yawnabeenim labhaay, sayyoo kee ayyunta inkih wagittam kinnim cedak,

Labmaraa kee saymarih fanat nummah inkigid-akkiyyi dabqam faxximtek, sayyoo kee labha taham fan buxaa kee, ayyunti addal, qaadah tu elle luk sugen inni, milaagimam faxximtaamal aamanuk,

Kulli qaynatih xukkoy, sinam nadol baxisak saymarat takkeh iyya ragiidik bayisnuh, a baxxaqsol excessimmi in the tan madmoomak/rádmooma habelto baxsá maleh abtol asisnuh, ahak gubal taniimil sitta geyneh nan.

## **EXXÁ I**

### **1<sup>haytô</sup> Maasayya**

A sittin –geyih addal“ saymarat nadol takke xukko”yaanam, sayyok digibtem takku, digibe-waytem takko.

Saymariinô nadol ken baxisak, siyaasaay, madduruuy, ayyuntinanaay, gabqasiinuu kee, geeri booxaaxil inkih, garwaa kee carriyyatittet, labhâ gid aalluk gexsite waanâ gideh yakkeh baxsaay, irot-cabtii kee deberi.

### **2<sup>haytô</sup> Maasayya**

A sittin-geyit tan baaxooxa , saymara burintit yableenim nacinissah. Elle faxximmi intâ nal , woo baxsá udurro maleh bayissuh, xagana cultá. Tohuk gexak:

- (a). Taham fan akke wayteh tenek, saymaraa kee labmara inkigid takkeeh, inkih garwá leemih madqá isinni baaxoh dastuurittee kee, geeri madqooqit inkih haanama. Too inkigid-akkiyyih radmo abinal yassakaxxeenim le.

- (b). Saymarat yakke lagô baxsa ragidiik baysoonuh, faxximta madqooqi aracet kah haanama, faxxiimak maacissek, katlâ-mabbux maaqattooti také way, beyaanam le.
- (c). Saymaraa kee labmara, inkigid takke garwa leemih, madqâ dacayri haamam faxximta. Toh diggoysonuh agát caxaa kee , geeri sadár xisoosah addal, saymarat hebeltô baxsi akah akke waaná nah, abaanam le.
- (d). Saymara baxsa lentit yableenimik isinni dacrisaanam faxximta. Doolát abbobtii kee, massoynaani too radmo dirki isil abtam le.
- (e). Faxe num, faxe massoyná, hinnay xiso, saymarat nadol yakke gactitinô baxsá baysoonuh, faxximmita maaqattooti beyaanam le.
- (f). Saymarat nadol takke xukko catta madqooqii kee, edde-xintitte, yaysiisonuh, hinnay kaloonu; kalah kaadu qaadaa kee abuk-raqtih tanim tekke baysoonuh, qusba madqooqi ayyaaquk, faxximta maaqattooti beyaanam le.
- (g). Saymara, umaaneh basá lentit table, baatil digaalah madqooqi taamite kalaanam le.

### **3<sup>haytô</sup> Maasayya**

A sittin-geyit tan baaxooxa, kulli migdal, axcaxcih siyaasaay, madduruuy, ayyuntinan kee, qaadâ migdittel, faxximmi ittah tan maaqattooti beele---madqâ mudo edde anuk, sayyô dadal kee bisô-maxcoh sabbatah. Toh kah abtam, saymari, labmarâ luk inkigid akkuk xoqoysima gide le garwaa kee, curriyyatittet.

#### **4<sup>haytô</sup> Maasayya**

1. A sittin – geyit tan baaxooxa, rikeek tan maaqattootiy saymara, labmarat matrissuh beytah iyya, lagô-baxsi loowo ma taalla. Tokkay immay, woo maaqattootih xali, sayyoo kee labhá fanal, baxsá le caddooda yaybulleem ma faxximta. Woo maaqattooti akah been madmá aracat gactek wadirillah, tet soolisaanam faxximta.
2. A sittin-geyit tan baaxooxa, inâ lallaboh beyaanah yanin maaqattooti; a sittin-geyih addal tanim edde anuk, lagô baxsah orbissam ma faxximta.

#### **5<sup>haytô</sup> Maasayya**

A sittin – geyit tan baaxooxa celta maaqattooti beele:

- (a). A nado, aki nadok gactah, hinnay tayseh yaanamih mablaa kee, kalah kaadu qaadaa kee, abuk-raqtil saymaraa kee labmara inkigid ma takka yaanamih wadir-raq mablá bayissuh;
- (b). Buxâ barittol, iná yakkeenim ayyuntinan abinittek tiyak teyná kinnim diggowtuh, labhaa kee sayyo, urri manubul inkigid takke qaaqá loonumih mamaxxaga yacoonuh, too caalootah addat, giffo luk tambulleem, urri maslacet kinnim tamaxxaguh;

#### **6<sup>haytô</sup> Maasayya**

A sittin-geyit tan baaxooxa saymaral aban kabxaa kee gacoobannu bayissuh faxximmitta maaqattooti beele.



## **EXXÁ II**

### **7<sup>haytô</sup> Maasayya**

A sittin-geyit tan baaxooxa, gactittinoh say marat yakke lagô baxsa bayissuh faxximmita maaqattooti beele, axcaxcih siyaasaa kee, baaxok sadár manol, Toh kah abtam saymari, labmari leh yan gar.

- (a). Kulli dooroo kee, maca-faxxaanal, anay yacoonu duudaanam kee, ayyunti, anay acayuk aba doorol ,doorimoonu duudaanama.
- (b). Doolát polisi yayyaaqeenim kee, abnisaanamat gabatagle yaalleenima kee , tet abbobtik numuk teyna yakkoonu duudaanama. Tohuk kalah, doolatak faxe caddol tan aroocat taamitoonu duudaanama,
- (c). Doolat xagar aalle-wayta xisoosay, baaxok siyaasaa kee sadar manot gabah assagolla let, gabat –agle yaalloonu duudaanama.

### **8<sup>haytô</sup> Maasayya**

A sittin-geyit tan baaxooxa faxximmi inta maaqattooti inkih beele, saymari, labmarâ luk inkigid akkukuuy, hebeltô baxsá aalle kalah, baadinan caddol isinni baaxooxa awakkaluk taamitaanama, wohuk kalah baadinam massoynaanah taamoomit, gaba kah yassagallen innah abele.

### **9<sup>haytô</sup> Maasayya**

1. A sittin-geyit tan baaxooxa , agabuh. labhah taaxige garwa aaxigele,, le baaxô-baxiinu geyoonuh, milaagoonuh, hinnay yaalloonuh. Axcaxcih diggoysele, saynum, irô numul digibta waqdi takku, hinnay tet baqli

baaxô-baxiinu milaaga waqdi takku, isi baaxô-baxiinu luk raqta---Geeri baaxô-baxiinu milaagimtaamih dirki teetil tanu ma dudda.

2. A siltin-geyit tan baaxooxa, saymarah, xaylô baaxô-baxiinu wagsiisak tacee gar, labhah le xaylo tacee garih gid yakke

## **EXXÁ III**

### **10<sup>haytô</sup> Maasayya**

A sittin-geyit tan baaxooxa, faxximmita maaqattooti beele, saymarat yakke lagô baxsa bayissuh.Barittô migdal labmarâ luk inkigid yakke gar loonum keenih diggoysele, axcaxcih saymaraa kee labmarih inkigid-akkiyya kulliimik rakiibo abele.

- (a). Lon mehrat gaddaloysoonuh, taamoomi yaysiisoonuh keenih yantacawweh yan fayi ayfaafal, magaaloolul takku, barril takku tan barittô massoynaanit , diploomuh takku, digrih takku, baritaanamal inkigid yakke saami keenih yantacawwuh, tohim kaadu urri assentitteey, metteebannuuy mehrat kee, giffita barittoh aroocal inkih, akah geyan innah abaanama.
- (b). Sitta celta barittô siiratitteey, aqayyaaritteey, inkigid yakke dudda le mehrat le barseenitiiy, inkigid yaake bica-le, barittoh buxaaxii kee, daasitteey, inki mexxat-le barittô silaacaay w.w...akah geyan innah abaanama.
- (c). Say-urruu kee lab-urru sittâ luk akah baritan inna aytikumusaanam kee, geeri barittoh cogdaadil, axcaxcih elle baritan kitoobaay, barittô taddiiraariiy, barsiyyi cogdaadi aysiisuk, labhaa kee agabi doori

wagsiisak yan, wadir-raq mabul,kulli barittô caddoo kee qaynatal inkih bayisaanama.

- (d). Minac kee, geeri baittô saamih geytoh, saymaraa kee labmara baxsá aalle kal, inkintit yableenimi.
- (e). Rakiibô barittoh taddiiraarii kee, baxsa luk, labmaraa kee saymarih fanat tan barittô baxxo uxxaysoonuh, tantacawweh tan kaxxa marih barittoh edde anuk, hittal katayta barittô taddiiraarit, gabah assagolla akah yaallen innah abaanama.
- (f). Baritto gudek targiqe sáy bartenitih ixxu daggoysoonam kee, tirgiqem akah barittâ nah, taddiiraari akah massoysoonama.
- (g). Tonna ceela saami anfakaakaq kee, xagar-dig barittol akah geyan innah abaanama,
- (h). Buxâ-marih qaafiyat kee, nagaytaniino diggoysoonuh, buxâ-mari tu elle aalleh meqennih ekraaroh baritto, akah geyan innah abaanama.

## **11<sup>haytô</sup> Maasayya**

1. A sittin-geyit tan baaxooxa, faxximmi inta maaqattooti inkih beele, saymarat yakkeh yan nadô baxsa bayissuh. Axcaxcih taamâ geytô wagsiisak, saymaraa kee labmarih inkigid-akkiyyih rakiibol solta garwa:
  - (a). Taamitaanamih gar, sahdak baxsime sinni gar kinnuk.
  - (b). Taamâ geytoo kee, tet elle geyan guritte, sahdah inkigid yakke gar kinnuk.

- (c). Mehrat kee taama currik dooritaanamih gara, caddô dadala, taamâ caabi, fuqam–fuuqoo kee ayfaafay geyaanamih garwa, mehrat aydakaakan qagam qagitak geyaanamih gara, kaxxa mehrát baritto geyaanamih gara.
- (d). Fuqam-fuuqo edde anuk aben taamah inki mekla geyaanama, Inkigid takke taamah, tet gid takke meklá geyaanama. Taamah agaarad yakke waqdi, inkintit yambulleenimi.
- (e). Ayyuntinan saayih gara, baxsa luk cawal galatoh yawqen waqdiy, taama waytiiy,biyaakaay, erginnaay, idoolinnaa kee, geeri sababah taamitoonu duud waan wakti. Wohuk kalah, taamak, mekla-le rakhsat geyaanamih gara.
- (f). Qaafiyat lallaboh gara, andoryi caagid edde anuk, taamah addat yanin waqdih nagaytaniinô caabi, yaalleenimih gara.
2. Sayyot rihimil takku, xalaay takku, baxsá le ceele-waynaani keenit yakkeemik, kalah kaadu, tamitoonu duudoonamih cakki, keeni dacrisoonuh,a sittin–geyit tan baaxooxa faxximmitah tan maagattooti beele.
- (a). Soonibiinuu kee, xaláy wakti taamak xiiriyaanam kee, digibik gexxaamah saymaral baxsa-le maaqatta beyaanam, digaala aalle le.
- (b). Xaláy rukhsatay meklá-le, geyaanam akkiy, hinnay kaadu wohim celta ayyuntinan xoqoysi geyi yakkeenimih gar, keenih dacrisak, dumi taamaay saqliinuu kee, ayyuntinan meklá, akah wee waan innah abaanama,

- (c). Xaltani, buxâ-mariini qaaqaa kee taamâ kol-tani, hittâ luk akah gexsan innah aboonuh, faxximtah tan cato ayyuntinan ayfaafayak keenih abaanam faxximta. Toh axcaxcih urri lallaboh arooca bicsaanaah, massoosaanama.
- (d). Soonibiini wakti, qilsaa kee osod lem celta taamoomik, saymara xagraanam kee, dacayri keenih abaanam faxximta.
3. Ta maasayyal galab kak xaggiime caagiida wagsiisak tewqe, dacayri, hinnay kaadu kalali madqooqi, kulli uddur missoo kee, metteebanni ixrigat kusaqsimak aysiisek, kalek, hinnay elle taninna cabe yakkeenim le.

## **12<sup>haytô</sup> Maasayya**

1. A sittin-geyit tan baaxooxa, faxximmitah tan maaqattooti inkih beele, saymarat nado baxisah yakke lagô baxsa bayissuh; axcaxcih qaafiyat dacayri wagsiisak. Labhaa kee sayyoh inkigid-akkiyyih rakiibol soolak, saymari, qaafiyat dacayrih ayfaafay geele----buxâ marak tu elle tamqe ekraarisiyyi edde anuk.
2. A maasoyyah lanik 1<sup>tol</sup> daffeytem tanay immay, a sittin-geyit tan baaxooxa, saymarah ceela ayfaafay taceem diggoysele idqinooy, ullinuu kee ullak elle tawqeeh, raqtâ kel. Elle faxximtâ kel, saymarah cindah yaceen ayfaafay kee, celta maaqo aceele, bagut lon waqdii kee, yayseexen waqdi inkih.

## **13<sup>haytô</sup> Maasayya**

A sittin-geyit tan baaxooxa, faxximmita maaqattooti inkih beele, saymarat nado baxisak yakke lagô baxsa bayissuh; axcaxcih maddur kee ayyuntiinô mano wagsiisak. Labhaa kee

sayyoh inkigid–akkiyyih rakiibol soolak, a ciggita garwa diggoysele:-

- (a) Buxâ maslacatih gara
- (b) Buxa xissitoonu, xaamitoonu, hinnay geeri taamoomi edde abitoonu, bankik, gacsi lakqo geyoону duudaanamih gara.
- (c) Nahadah, ruffu eddê yaanamaay, xagar-dig kee qaadâ daklaalit gabat-egla yaalloonu duudaanamih gara

## **14<sup>haytô</sup> Maasayya**

1. A sittin-geyit tan baaxooxa, barril geytimta sayyo edde tan gibdaabinaa kee, baaxok maalul loowima maddurut lon gaba cisbatat haak, a sittin-gey akak xissiima maasayyooyi inkih, abtol keenih assâ gideh, faxximmita maaqattooti inkih beele.
2. A sittin-geyit tan baaxooxa, faxximmita maaqattooh inkih beele, saymara nadol baxisak yakke lagô – baxsa bayissuh; axcaxcih barril kee barri tottoobal tanim wagsiisak. Labhaa kee sayyoh inkigid-akkiyyih rakiibol soolak, saymari barril takke doolât taamoomit gaba akah yassagallen.

Innaa kee, xoqoysi akah geyan innah abele. Baxsá luk kaadu a ciggilta garwa keenih diggoysele :

- (a) Kulli caddol yakke, daddas ekraarisiyyaa kee, abnisiyyat gaba yassagalleenimih gara.
- (b) Qaafiyat dacayrih ayfaafayittet culma geyaanam kee, buxah tu elle amqeh meqennah takke ekraarok xaaguuy, qakkaloysiyyaa kee ayfaafay, geyaanamih gara.
- (c) Ayyuntiinô caabih taddiiraarik missat yan xoqoysi geyaanamih gara.
- (d) Metteebanni duddot arqo haanâ gideh---alifbaatisso edde anuk, faxe qaynatih aydakaakan, madab kak lem takku,

aalle-waytam takku, geyaanam kee, gaantah edde-osáh ayfaafay, geyaanamih gara.

- (e) Is-catâ hortittee kee, taamah eglali maasoysak gexsitaanam kee, tan taamoomit culek, isinni taamoomi hadle, yakkeenimih gara.
- (f) Gaantootih angoyyittek, faxe tiyat yangaleenimih gara.
- (g) Buqreh maggoysitiyyih ayfaafayaay, qadaagisiyyaa kee, bica-le metteebannih xoqoysimá yakkeenimih gara. Kalah kaadu, ardi geytooy, barri maysaasaa kee, nookô taddiiraarit, geeri mari lem, le xoqoysimá, yakkeenimih gara.
- (h) Meqe manoh caalootay ruffu edde yaanah gara; axcaxcih buxaay, nazafataay, kooraan kee, meqe leey, wadbaa kee angaarawitteh gara.

## **EXXÁ IV**

### **15<sup>haytô</sup> Maasayya**

1. A sittin-geyit tan baaxooxa, saymari, madqâ focial, labhá le gar akah yaallê nah abele.
2. A sittin-geyit tan baaxooxa, gabqasiinô caagiidal, saymari madqinan duddoo kee, tet abnissol, labhá leh tanim akah yaallen innah abele. Axcaxcih , labha leh tan garwa, keenih antacawwele kontraatittee kee, isinni ikoytah xiinissoh ,kalah kaadu mablô caxaa kee mackamatittê gexsital, labhá eelli hayta gar aalle lon.
3. A sittin-geyit tan baaxooxa kontraatittee kee, geeri madqat axawah tan hittin-geytootay, saymarak madqinán duddo deberta, foyya akah takke nah, abele.
4. A sittin-geyit tan baaxooxá, labhaa kee sayyoh inkigid takke garwaa aaxigele; sinam, baaxok irok/addah abta angoyyittee kee, guubuh elle gacan rike, currik dooritoonu duudaanamih gar wagsiisak.

## **16<sup>haytô</sup> Maasayya**

1. A sittin-geyit tan baaxooxa, faxximmita maaqatteeti inkih beele, saymarat nado baxisak yakke lagô-baxsa bayissuh; kulli caagiiday rihim kee buxat axawah enewwitah iyyal. Labhaa kee sayyoh, inkigid-akkiyyih rakiibol soolak, a ciggilta garwa diggoysele.

- (a). Digiban waqdi inkigid yakke, qasaalâ gara
- (b). Qasaalâ currik dooritaanam kee , digibit le fayxii kee raabitik culaanamih gara.
- (c). Digib kee cabtil, inkigid takke garwaa kee, qaaqá yaalleenimi.
- (d). Xaltania, kinnuk, urrut yafkunil inkigid takke garwaa kee, qaaqá lon. Faxe migdaa kee caddol, giffa luk tambulleem urri maslacata.
- (e). Xaltani , urruk xalaanah gidee kee , yaabuke urrih fanat haa baxxol inkigid yakke gar kee qaaqá lon.

Too garat xoqoysimoonuh faxximta barittooy, xaaguu kee cogdá geyaanamah, inkigid yakke gar lon.

- (f). Urru aynabiyyaay , amo-wagtiyyaay, amaanatah sagsiyyaa kee, xalaayah-loowitiyyal inkih, saynum kee labnum, inkigid yakke gar le.

Tohim madqal elle tamixxige xisoosah caddol tenek kaadu tonna. Faxennal daga raqтам urri maslacata.

- (g). Baqlaa kee barrá, buxah migaaqih doorooy, mehrat kee taamâ meexol inkigid yakke gar le.



- (h). Baqlaa kee barrá, inkigid yakke gar lon ikoytá aalliyyaay, geyiyya, makkisiyyaay, xiinisiyyaay, xoqoysimiyyaa kee geeri marat tabsiyyal inkih – cindah takku, maaluh takku.
2. Qunxa numih fayxii kee digib madqâ foocal arac mali. Digib isissikkiyek, edde akkeh meqe qumri madaqah mudduumam faxximta. Yakke waqdi kaadu, mamaxxaqa-le maysaqarooril kutbeh gamax faxximta.

## **EXXÁ V**

### **17<sup>haytô</sup> Maasayya**

1. A sittin-geyik saymarat nado baxisak yakke lagô-baxsa bayissa komitey, kaak abnisso kusaqissaah, agaaradda soolele----ahak wadiril komite deqsittu waytah iyya. Hittin – gey aracet gaca waqdi, komiteh aydoytiitik ixxi 18 akkele. Takkay immay a sittin-gey oggolte baaxooxah ixxi 35 yaafe wak, ixxi teetik 23 akkele. Too mari kaxxa migaq gexxoo kee, assakat le mara yakkeenimik fulah ,ken kah muggaaqisen taama nagay yaaxigeeh; yasmite mara yakkeenim faxxiimele. Too adoytit, a sittin-gey oggolte baaxooxah xayloh fanak doorimele. Taamaay, ababah hinnay, isinni amakkaqub abelon. Ken dooran waqdiiy, jograafi rakaakayitteey, baxaabaxsa-le bisô-maxcoocaa kee, madqooqi cisbatat haak doorime lon.
2. Komiteh aydoytit, a sittin-gey oggolte baaxooxa rubtah tan liisaleelâ fanak, cuumit yaceen anayal doorimele woo baaxooxak kulli tiya, isi xaylô fanak inki liisaleh galab xagtu dudda.
3. Naharsi dooro, sittin-gey aracet gaceek wadir lecalsih lakal akkele. Ummaan doorak , daggowwutek sidiicalsak naharat, Galli-Marok kaxxa Cummi Mabbaxi, badoytiitih tan baaxooxah, jawaab aktube le , nammalsih addat isinni

liisaleelá, muggaaqisa yaanamah.Kaxxa Cummi Mabbaxi alifbaatissô yaakumik ciggiilil, yescessen migaagiyooowak listi massossu heeh, ken muggaaqiseh tan baaxooxa edde haak, a sittin gey oggolte baaxooxah tabisele.

4. Komiteh adoytit elle doorimu-waam, sittin–geyit tan baaxooxa elle geytimta daffeynay , Kaxxa Cuumi Mabbaxi miraacisak; Galli-Maroh salalal takkeh iyya. Too daffeynay, daffeynâ-kibó kak, adoytiitik namma-sadoctah geytimiyyal kibbimtal, komiteh adoytiitih doorimtu-waytam, anayak kaxxa ixxu geya mara. Kalah kaadu , adoytiitih tan baaxooxa awakkaluk yemeeteeh, anay yacayu duuda marak, kaxxa mangaba geya mara.
5. Komiteh adoytit affara liggidah doorima. Takkay ikkal, woo doorime komiteh adoytiitik sagaál wakti nammá liggidal elle gaba kala.Naharsi dooro gaba kalteek lakal, woo sagaalih migooqa woo waqdiik komité saqal qidah yan saami caxxal yamixxige.
6. Komiteh adoytiitik ossantani konooyih dooro a maasayyah lanittek 2,3 kee 4<sup>ik</sup> gexak akkele; soddom kee konooyhaytô baaxo sittingey oggolta waqdi. Woo koona adoytiitik nammáy, uddur, namma liggidak wadir gaba kala. Ken nammayih migaq komité saqal qidah yan saami caaxal yamixxige.
7. Komiteh adoytiitit, fakimit tan foxo tewqek, woo foxo caba numih baaxo, kay aftok num muggaaqissa. Takkay immay, woo num woo foxot elle gacam komite kaah faatacissa waqdi.
8. A komiteh adoytit abtah tan qilsi taamoomi cisbatat haak Kaxxa Kobox faaticisa lakqo , Galli-Maroh kadnak, usuk elle yascassênal, komiteh ayydoytiitih assenti akah meklimannah abele.
9. Komite, ta sittin-geyil teetil tontocowweh tan qaaqak elle faxximtâ nal tawaquh,Galli-Marok Kaxxa Cuumi Mabbaxi, sahdayti caylaa kee massoyna qaxa keenik aynaaqal

## **18<sup>haytô</sup> Maasayya**

1. A sittin-geyit tan baaxooxa, Galli-Marok Kaxxa Cummi Mabbaxih gitaak, komite tabaluh, rubta gabbaaqu aallele. Too gabbaaqi, baaxooxa, a sittin-geyih aracat gaciyah, madqinanaay, mackmataay xiinissoo kee, geeri migdittel abteh tanim kee, tanâ fan tekkeh tan warraysok xissimele.

Tohim:-

- (a). Caagid wagitah yan baaxo, kaa abtol asisseek wadir, inki liggidihim ruubele.
  - (b). Tohiih lakal, ummaan affara liggidal, hinnay kaadu, komite esserinnaan waqdi ruubele.
2. Woo gabbaaqitte , a sittin-geyih addal tan kol-tanitteetah abnissot garayeh yan gibdaabinaa kee, asbaab ascassele.

## **19<sup>haytô</sup> Maasayya**

1. Komite isi siiratih gexsitihi edde-xintitte bicsitele
2. Komite isi taamoomih abnisá ,namma liggidih wakith dooritele.

## **20<sup>haytô</sup> Maasayya**

1. Komite, amok-rada anee wayya haytek, liggidal, namma ayyaamak biso bee waa waktih angoorowe. Tokkel, ta sittin-geyik 18<sup>haytô</sup> maasayyak amakkaquk, xayyowteh tan gabbaaqitteh adda, cubbussa.
2. Komitê daffeynaani xefelih Galli –Marah salalal gexsitele. Kalah kaadu, komite doorittah tan bica-le aracal gexsittu duddah (aysiisenta,faatacissô caddo)

## **21<sup>haytô</sup> Maasayya**

1. Komité, Maddur kee Ayyuntinán Qakkalaysáh gitaak, Gallimarok Kaxxa koboxih gitaak abtah tan abitittek, liggidal inkadda gabbaagu ruubele. Too gabbaaqittey, a sittin-geyit tan baaxoosak geyan xaagul xissiiimak bicsanah iyyal, aban kusaaqak gexak, isinnit celtam kee, ah-aklkeh –meqe assossitte osisak ruuban. Adoytiitih tan baaxooxa wohuk kalah baxsá-lentit tablem/teellek/edde ossimak ruubumta.
2. Galli-Marok Kaxxa Cuumi Mabbaxi, komitek too gabbaaqitte, saymarak tu-edde –tan caggud wagita kommiishil tabisa.

## **22<sup>haytô</sup> Maasayya**

Baxsá-le farmooma leh tan xisoosak/massoynaani, a sittin-geyih maasayyooyik, ken wagittaamih abnisso agaaramimta waqdi, daffeynal geytimaanamih gar lon; komite isi le kabuk kaadu, ken wagittaamal, mablá xayyoosoonu ken taqzumeh.

## **EXXÁ VI**

## **23<sup>haytô</sup> Maasayya**

Labmara kee, saymarih fanal, inkigid-akkiyya, kaxxam cattaah, daabissam

- (a). A sittin-geyit tan baaxoh madqat tenek, ninnay kaadu,
- (b). Baadinan sittin-geyittee kee, xaganittey, woo baaxoh addal abtol assuh oggolimtet tenek, a sittin-geyit ma duugimta.

## **24<sup>haytô</sup> Maasayya**

Ta sittin-geyil, mamaxxaga geyteh tan garwa,aracat hoonuh, kaa oggolteeh, raabitte baaxooxa, faxximmi ittah tan maaqattooti inkih beytuh, xagana culteh tan.

## **25<sup>haytô</sup> Maasayya**

1. A sittin-gey, kulli baaxo elle tafarramuh faximti yan,
2. Galli-Marok Kaxxa Cuumi Mabbaxi, a sittin-geyitte, kay garil daffeytuh, muggaqsimah yan.
3. Kuuli baaxo, a sittin-gey faatacissam le. Faatacsimteemih diggoysó, Galli-Marok, Kaxxa Cuumi Mabbaxah xayyowtám faxximta.
4. A sittin-gey, taamal asek lakal takke way, faxe baaxo kaa oggoltuh, fakimit yan. Oggol geyaah, aracat gacamaay, Galli-Marok Kaxxa Cuumi Mabbaxi garil yan silaacat xoqoysiman waka.

## **26<sup>haytô</sup> Maasayya**

1. A sittin-geyit qagitnah yaanamih essero, faxe baaxo, faxe wakti xayyossu duddah immay, Galli-Marok Kaxxa Cuumi Mabbaxah, essero kutbeh xayyossam le.
2. Galli-Marok Kaxxa Cuumi Mabbaxi woo esserol gacisuh, beyam faxximta maaqattootit/tenek/acsabuk argiqele.

## **27<sup>haytô</sup> Maasayya**

1. Faatacissok, hinnay kaadu , sittin-geyik oggól sanaday, 20<sup>haytu</sup> deqsitah iyya, Galli-marok Kaxxa Cuumi Mabbaxah edde xayyoowe ayrok, 30<sup>heele</sup> ayrook lakal, aracat gacem deqsita.
2. Faatacissok/oggolih sanaday 20<sup>haytu</sup> deqsitah iyya,xayyooweek lakal 30<sup>heele</sup> ayyro, kaa oggolte baaxooxal kaadu aracat gacem deqsita.

## **28<sup>haytô</sup> Maasayya**

1. Oggol sanad faatacisan waqdi, baaxooxa teelleh tan bagwaytitte tenek, Galli –Marok Kaxxa Cuumi Mabbaxi, too bagi-wayitteh korraqitte adoytiitih tan baaxooxah inkih tabisa.
2. A sittin-geyih qalaamaa kee madma sado bagi-way tekkekiy, oggal ma geya,
3. Faxe waqdi, bagi-waya axcuk xayyoyseenimik raaqoonu duudanah, immay, kutbeh Galli-Marok Kaxxa Cuumi Mabbaxah xayyoosaanam faxximta. Usuk, woo bagi-wayak raaqeenim, adoytiitih tan baaxooxa inkih yaysixxige. Tonnaah tan bagi-wayittek aban raq, Kaxxa Cuumi Mabbaxah edde xayyoowe ayrok xabba haanam, aracat gocem deqsita.

## **29<sup>haytô</sup> Maasayya**

1. A sittin-geyit tan baaxooxak nammay takku, hinnay, kaadu wohuk biso takku, kay maqnissoo kee abnissol, ken fanih walalal yanfaddagu duude wee sittin-way maacisek, keenik tiyak teyná, ni fan-wagitah xayyossu duddah. Woo ni-fan-wagitah essero , malakmisâ cokmih edde xayyowte waktik, lecalsih addat, xayyosse exxaaxi sitta gee waytek, keenik tiyak teyna, sittin-way, baadinan Qadaalat Mackamatah xayyossu duddah.
2. A sittin-geyit tan baaxooxak faxe tiyá, kaa faatacisaanaah, oggolan waqdi, a maasayyah ,lanik 1<sup>hayto</sup> yoo ma tubta axcuk qaddossek, geeri baaxooxa, toh qaddosse baaxoh,a maasayya wagittaamal ma gulbimta.
3. Faxe baaxo a maasayyak lanik 2<sup>haytol</sup> edde-maani warsitteh iyya, Galli–Marok Kaxxa Cuumi Mabbaxah aysaxxaguk, woo cinat aduureh yaanam, faxe waqdi ittu duddah,

## **30<sup>haytô</sup> Maasayya**

Ta sittin-gey Qarabiiy, Ingliiziiy, Faransaawiiy, Chaayinaay, Ruusiyaa kee Asbaaniyah afittet inkih gaceemih sabbatah, faxe afat yanay, kutbe kaak inkigid takkeeh, inkih nihir le.

Tohii diggoysiyyah, migooqa ahak gubal akak geytimtaah, fermá haanamih duddo akah tontocwweh tan mari, issin fermal,a sittin-gey faataciseh yan.

#### **4. Erginná le Marih Garwah Sittin-Geyi.**

##### **Culmeyná**

##### **Ta Sittin-geyit tan Baaxooxa**

- (a). Galli-Maroh charteril baxxaqimte radmoomay, sahdaytuk xagarat tan konnabnaay, keenik baxsime sinniih, inkigid-akkiyyi garwah mamaxxagá taceeh iyya; curriyyataay, qadaalat kee, baád wagarik rakiibo kinnim kassitak,
- (b). Galli-Maroh sahdaytinan Garwak Baadinan Baxxaqsoo kee, sahdaytinan Garwak Baadinan Sittin-geyittel, hitta elle geyteeh, akah baxxaqissê nah, kulli num, tokkel galab kak xaggiime curriyyatittee kee, garwa inkih geyam lem aaxaguk,
- (c). Sahdaytinnô garwaa kee, rakiibô curriyyatitteh baadinanaay, hittak-baxsime-waytiiy, sittal–keltooy kee, hittat-axawah-aniyya cisbatat haak, erginná le mari, too garwaa kee rakiibô curriyyatitteh, hebelto baxsá maleh xagoysimam kee, ruffu edde yam faxximtam qagam qagitak diggoysak,
- (d). Madduruuy, Ayyuntinan kee, Qaadâ Garwah Baadinan Sittin-geyiy, Gabqasinan kee, Siyaasak Garwah Baadinan Sittin-geyiy, kulli Qaynatih lagô-baxsih Baysih Sittin-geyiy, Saymaral Nadok Ugutak takke Xukkoh Baysih Baadinan Sittin-geyiy, Qazaab kee geeri Racmattâ-sinni Digaalâ Saduh yekke Sittin-geyiy, Urri Garwah Sittin-gey kee, Dabbô tan, Taama- abaa kee, ken Buxaaxih maritteetah Garwah Dacayrih Baadinan Sittin-gey yanim kassitak,
- (e). Erginná caalih dadalta fikrata. Is akak taabukem, rike edde tan maritteeta, geeri marâ luk, missa taallu duude waytam kinnim, aaxaguk,



- (f). Erginna-leeak xoqoysimiyyi saami giffi hoonuh, agataay, rakaakay kee, baád caddol polisitteey, ekraarooraa, taddiiraarii kee, abtoota yaysixxigenimiiy, geerimil korsaanam kee agaaraadanamal qilsa-le Baadak Abittô Taddiira (World Program of Action), kalah kaadu erginna-lek xoqoysimiyyi saami giffi hoonuh yewqeh yan, tamsissoh edde-xintih addal (Standard Rules on the Equalization of Opportunittes for Persons with Disabilities) geytimta radmoomaa kee, polisih ascossitte xoqoysik lem aaxaguk,
- (g). Erginná-leelâ caagiida, raag-le daddoosuk baxsá sinni xagarah loowak gexsiisaanam, xoqogsik leemih kaxxul, taqqa axcuk,
- (h). Erginnâ sabbatah numut aban lagô-baxsi, sahdayi ,leh yan konnabaa kee, nihirit aban taturuh gexam aaxaguk,
- (i). Wohuk bisol kaadu, erginná-leelá mango qaynatah tanim aaxaguk
- (j). Erginná-leelah inkih, sahdaytinan garwa baxcisaanaah,dacrisaanam----kaxxa caddol akah faxximta mari edde anuk, kaxxa kaxxu lem kinnim aaxaguk,
- (k). Mango gurral keenih iyyaanaah, abaanam tan way, erginná-leelat, baadak maggo baaxooxal, yakkeh yan ceele-waynaani, uxih soole-weeh gexot yanim, kaxxam sinam tacsubusem kinnim cedak,
- (i). Kulli baaxol axcaxcih dadalat tan baaxooxal, erginná-leela edde geytimta caaloota yaysiisoonuh, baád baaxooxah tittacatiyyi, xoqoysik lem aaxaguk,
- (m). Erginná-leelá isinni gaantootih nagaytaniinoo kee maggo qaynatak aniyyah abteeh,abtu-wayta nihir-le gabah assagolla cisbatat haak, le sahdaytinan garwaa kee, curriyyatitte, keenih dacrisaanam, wohuuk yayse xalu akah yaceen innah abaanam kinnuk, usun kaadu, woh ayyunti, ken loowitaah, maddur kee

ayyuntinan dadalay, tû dagiinaa kee baaca edde baysaanah, gabah—assaagollah, ken faxam edde cedan gexsit kinnim aaxaguk,

- (n). Isinnih faxaanamih dooro edde anuk, erginná-leelá isi curriyyat kee amô-baxxaqqa lem, kaxxuk leh gide aaxaguk,
- (o). Ken wagitta caagiida edde anuk, erginná –leela, polisii kee taddiiraari bicih gexsitit anbad-le gabah-assagalla yaalleenim faxximtam cisbatat haak,
- (p). Erginnál-leelá, lagô-baxsal keenit yakkeh yakeh yan gibdaabinak gexxaamah, edde yanin caaloota abaluk. Too lagô-baxsay samadaay, bisuuy, nadooy, afaay, diiniiy, siyaasaay, hinnay mablaay, agataay, agattinaay, hinnay kaadu, kak yanin raceenaaniiy, ikooy, ubkaay, qumrii kee geeri caddoodal yakke, kaxxam sinam cisabbossam kinnim cedak,
- (q). Agabuu kee urruy erginná-leh iyya, dabqi addaa kee, irol inkih, keenil gufta cayli maaqattooti gexak, kaxxa osoduy, baaqid-sinnaa kee, dahni keenih acee-waytik, xabba haanamaay, ilaa xaqaral raaqa,daleelaa kee, umaanet kaffa yaanam yani, keenil oobisah yanim aaxaguk,
- (r). Erginná le urri, aalle-waa urri sahdaytiinô garwaa kee, rakiibô curriyyatittek eelli haam inkih, yaallem faxximtaamal aamanuk;kalah kaadu, a sittin-geyit tan baaxooxa, urri garwah assakoxxah xagana culteh tanim kassitak,
- (s). Sahdaytiinô garwaa kee, rakiibô curriyyatitteh abnisso, elle faxximmi intâ nal, daabisoonuh yakke macalat, sáy nadoh imih, kaxxa dahni yaceenimit taqqa axcuk,
- (t). Erginná-leelak mango gaba, tû-dagiinah addat taniimih numma, giffi haak, too tattabal ceyá, erginná, le maral bahtam cedakaay, wohim sissikuk keenik kattam faxximtaamal aamanuk,

- (u). Galli-Maroh charteril daffeytah tan madmoomi kee, radmoomih faxxiima assakoxxa abak, wagarii kee saay caalootaa kee, wohul luk gexsitta madqooqih abinssoh kaxxa dahni acayuk, axcaxcih bood silác caddol elle yakke baaxooxaa kee, caylat yibbixen baaxooxah addal , erginná leelah, kaxxa dacayri abaanam faxximtam cedak,
- (v). Erginná-leelá , inkih tan sahdaytinan garwaa kee, rakiibô curriyyatittet ruffa axcuk xoqoysimtam keeh, duyyeey, ayyuntiinooy, maddur kee qaadâ deraafiiy, qaafiyataay, barittooy, xaaguu kee angaarawat inkih, gita lem faxximtaamal aamanuk,
- (w). Sahdayti, numtin-amol, geeri maraa kee, akah yaabukeh yan gaanta , yassakaxxeemih dirki kaal tanim cedakaay, sahdaytinan garway baadinan mamaxxaga geyteh tanil(International bill of Humanu Rights) aracet gactuh macalam faxximtam aaxaguk,
- (x). Buxá ayyuntak ginoo kee rakiibô horta kinnim kasak, is, ayyuntaa kee doolatak inkih, dacayri geytam faxximta. Erginná le maraa kee , ken buxaaxih mara, catoo kee dacayrik aki buxaaxi geyyi haytam inkih geyaanam faxximtam aaxaguk,
- (y). Erginná-leelâ garwaa kee, konnaba baxcisonuu kee dacrisoonuh addal-leeh, baxsime sinni baadinan sittingeyiy, erginná-le marih gibdaabinay, adda xeer, massossuh, dadalte baaxooxaa kee, dadalat baaxooxal inkih, gabqasiinooy, siyaasaay, madduruuy, ayyuntinan kee qaadâ migdittel, inkigid yakke saami geytam, ken gabah assagollih baxaccach kaxxam xiqe leemil aamanuk, ahaak gubal taniimil, sittin-gey yekke.

## **1<sup>haytô</sup> Maasayya - Qalaamá**

A sittin-geyik qaalaama, erginná-leelah, kulli mari leh yan, sahdaytinán garwaa kee, rakiibô curriyyatitte, warraysaanaah, dacrisaanaah, diggoysonama.

Erginná-leelá, xefelih kak yaanam , xagaraay, misinkicaay, kasaay, hinnay kaadu, kooná qaafiyatak rike edde tambulleeh, rika caba mara. Tohim, kulliimi dudda akak le marâ luk aban garay kee, angaarawat adaf akkuk, ayyunti addal, ken ceelo akke keenit kaltaama.

## **2<sup>haytô</sup> Maasayya - Maqnissó**

Ta sittin-geyih sabbatah

“ Angaaraw” afitteey, kutbê mayballaateey, inti–maleelá kutbeey astootil yakke angaarawaay, kaxxa tabqih tan kutbeey, kullî ke gufta maas-miidiyaay, wohuk kalah kutbeey, maabbaay, sahlín yaabaay, yakriye sahdaytuuy, dirribuu kee kaah tan angaarawittech qaynootaay, migdittee kee formaatittee, xaaguu kee angaaráw metteebannut axawah tani, inkih addat le.

- “ Af” arrabaa kee astootil yakke yaabaay, kalah kaadu, yab akke wayta afitehim addat le.
- “ Erginná wagsiisak yakke lagô-baxsa” yaanam siyaasaay, medduruuy, ayyuntinanaay, qaadaay, gabqasiinoo kee, geeri migdittek faxe tiyal, inkih tan sahdaytinán garwaa kee, rakiibô curriyyatitte, Erginná le mari duddal akah gee wannah , mamaxxaga akah cinaanaah, abtol akah ase waytâ nah abaanama. Toh, celtah tan bicittee, geeri qaynootâ ciná, edde anuk, umaaneenahim inkih addat le.
- Celtah tan bicitte irot cabtiy, hinnay, kaadu deberiy rikê raaqal xissiimal soolak, erginná le mari geeri mari leh yan

sahdaytinán garwaa kee, rakiibô curriyyattek, tu keenik kale kalah, celta bicitte inkih keenih abaanama.

- “Kullî kel taamita, qaadiik yan diizaayin” yaanam, baxsa lem faxxiime kal, sinam kullî kel, kulii waqdi, xalitteey, deraafiiy, taddiiraarii kee ayfaafayitteh edde xoqoysimtu dudda gurral yan bica. Woh rikê raq le mara, rikeek tanim abaanam ma sadda.

### **3<sup>haytô</sup> Maasayya - Amolladi radmooma**

A sittin-geyih radmooma a ciggiltam keeni:-

- a. Sahdaytuk xagarat tooboke konnabnaay, numtin amô curriyyataay----num isi faxam dooritam edde anuk, sinaamiyow amô-baxxaqqah assakoxxa yaalleenimi
- b. Lagol baxse-wayti yaalleenimi.
- c. Ayyuntat,dudda leeh, maqná le gabah assagollaa kee, culó yaalleenimi.
- d. Baxsá yassakaxxeenim kee, rike-raq sahdaytiinok sinam ayyaaqe-waam yaaxigeenimi
- e. Saamit xoqoysimiyih inkigid akkiyya
- f. Culmâ geyto
- g. Labmaraa kee saymarih inkigid-akkiyya
- h. Erginná le urrih duddoh dadaliyyaa kee, kinnaané dacrisiyya yassakaxxeenimi.

### **4<sup>haytô</sup> Maasayya - Amolladi koltanitteete**

1. A sittin-geyit tan baaxooxa, kulli marah----erginná-leela edde anuk,  
diggossaah, warrassam sahdaytiinô garwaa kee, rakiibo curriyyatitte, hebeltô lagô baxsa aallekal abtol asissaama.  
Tohuk gexak too baaxooxa, a ciggiltam abtol asissuh xagana culteh tan.

- a. Ta sittin-geyil mamaxxagá geyteh tan garwa abtol asissuh, faxximtaah, bica-le madqinan, xiinissoo kee, geeri acassaaleh maaqattooti beele.
  - b. Faxximtaah, bica-le maaqattooti beelem-madqinan edde anuk, uma xintootay erginná-leelat lagô baxsa abta, korissuh, massossuh, hinnay inkinnah bayissuh. Toh, madqooqiyy, edde-xintitteey, qaadoodii kee abak raagay, rikê-raq-le mara lagol-baxisak biyakta.
  - c. Erginná le marah, sahdaytinan garwa dacrissuu kee, warrassuh polisittee kee, taddiiraarih adda nagay wagit leeh, cubbusele.
  - d. Ta sittin-geyil luk gexsite wayya haytaam sooliseleeh, sadele. Sadár abbobtii kee, xisoosa tet luk akah gexsittá nah abele.
  - e. Bicá eelli hayta maaqattooti beele, erginná-leelat lagô baxsal xukkuta num, xiso , hinnay canká massoyná tenek.
  - f. Ta sittin-geyik 2<sup>haytô</sup> maasayya elle tascassê nak amakkaquk, erginna-leelah sahlin abnisso leeh, dagoo mawqo(lakqok) esserta duyeyya kee, affaafayitte, garuq malih xayyoysese, cubbussoo kee dadal migditte, acussulele. Toh inki waqdih hinnay, raag kah taallennah abele.
  - g. Qusba metteebannuy,xaaguu kee angaarawaay, angoyyittee kee catoh aalootay (devices) , erginná leelah bictay, naharsiino, dago lakqoh taniimih kak yaceeni, akah geytimtá nee kee , teetit akah xoqoysiman inni, aysuk kah yaysennah cubbusoo kee, goran abele.
  - h. Erginná leelá kulliimik xaagu akah geytannah, axcaxcih angoyyittê catooy, aalootaay, edde cattimaan metteebonnuy qusba. Wohuk kalah kaadu, geeri catooy, qeege kaliyyi ayffaafay kee, bicitte aracet heele.
  - i. Mehrat-leelaa kee, taamita maray erginná leelá catah inkih, aydakaakan warraysak warraysele. Toh kah abelem , rikê-raq le mari a sittin-geyil enewwita garwat inkih xoqoysimaah, woo garwa caabissa ayfaafayitte inkih kah geyan innah.
2. Madduruuy, ayyuntinán kee qaada garwa wagittaamal, a sittin-geyit tan

baaxooxa, tet arqo duddak leemil, faxxiimak maacissek kaadu, baadinaan duddo edde asgalluk , ta garwak irot tu kak raaqe wayte abnisso , aracat heele. Tohim ta sittin-geyih addal tan koltanitteeta baadinán madqal, woo waqdiik taamal assam faxximtah iyyak, hebeltohim uma intit ablekal, hinnay cabekal,abtol asisele yaanama.

3. A sittin-gey abtol asissuh tayyaaqeh tan edde-xintittee kee polisitteh  
bicaa kee abnissot, kalah kaadu, erginná-leelá wagitta caaggiidal margaqooqi tatrusaanam faxan waqdii , a sittin-geyit tan baaxooxa,erginná-leela anbad-le gabah assagolla akah edde taallannah abele. Urru yekkeenikiyy, ken taynabe wakiilitteh gitaak akkele, woo qakkaloysa.
4. A sittin-geyih addal taniimik , hebeltoh imiy, erginna-leelah meqeeh,  
taguude madqooqi, baaxô madqal tanu, hinnay kaadu baadinan madqay woo baaxol abtol assah iyya tanu, sadda ma tana.  
Sababah a sittin-gey, sahdaytinan garwaa kee, rakiibô curriyyatitteh mamaxxaqa ma yacaa axcek, yaceeh immay deberah axcek, hinnay kaadu nabam addah tan caddol, yacee axcuk, baaxo isi addal aallek, baadinan imiy tet addal taamitta akke takê may, faxe madqay,  
sittin-geyil ahat deberimta, ma tana.
5. A sittin-gey, hebeltô ximmo kaak raaqe kal, hinnay kaadu baxsá aalle  
kal, federal doolatiitkeh addal elle yanê nal taamita.

### **5<sup>haytô</sup> Maasayya - Inkigid-akkiyyaa kee, lagô baxsá maliino**

1. A sittin-geyit tan baaxooxa, sinam inkih madqâ foocaa kee, tet gubal inkigid takkeeh, hebeltô lagô baxsa maleh, inkigid takke dacayrii kee, xaqoysi teetik geytam faxximta.
2. A sittin-geyit tan baaxooxa, faxe qaynatih lagô baxsay, erginná loonu axcuk sinaamat yakke kalaata abele.

Erginna le marai , geeri mari eelli haa, madqâ dacayri, akah geyan innah abele, faxe qaynatih lagô baxsak.

3. Inkigid-akkiyya bisoh warraysoonuu kee lagô baxsa baysoonuh, a sittin-geyit tan baaxooxa, faxximmi inta maaqattooti inkih beele, celta bicitte keenih geysissam keeh.
4. Erginná-leelah, nummah inkigid-akkiyyay faxxiimah iyya yaysassa-koonu beyan baxsa le maaqattooti, a sittin-geyil faxximtaamah tambulleemî kal, asqassi hinna.

### **6<sup>haytô</sup> Maasayya - Erginná-le sayyo**

1. A sittin-geyti tan baaxooxa, erginná-le agabuu kee, sáy urrut mango qaynatih lagô baxsi yakkem taaxigeeh, wohuk gexak usun inkih tan sahdaytinan garwaa kee, rakiibô curriyyatitte, dudda luk kah geyan innah, faxximta maaqattooti beele.
2. A sittin-geyti tan baaxooxa celtaah, bica-le maaqattooti inkih beele, saymari, dudda-le dadalaay, bisô warray kee, arqo geyâ gideh. Toh akah akkelem, saymari, a sittin-geyih addal tan sahdaytinan garwaa kee, rakiibô curriyyatitte tamsiisituu kee ruffu edde iyyâ gide.

### **7<sup>haytô</sup> Maasayya - Erginná-le urru**

1. A sittin-geyti tan baaxooxa, faxximmi intah tan maaqattooti inkih beele, erginná-le urri, geeri urrih innah, sahdaytinán garwaa kee rakiibô curriyyatitte keenih tassakaxxime gideh.
2. Erginná-le urru wagitti haytaamal inkih , awkak/awkáh tayse maslacet lem naharsiino aallele.
3. A sittin-geyti tan baaxooxa, erginná-le urri ken wagitta caagiidal inkih, isinni mablá yaceenimih gar keenih diggoysele. Ken mablaa, ken qumrii kee gufiyyat axawah gacak, geeri urri eelli haam inkih aalle lon.



Tohim diggowtâ gideh, celtá rikê-râq xiboh catoy, qumrit axawah tani, geelon.

## **8<sup>haytô</sup> Maasayya - Anbád fayya**

1. A sittin-geyit tan baaxooxa, sissikuk, diggaluk, ceelak a ciggilta maaqattooti beytam isil teexegeh tan.
  - a. Erginná-le mara wagsiisak, buxaa kee ayyunti addal inkih, fayya-le anbad akah gacannah abaanam kee, ken konnabnaa kee garwa, akah tassakaxximê nah abaanama.
  - b. Manok kulli migdal-----nadoo kee qumri edde anuk, sugteeh, uxxi kinni way, ragidiik baye wayte, uma mablaa kee buraay, texce-texcee kee, uma qaadoodit carbi abaanama.
  - c. Erginná-leelâ duddoo kee xiqto wagsiisak anbad warraysaanama.

### **Ta madmah maaqattooti addat lem:**

- a. Maqar-le sadár anbadih kambaayat ugutaanaah , gexsaanama.
  - i. Erginna le marih garwah ayti yaceenimi.
  - ii. Erginná-leelahim meqe intit yableenim, kee ken assakoxxa aytikumusaanama.
  - iii. Erginná-leelâ leh tan cirfataay, xiqtoo kee duddo, taamah aroocal takku, xooquh-xiinâ qadaagal takku, anbad le cediyya akah geytannah, abaanama.
- b. Tû-barittô gexsitit kulli caddoll yan urruu yalaaqá edde anuk, erginná-le urrih assakoxxi, dadalak kah dadalâ nah abaanama.
- c. Kulli miidiyal, erginná-leelâ, ta sittin-gey elle yablennal xayyoysaanaah, aytikumusaanama.

- d. Erginná-leelaa kee, ken garwa wagsiisak, anbád aysabaxiyiy aydakaakan kee, taddiiraari gexsaanama.

## **9<sup>haytô</sup> Maasayya - Culmâ geyto**

1. Erginná-leelá, kulli migdal isinni duudak, kah gexsitan innah, a sittin-geyit tan baaxooxa, usun kulli marâ luk inkigid-akkiyyal xissiima, gidíd – deraafiiy wadbaay, xaaguu kee angaarawal; magaalol kee barril,shaqbih fakimut tan xaagittee kee, angaarawitteh metteebannuu kee siiratittet, geeri mari lem yaalleenê gideh, celta maaqattooti beele. Ta maaqattootiy, culmâ geytot akke-kalaa kee adaf takkeh tanim elle yaaxigen innaa kee baysan inni:
  - a. Xisneenaay, gitittee, wadbaa kee geeri, iroo kee addâ bicittee, barittô buxaaxiiy, dabqiiy, dayli caaggiidaa kee, taamoomih arooca addat le.
  - b. Xaaguuy, angaarawittee kee, geeri ayyaafayittee, elektrooniik kee amok-radah ayfaafayitte addat le.
2. A sittin-geyit tan baaxooxa,kalah kaadu celta maaqattooti,a ciggiltaamal beele.
  - a. Shaqbih tontocowweeh, kaah fakimut tan afeenaanii kee ayfaafayitteh culmâ geytoh qunxa xiqsissoosaa kee, mirracsimtitte bicissi heenih massoosaanam kee, abnisso akak kataataanama.
  - b. Shaqbih tontocowweeh, kaah fakimut tan afeenaanii kee ayfaafayitteh tacee canká xisoosa, erginnâ-leelah, culmâ edde cabtek waytam, diggoysaanama.
  - c. Erginnâ-leelah culmâ-geyto wagsiisak, maglab leelâ xagoorah aydakaakan yaceenimi.
  - d. Xisneena kee geeri bicittee sadarrah fakimut tanit ifu le qalaamoota, inti maleelah (Bireeyil)

takku, geeri marah sahlin kiriyaatii kee cediyya takkuh takraanama.

- e. Xisneenaa kee sadarah fakimut tan geeri xoqoysimitteetah culmâ geyto bicam bictuh, gita miraacisa maraay, takrayooy, aracte ixxiga le afti gacsi maraay, catoo kee angaaraw ceeloolah qaynoota xayyoosaanama.
- f. Erginná-le mari xaagi culmâ-geyto geyuh celta geeri catottaa kee, qiku keenih geysiisaanama.
- g. Erginná-le mari, qusba xaagitte kee , angaarawitteh metteebannih bicittee kee, siiratitite---interneet edde anuk, akah geyânah, cato bisoh keenih haanama.
- h. Erginná-leelah, culmâ geyto le xaaguu kee, angaaraw metteebanitteh dadalay, murtiy, baxacca,waqlal elle bisoh haanama, woo metteebanittee kee siiratiite, dago lakqoh geytimtuh.

## **10 <sup>haytô</sup> Maasayya- Manô gara**

A sittin-geyit tan baaxooxa, qagaaqagitak diggossa, sahdayti manol yanim faxximtaamih garay ginok leh iyya. Ergináleelá, too gar, geeri mari akah eelli haannah lem diggossa kaadu.

## **11 <sup>haytô</sup> Maasayya - Osod caalootaa kee amok-radah takke sahdaytinán catotta.**

A sittin-geyit tan baaxooxa, isil tanih tan koltanitteetay, baadinán madqá (sahdaytinán baadinan madqaa kee, sahdaytinán garwak baadinan madqa edde anuk) ken kah dirkissak amakkaquk, faxximmi intah tan maaqattooti inkih beele, erginná-leeh dacayrii kee nagaytaniino akah dacrisesh meqe marak, ,osod caalootah waktiy-----silác booduuy, sahdat

amok-radah takkem kee, ginok tabbixe umaaneh gibdaabinitte edde takkeh iyya.

## **12 haytô **Maasayya** - **Madqâ foocal inkigid takke mamaxxaga****

1. A sittin-geyit tan baaxooxa, qagaaqagitak diggossa, erginnâ-leelá faxe aracal, madqâ foocal, sahdá kinnoonimih mamaxxaga lem.
2. A sittin-geyit tan baaxooxa, erginnâ-leelá madqinán duddoy kulli manô migdal geeri mari eelli haa, yaalleenimih mamaxxaga tacee.
3. A sittin-geyit tan baaxooxa celtaah, bica-le maaqattooti beele, erginnâ--leelá isi madqinan duddo tassagayye waqdi faxxa culmâ geyto keenih bictuh.
4. A sittin-geyit tan baaxooxa , madqinan duddot xoqoysimaanamat axawah haak beyan maaqattooti, sahdaytinán garwak baadinan madqá elle tascassê nal, taguudeeh, digga le kalalu taceek/waytam diggossa. Tonnah tan kalalih qaynootak madqinán kinnaanet xoqoysimaanamat axawah haak, beyan maaqattooti, kah aban numih garwaay, raabiti kee dooro tassakaxxeem kinnii axcuk; xoqoysi bood kee, ceele--waynaani xukkok nagay tanim kinnii axcuk, yasmiteenim le. Waktik ux uddurih addat, gabak , duddo le , malakmisah yan abbah gabat takkem diggoysele. Kalaluk , tannah tan maaqattooti, woo kah beyan numih garwaa kee, xoqoysi xagtak/waytam cedaanam le.
5. A maasayyal galab kak xageenimik amakkaquk, ta sittin-geyit tan baaxooxa, celtaah, bica-le maaqattooti inkih beele, erginnâ-leelá iko haysittaah, nagartaah, kalah kaadu isinni maalih caagiida lowsiisaanam kee, bankik mago geyaanamaay, iko yaysibixeenimih duddo yaalleenim keeh. Kulsa luk kaadu, erginnâ-leelak le ikoyta bukkusanam bice waytam kinnim diggoysele.

### **13<sup>haytô</sup> Maasayya - Qadaalât Culmâ - Geyto**

1. A sittin-geyit tan baaxooxa, erginnâ-leelá qadaalatâ fan, maqar-le culmeená geytam diggoysele---fokkaq kee kusâq caddooda edde anuk, missaa kee missat anee-wa gabah assagollay, siirat kee qumrí luk gexsita abbaax-le, ossitinah geyak, digga-le doori, aalle lon.
2. Erginnâ-leelá qadaalatâ fan maqar-le culmâ geyto taalluh , a sittin-geyit tan baaxooxa, qadaalât xiinissot taamitah yan marah ceelaah, bica-le aydakaakan aceele –poolis kee casbi dacayrih mari edde anuk.

### **14<sup>haytô</sup> Maasayya - Sahdayti curriyyat kee saaya**

1. A sittii-geyit tan baaxooxa, ergiinâ-leelah, geeri marâ luk, inkigid akkuk, diggossam;
  - a. Curriyyat kee saayat ruffu axcuk, xiinaanama
  - b. Erginnâ-leelak annaak madqá maliinoh, curriyyat bukkusnaanam takku dudda . Curriyyát bukko, madqâ lih gexsitta waqdi takku duddaama.  
Erginnâ rike-raaqah faxe gurral, sahdaytuk curriyyat bukkusumtu ma xiqqimta.
2. Erginnâ-leelak faxe gurralaay takkay, curriyyat bukkusimek, a sittin-geyit tan baaxooxa , geeri marih innah,sahdaytinan garwak baadinan madqá rakiibo abak, caabi kah geyan innaa kee, keenit tekkeemik, xibo kah geyan innah abaanama. Wohuk kalah kaadu, ta sittin-geyih madmoomik/radmoomah gexsit, keenih kah dacarsimâ nah, diggoysele.

### **15<sup>haytô</sup> Maasayya - Qansarissuoy, nacrur-sinnaay, binaadamiinok iroh**

**tan digaala, hinnay kaadu asqunxuyiyyak bari yakkeenimi.**

1. Faxe num qansarissooy, nacur-sinnaay, binaadamiinok iroh tan digaala akkek, hinnay kaadu burat amo-le asqunxayiyi, kaat ma yakka. Axcaxcih ,faxe numut kay raabit kee oggol edde anekal, daylaâ kee missô kusaq kinnih, kaat yakku ma duuda.
2. A sittin-geyit tan baaxooxa madqinanaay xiinissooy, cokmiy, hinnay kaadu, geeri maqar-le maaqattooti beele, erginná-leelá, geeri marâ luk ingidid akkuk, qansarissaah ,nacur-sinna leeh, binaadamiinok iroh tan digaalah diggalsime-waanâ gideh. Kaadu uma assaqunxiyyah kaa yaysuqunxeenimik tu axce le.

**16<sup>haytô</sup> Maasayya– Xukkooy, cayli maaqattaa kee xaafuk bari Yakkeenimi**

1. A sittin-geyit tan baaxooxa celtaah, bica-le maaqattooti inkih beele, madqinanal, xiinissol,ayyuntinanal ,barissoo kee geeri migdittel inkih erginná-leelá, buxak iroo kee addal, keenit takkeh tan kulli qaynatih xukkooy, cayli maaqattaa kee, xaafuk dacrissuh----nadol xissimtmam edde anuk,
2. A sittin-geyit baaxooxa bica-le maaqattooti inkih beele, kulli qaynatih xukkooy, cayli maaqattaa kee, xaafu kalaata abtah gideh, toh elle diggossu waytam,geeri imih fannat, nadoo kee qumri cisbatat hayte catoota, erginná-leelaa kee ken buxaaxih maraa kee keenih lallabo aba marah inkih abaanama----xaagu keenih yaceenim kee, xukkô caaloota elle yaaxigen innaay, elle waasan inaa kee, elle gabbaaqan innih barisso edde anuk. A sittin-geyit tan baaxooxa, dacayrih ayfaafay qumriiy, nadoo kee, erginná wagittam kinnim diggoysele.
3. Kulli qaynatih xukkooy, cayli maaqattaa kee, xaafi akke-waa gideh,a sittin-geyit tan baaxooxa, inkih tan bicittee kee taddiiraariy erginná-leelah takke, isaamoh baxxaqqa le abbatinoonah gabat, maqar-le amô-wagit akah geytannah abele.

4. A sittin-geyti tan baaxooxa, bica-le maaqattooti inikih beele, kulli qaynatih xukkooy, cayli-maaqatta kee xaafi edde yekke erginná-leelah (dacayrih ayfaafayitte edde anuk) xagaraay, maaxagaa kee misinkicah urriyyaay, angadaadaay, nammeyhaak manot daabissoo kee, ayyuntat qagitak asgalliyya, aytikumusele.  
Tonnah yan uriyyaa kee, qagitak asgalliyya aracet elle gactu duddam, num qaafiyataay, meqennaay, is-assakoxxaay, konnaba kee, amô baxxaqqa elle le deraafiy, nadoo kee qumri fayxiixah arac abtah iyya.
5. A sittin-geytit tan baaxooxa aracet heele, maqar-le madqinan kee polisittey, agabuu kee urruh dahni tacee.  
Tohut diggoyselem, erginná-leelat, takkeh tan xukkooy, cayli-maaqattaa kee xaafi tekkookah aaxagiyyaay, kusaaqisiyyaa kee, faxxiimak maacissek madqâ maaqatta beyiyya.

### **17<sup>haytô</sup> Maasayya - Numuk sahdaytiinô kibiinó dacrisaanama**

Kulli numuy erginná-le, geeri mari leh yan, xagar kee misinkicâ kibiinoh garay, assakaxxeh meqe le.

### **18<sup>haytô</sup> Maasayya - Angagoyyaa kee agattiinoh curriyyata**

1. A sittin-geytit tan baaxooxa, erginná-le marah aaxigele rikeek rikê fan gexaanamih gar. Sigoh elle gacan rikee kee, agattiino dooritaanamih garwa,geeri mari akah lennah----a ciggiltaamih diggoysiyyi edde anuk.
  - (a) Inki baaxô-baxiinu yaallu duudaah, milaagu duudaamih gar le. Woo baaxô- baxiinu annaak hinnay kaadu, erginná leh yani yaanamal, kaa bukkussam ma tana.
  - (b) Erginná loonu yaanamal, baaxô-baxiini sanad akkek , geeri kinnaanê mamaxxagâ sanad geyaanamaay, yattibixseenimiiy, teetit xoqoysimak yangayyeenimih

- abititney, immigreeshin tamsissoh innah tani, keenik waassam ma tana.
- (c) Faxe baaxo, cabeenih gexoonu duudaanah---ken baaxo edde anuk.
- (d) Annaak, hinnay kaadu, erginná rakiibo abak, isinni baaxo yaduureenimih gar, keenik waassam ma tana
2. Erginná luk yaabuke urri, yaabuken waqdilk yaysaqarrimeenih. Migaq keenih yantacawweeh, baaxô-baxiinu geyaanah. Isinni xaltani yaaxigeenim kee, keenik lallabo geyaanaih gar lon.

**19<sup>haytô</sup> Maasayya - Dibuk yanoonu duudaanam kee gaantat yangal- oonu duudaanama**

1. A sittin-geyit tan baaxooxa, erginná-leelah , geeri mari akah lennah meexo luk, gaantah addat gacoonu duudaanamih gar taaxige. Kaadu , maqar-leeh, bica-le maaqattooti beele, woo gar keenih diggossuh. Woysá, erginná-leelá gaantat tangaleeh, gabah assagolla talleemih, a cigiltam kibelee.
- (a) Erginná-leela , geeri mari akah lennah, sigoh aracaay, ankeliy, iyyâ lukuuy yaanam, currik gacak meexittam le, inki inki siiratih addat gexsitaamih dirki keenil ma tana!
- (b) Gaantat addat gacoonu duudaanamih catoo kee , teetik xiirime-woonuh edde qokkolsiman faxximtam----cankâ catoota edde anuk, buxaay, sigô aroocal inkih , gaanta edde xoqoysimta ayfaafayitte, erginná-leelá, geytam le.
- (c) Inkih yan shaqbih takke ayfaafayittee kee bicitte, erginná-leelah, inkigid akkuk tantacawwem faxximta---ken fayxiixah celta gaba acayak.

**20<sup>haytô</sup> Maasayya - Cankah angoyya**

A sittin-geyit tan baaxooxa maqar-le maaqattooti beele, erginná-leelá cankah abtah angagoyyitte, currik abtâ gideh----a cigiltam edde anuk:



- (a) .Erginná–leeleh canakah angagoyya bicam-bicsele, usun elle faxan gurraa kee waktil, lakqok elle duudan innal.
- (b) .Mekloonu duudan melleb edde anuk, erginná-leelá mexxat-le angoyyi catooy, aalatitteey, catá metteebannuu kee, nuwwi qokol kee angaaraw catâ culmâ geyto aalle lon.
- (c) .Erginná-leelaa kee , ken luk taamitta mehrat-leelah, angoyyi cirfatitteh aydakaakan yaceenimi.
- (d) .Angoyyáh edde cattiiiman silac kee, cata metteebannu bicsissa xisoosah, angoyyah faxximtam inkih, akah bicsisan innah aytikumusaanama

**21<sup>haytô</sup> Maasayya - Anxac kee, ah-yot-celtah curriyyat kee xaagi culmâ-geyi**

A sittin-geyit tan baaxooxa, bica-le maaqattooti inkih beele, erginná-leelah, anxac kee ah-yot-celtâ gár tamsissuh xaaguu kee malâ gunnusiyyaay, hirgiyyaa kee, ruubiyya, geeri marâ luk inkigid-akkiyyi rakiibol soolak, kulli qaynatih angaaraway, isinnih meexitaanah gitaak, a sittin-geyik 2<sup>haytô</sup> maasayya elle tascassê nal----a ciggiltam edde anuk.

- (a) Inkih tan gaantah axcuk ruuban xaagu, mango qaynatah tan erginná-leela, keenih yaguudey yan xayyoysiyyaa kee, metteebannut culmâ-geyto luk, le waktil elle, ossitinâ lakqo elle faxekal, yaceenimi.
- (b) Astootih afaay, "Bireeyil" ossitinaa kee, badiil angaarawaay, kaadu geeri culmâ-gey le migditteey, qaynootaa kee, formaatittey, erginná-leelá isi fayxiik qaduk abta angaarawah, edde xoqoysimta, raabitaanam kee, bicam-bicsaanam le.
- (c) Interneet edde anuk, cankâ xisoosa inkih yan ayyuntah tacee tan ayfaafay, erginná-leelah culmâ geyto leeh, kaadu xoqoysi akah geytannah abtam le.
- (d) Maas-miidiya-----interneetit xaagu tatusá edde anuk, tatrussah tan xaagut, erginná-leelá culmâ-gey kah taallennah abtaama.

- (e) Astootih afittet xoqoysimaanamih mamaxxagaa kee warrayso abaanama.

## **22<sup>haytô</sup> Maasayya - Dibuk-gactih assakoxxa**

1. Erginná-leelak faxe num, sigoh faxe aracal yanay,manok faxe gurrat yanay, usuk is caglitaamih fayxit kaak amok-radah culaanam gita maliinooy, ma faxximta. Kay dabqi, kay angaarawittet isi faxeh akke waytek, num kaak edde culam ma duuda. Isim dibuk, cagliitaamih gar leemih sabbatah.

Erginná-leela, tonnah tan fanat-raddoo kee, culiyyak madqa ken daccrissaamih, gar le.

2. A sittin-geyit tan baaxooxa, erginná-leelá, geeri mari leh yan, dubuk-gacti numtin–amol geyaanam faxximta, qaafiyat kee, angadád xaagu geytam faxximta.

## **23<sup>haytô</sup> Maasayya - Dabqii kee buxâ-mariini assakoxxa**

1. A sittin-geyit tan baaxooxa maqari-leeh,bica-le,maaqqattooti beele, erginná-leelat lagol yakkeh yan baxsa, kulli migdal bayissuh-digibiiy, buxâ-mariinuuy, xaltaniinoo kee, ramaddiinul, inkih. Tohuk gexak:-
- (a) Digibit hayte erginná-leelá, rihimoonu duudaanam kee, dabqi haysitoonu duudaanam, waxag le gar hinna, sittal digiba nammayih fayxi, edde teneek wadirillah. Tohik sabbatah, too labnum kee saynumih rihim mamaxxa akah geyannah akkele.
- (b) Erinná-leelá, xalan xayloh ixuu kee, elle xalan baxxoh margaqá, ken gabat tanim faxximta. Edde digiban qumriiy elle yandarreninnaa kee, buxâ-mariini ekraarisiyyih xaagu, geyaanam faxximta. Too garwa inkih, elle abnisoonu duudan caxxat ken haanam faxximta.

- (c) Erginná-leelá,urri edde anuk, xalxay daacoytay ginok loonu , luk raagaam faxximta.
2. A sittin-geyit tan baaxooxa, erginná-leelah garwaa kee, qaaqá diggoysak, urru yaynaboonuh, amô-wagit aboonuh, amaanata kak iyyen urrihim aboonuh, kaadu geeri tonna celtaamat asoonuh, geeri mari elli haah yanim akah yaallen inna bicam-bicsele. Takkay immay, dagal galab kak xaggimmi yeemih addat, giffu luk tambulleem, urri maslacata.
  3. A sittin-geyit tan baaxooxa , buxâ-mariini mano waggittaamal, erginná-leelá, geeri mari le gar lem,diggoysele.Too garwa abtol assuh erginná-le urru qideenih cabaanamaay, baaqid-sinnaay, isinnik baxsaanam kee yaquureenim akah raqtannah,le buxaaxih marah, waktil elle warisak, cattu-waytam isil teexegeh tan.
  4. A sittin-geyit tan baaxooxa, urri, le xaltanik le fayxi akke waytek baxsimam ma bicta. Elle bictam rasul tanih tan madqak gexak urri maslacat edde tan waqdi dibuk. Awka/awká takku, hinnay kaadu kay/tet xaltanik nammay inkih takku, hinnay kaadu tiyak teyna takku,erginná leemih , xaltanik baxsimoonu ma duudidma.
  5. A sittin-geyit tan baaxooxa, le buxa erginná-le awka/awá takkaqu tefferek, kulli macal abele, woo awkak/awká ken daalá akah taynabannah abele.Tokkel teffertimek inkih tan gaanta, akah edde ceyittâ nah abele.

## **24<sup>haytô</sup> Maasayya - Barisso**

1. A sittin-geyit tan booxooxa, erginná-leelá barittaamih gar leemih, mamaxxagá tacee. Tohut tablem a garih abnisso, hebeltô lagô-baxsa maleh, inkigid-akkiyyal, takkem faxximtaama. A sittin-geyit tan baaxooxa kullimi addat le barissô siiratay, kulli caddol yakkee kee, qumri yanim takke barittooy, a ciggiltaamat tafkuneh iyya diggoysele.

- (a) Num ginok leh yan ayqih dadal kee , konnabah leh yan is-assakoxxa bisoh haanam kee, sahdaytinan garwaa kee, rakiiboh curriyyatitth assakoxxa maqarroosaa nam faxxiimele. Toh lih sahdâ mango qaynatak aniyya yaaxigeenim le.
- (b) Erginná-leelá leh tan duddoh ayqitte, duudimmi inta caddô fan dadlisaanama----tohut xagar kee misinkica duddo edde anuk.
- (c) Erginná –le maritteeta, currik yanih yan ayyuntih addat, maqar-le gabah assagolla akah taallê nah ilsisaanama.
2. Ta gar nummaysak, a sittin-geyit tan baaxooxa:
- (a) Erginná-le maril, amolladi barissoh siiratak, erginnâ sabbatah, irot raaqam maliy, urruy erginná leh iyya, tet sabbatah cindaa kee, dirkih tan naharsi brissoo kee ciggilta barissô caddok irot raaqam mali.
- (b) Numtin-amoh esserittek celta bicitte tantacawweemi.
- (c) Erginná, le mari faxan cato geyaanama, amolladi barissoh siiratak, elle faxan innal, baritto keenih bictâ gideh.
- (d) Maqar-le numtin-amô catoh maqattooti beyaanama, dudda leh yan akkadami kee, ayyuntinán dadal lih gexsittu waytah iyya.
3. A sittin-geyit tan baaxooxa, erginná-leelá, manoo kee ayyuntinán dadalih cerfatih baritto akah abannah abak, barittot kibuk yan gabah assagolla yaalleenimi, gaantah adoytit kinnuk.
- Too aracet haytuh, sittin-geyit tan baaxooxa, bica-le maaqattooti beele, a ciggiltam edde anuk:
- (a) “Bireeyil” barittooy, badiil kutbeey, cato kee kalah tan angaaraw cogdaadiy, tamsissoo kee, xayyoosoh qaynootaay, Ah-celtaa kee, angoyyi cirfatitth baritto, bicam-bicsaanama; kaado cato kee qakkaloysiyyi ayfaafayitte aracet haanama.
- (b) Astootih afitth baritto bicam-bicsaanam kee, ayti-maleelâ gaantah afti kinnaane bisoh warraysaanama.

- (c) Sinaamah baritto diggoysaanama, axcaxcih urruy, inti sinniih, ayti sinnih , hinnay kaadu nammay inkihi sinnih, bica-le afittee kee gitittel.  
Numtih –amol meqe angaaraw geyaanam kee, meqe aroocay akkadami kee ayyuntiinô dadal leh iyyal baritaanama.
4. Ta garih aracat gacti diggossuh, a sittin-geyit tan baaxooxa, bica-le maaqattooti beele, barseenitiy,erginná le barseenit edde anuk, astootih afittel” Bireeyil” mixigwah tani baahale,mehrat-leelaa kee, kulli caddol taamita mara, barissâ gideh. Tonnah yan aydakaakan, erginnâ garci-kaloot addat aallele. Wohuk kalah ossitinaa kee, badiil qaynoota, angaaraw migdittee kee formaatitte, barissô metteeban duyeyeyay, erginná-leelá edde cataana, addat aallele.
5. A sittin-geyit tan baaxooxa, erginná-leela hebeltô lagô basxa maleh , geeri marâ luk inkigid-akkiyyal, giffita barittoo (3<sup>haytoh</sup> caddo) , mehrat aydakaanaay, kaxxamarih barittoo kee, qumri yanim aban barittol culmâ-gey akah taallennah abeleeh, diggoysele. Tohih aracat-gactih, a sittin-geyit tan baaxooxa erginná-leelah, bicittey diggossah iyya aallele.

## **25<sup>haytô</sup> Maasayya - Qaafiyata**

A sittin-geyit tan baaxooxa , erginná-leelá hebeltô lagô basxay erginnal xissiiima maleh, qaafiyatah giffita caddol yan abbaxih, gar leemih mamaxxaga tacee.

A sittin-geyit tan baaxooxa, bica-le maaqattooti inkihi beele, erginná-leelá, qaafiyat ayfaafayittet culmâ-geyiy nado cisbatat haa---qaafiyatat axawah yan angadad edde anuk, geytuh. Axcaxcih a sittin-geyit baaxooxa a ciggiltam abele:

- (a) Qaafiyat dacayrik geeri marah ontocowwu inta qaynootaa kee ixxu, cindah akkiy, mekloonu duudan mellebih akke

- takkê may, erginná-leelah , qaafiyát lallabo akkele---  
fidoh angaaraw kee, xaláy caagiidah edde anuk.
- (b) Idooola kee urruh kaxxa cubbi abak, elle faxximtannaa kee, waktil elle , erginná-leelak biyak yaaxigeenim kee, daylisaanama, erginnahim daggooowaak, keenik kah daggawtannah, ossimak kah osse-waytannah yacee ayfaafayitte maqarroysaanama. Erginnak gexxamah daylak geeri mari geyaamak biso geyaanam faxximta.
- (c) A qaafiyát ayfaafayitte duudimmitek elle yaceenim gaantal xayii arooca---barri edde anuk,yaceenim meqe.
- (d) Geerimih fanat, currik anuk, ixigal xissimik geytima raabit, sahaytinan garwah anbaadaay, konnabnaay, isi-addah xintoo kee, erginná-leelá fayxiixah aydakaakan acayuk, misinkicah adabih gexsitil qaduk yaysixigeenimi.
- (e) Qaafiyát caabii kee, manô caabih--woh madqal meqeeh, ceelá gurral elle oggoltâ kee, acwal, erginná-le marat lagô baxsi akah akke waâ nah, kataatu abele.
- (f) Erginná rakiibo abak, qaafiyát lallaboo kee, qaafiyat ayfaafayal, hinnay leek maaqot yakke lagô-baxsi gididi (ciná) kalaata abele.

## **26<sup>haytô</sup> Maasayya - Angadad kee, nammayhaak soolisso**

1. A sittin-geyit tan baaxooxa, maqar-leeh bica – le maaqattooti beele---fiqmâ cato edde anuk, erginná-leelá, amô-baxxaqqak giffita caddo akah geytannaa kee, akah ragistinna; xagar kee misinkicâ duddo, ayyuntinan kee, timixxige taamah duddoo, kee mango kulli migdat culaanam kee gabah assagolla yaalleenimil.
- Toh aracat haytuh, a sittin-geyit tan baaxooxa, massoyseleeh maqarroyseleeh, bisoh heele,kulliimi addat le angadad kee, nammayhaak soolissoh ayfaafayitte kee,

taddiiraari, axcaxcih qaafiyataay, tamsissooy, barissoo kee, ayyuntinan ayfaafayitte.

Ta ayfaafayittee kee taddiiraari.

- (a) Udurro maleh, meqe wakti elle qimbiseleeh, mango qaynatih barittoh num leh yan fayxiixaa kee, maqaral soolele.
  - (b) Gabah assagollay, gaantat angaliyyaa kee, ayyuntak kulli exxat gaciyyi le fayxil yakkeeh, erginná-leelah xayyowwuteh, le gaantah addal takkeemi-----barri deraafi edde anuk.
2. A sittin-geyit tan baaxooxa, mehret-leelaa kee, angadaadak, nammey haak soolissoh ayfaafayitteh taama abeenitih yantacawwe aydakaakanih dadal bisoh warraysele.
  3. A sittin-geyit tan baaxooxa, catoh aalootaa kee, metteebanittey erginná-le marah bicseenih iyyah geytimiyyaay, ixigaa kee, xoqoysi bisoh warraysele.

## **27<sup>haytô</sup> Maasayya - Taamaa kee taamat-hayiyya**

1. A sittin-geyit tan baaxooxa, erginná-leelá, geeri mari akah lennah, taamittaamih gar lem taaxige. Too gar addat lem, taamâ geytoy taamâ qadaagal currik meexitaanay, mano keenik elle meqeey, taamâ deraafiy fakimut taniy, kullimii kee, culmâ-gey kenik le. A sittin-geyit tan baaxooxa, dacriseleeh, warraysele taamâ garih aracat hayti---taamitan waqdi ken gee rikê-raq kee qellat edde anuk. Wohih xakabah, bica-le maaqattooti beele-madqinan maaqatta edde anu. Geerimih fanataay:
  - (a) Erginná-leelat rike-raaqah yakke lagô baxsa kalaata abele, kulli migday, xiqsissooy, kirisiyyaay, taamat hayiyya, edde gacen taamat bisoh gexiyyaay, taamat dadaliyyaa kee, amaan kee gaafiyat le taamâ caaloota, wagitah iyyal.

- (b) Erginná-leelah, geeri mari leh yan, gitat taniih, celta taamoomih garwa dacrisele.  
Too dacayri addat lem, taamah inkigid yakke saami kee , inki qaynatih taamah inkigid takke meklá, amaan kee qaafiyat le taamá caaloota, waxxaqtok/karraqto aalle waytaah, weeqá keenik ankacisak, ken xibaanaanama.
- (c) Erginná-leeláh, geeri marih leh yan taamaa kee, taamah eglaalit gacaanamih gar keenih diggoysele.
- (d) Erginná-le marah, amolladi metteebannuuy, edde gacuwaa taamoomih ascossitteh taddiiraariiy, tamsissoh ayfaafayitteey, taamá duddoo kee agiriqqi sinni aydakaakan, keenih abele.
- (e) Erginná-leelah, taamá qadaagal, taamat gaciyyi saami kee,edde gaceenik lakih dadal, bisoh keenih heele. Tohuk kalah , taamá goranaay, geyiyyaay, edde raagiyyaa kee, yewqeenik edde aduuriyyah cato keenih geelon.
- (f) Isinnih hadlan taamoomiyy, sharikatitteey, eglaali dadlisaanam kee, le kabxa qimbisitaanamih saami keenih bisoh heele.
- (g) Erginná-le mara,sadár taamoomih exxat,culusele.
- (h) Erginná-le mari, canká taamoomit akah gacannah bica-le polisittee kee, maaqattooti beele-----yeeytah abtoh taddiiraariiy, agiirisoonuh yaceen lakqoo kee geerim edde anuk,
- (i) Erginná-leelah, taamah aroocal, celtá bicitte tamcawwem diggoysele.
- (j) Erginná-leela fakimut tan taamá qadaagal, taamah abakraag akah geytannah abele.
- (k) Erginná-le marah , taamah ascossaay, nammeyhaak soolissooy, taamá ragsaa kee, yewqeenik taamah aduuriyyi taddiiraarih mattacoo, bisoh heele.
2. A sittin-geyit tan baaxooxa, erginná-leelá naqoosannu kee, naqoosanni weelo leemit akah gace waytannah abele. Wohuk kalah, geeri marâ luk inkigid-akkiyyi rakiibol



soolak, akak ma-kortaa kee, caylah absiisan taamak ken dacrisele.

## **28<sup>haytô</sup> Maasayya - Celtá manoo kee ayyuntiinô dacayri**

1. A sittin-geyit tan baaxooxa, erginná-leelaa kee, ken buxah mara celtaah, meqe manoh yaniinim faxximtaamih garah mamaxxaga aceele---tohut meqe maaqooy, sartanaay, dabqiiy , ínki aysuk tayse manô caaloota, edde anuk. Tohuk kalah bica-le maaqattooti beele, ta garih abnissoh aracet gacti dacrissuuy, bisoh warrassuh.
2. A sittin-geyit tan baaxooxa, erginná-leela ayyuntinán dacayriiy, woo dacayrit lagô baxsa maleh ruffa yoonuh lon garah mamaxxaga aceele. Tohuk kalah, woo garih aracet gaciyyih dacayrii kee, bisô warraysoh bica-elli hayta maaqattooti inkih beele; a ciggilta maaqattooti edde anuk.
  - (a) Erginná-leelá, geeri marâ luk inkigid akkuk, saytun leeh ayfaafayitte geytam diggoysele. Tohuk kalah bica-leeh, duudimta ayfaafayitteey, aalootaa kee, geeri catootay erginná faxsissah iyyat, culmâ-gey lem diggoysele.
  - (b) Erginná-leelak, axcaxcih agabuu kee, sáyurruu kee idoolay erginná-le, ayyuntinan dacayrih taddiiraarii kee, tû-dagiiná daggoyisi taddiiraarit, culmâ-gey lem diggoysele.
  - (c) Erginná-leelaa kee, ken buxaaxih maray tû-dagiini caalootat yani, doolat erginnat axawah haak tayyaaqe maalut, culmâ-gey lem diggoysele---ceelá aydakaakanaay, qakkaloysiyyaay, maaluu kee ramaqqâ lallabo edde anuk.
  - (d) Erginná-leelá, sadarak dabqi taddiiraarit culmâ-gey lem diggoysele.
  - (e) Erginná-leelá cawál-geltô xoqoyisitee kee, taddiiraarit geeri marâ luk inkigid takke culmâ-gey lem diggoysele.

## **29<sup>haytô</sup> Maasayya - Siyaasaa kee sadár manot gabah assagolla**

A sittin-geyit tan baaxooxa, erginná-leelah, siyaasâ garwaa kee, woo garwat,geeri marih innah, ruffa axcuk xoqoysimaanamih duddoh caabi, keenih akkele. Toh abtuhuuy:

- (a) Erginná leh yan mari, siyaasaa kee sadár manot geeri mari akah abannah, dudda-leeh, maqar-le, gabah assagolla aalle; isinnih takku hinnay kaadu isinnih faxak dooriten wakiilitteh gitaak---erginná-leelá doortu/doorimtu gar kee saami inkih le. Geerimih fanatay:
- i. Anay elle yaceen gexsayaay, bicittee kee duyyeeya, bicá-leeh, culmâ-gey leeh, sahlinuk edde radaanaah, xoqoysiman innal xayyoowele.
  - ii. Erginná le maritteeta , dooroo kee, sadár maca-faxxaanâ waraakit qidnel, meysisso maleh, le anay yacoonu duudaanam daccarsimele. Dooroh ooboonu, makaatibil gacoonu, sadár taamoomi, dootatak kulli caddol gexsoonuu kee , cataah , qusbá metteebannih xoqoysi elle bicinnaan rikel akah geyan innah dacrisele.
  - iii. Erginná-leelah, le fayxik ugta currik yan anxac caabiseleeh, wohim aracat gactuh,elle faxximtâ kel, ken esserol, usun dooritan num/mari waraakit-qidnel ken catu duudah.
- (b) Erginná-leelá, sadár caagiidat maqaar kee dudda luk gaba elle tasagalle deraafi, tutaan maleh,lagô baxsa maleh,geeri marâ luk, inkigid-akkiyyal bisoh warraysele. Usun sadár taamoomit abaanah yanin gabah assagolla, aytikumusele.

- i. Doolát-xagar aalle wayta, xisoosaa kee, eglaaliy, baaxok sadar kee, siyaasâ manot tafkunet gabah assagalla aalle lon. Wohuk kalah kaadu, siyaasâ xisoosah abitittee kee, xiinissot gaba assagalle lon.
- ii. Erginná-leelâ xisoosat yangaleenim kee soolisanama; erginná-leelá, baadaay agataay, rakaakay kee daqooru yawikkeleenim.

**30<sup>haytô</sup> Maasayya -Qaadaay, sabhalaalissooy ramaqqaa kee xagar-digi.**

1. A sittin-geyit tan baaxooxa , erginná-leelá, geeri marâ luk inkigid akkuk, qaadâ manot tangalu duddaamih gar leemih mamaxxagá tacee, kalah kaadu, bica-eelli haytah tan maaqattooti beele, erginná-leelá:
  - a. Culmâ-gey le formaatitset ruffa axcuk tangaleemih
  - b. Culmâ-gey le formaatittel Tv taddiiraariiy, filmitteey, ranseesaa kee, geeri qaadah abititset tangaleemih.
  - c. Qaadâ takkookah  
ayfaafayittey,ranseesaay,matcafitteey siinima-amiiy,  
kitoobâ daaswaa kee,tuurizim ayfaafayitte  
tangaleemih.
2. A sittin-geyit tan baaxooxa, bica-le maaqattooti beele, erginná-leelá isi hadliyyi duddooy, artisitiik kee misinkicah anbadiyyih duddo dadlisittuh saami geytam keeh, toh isinni xoqoysih dibuk hinnay, inkih yan ayyuntih gaddaloysiyya.
3. A sittin-geyit tan baaxooxa,baadinán madqâ luk gexsitak,misinkicah ikookah garwa,dacrisa madqooqi, erginná-leelah lagô baxsa le, akke-kala takkeemik, dacrisele.
4. Erginná-le mari, geeri marâ luk inkigid akkuk, rikeek tan catoota isinni af kee, qaadak, geyaanam faxximtaamah mamaxxaga aceele.

5. Erginná-leelá, geeri marâ luk inkigid akkuk, sabhalaalaay, ramaqqaa kee xagar-dig abitittet, gabah assagolla lem faxximtaamah abaluk, a sittin-geyit tan baaxooxa bica-le maaqoottooti beele:-
  - a. Erginná-leelá, xagar-digik giffu-le abitittek, kulli caddol, lem faxximtah tan gabah assagolla, aytikumuseleeh,bisoh warraysele.
  - b. Erginná-leelá, keenih dibuk takke, xagar-digitte kee, sabhlál abititte massossaah, dadlissaamih saami akah geytâ nah diggoysele.
  - c. Erginná-leela xagar-digiyy, sabhlal kee, tuurizim afkunnittet culmâ-gey lem diggoysele.
  - d. Erginná-le urri , geeri urrih innah digiriiy, sabhalaalaay, ramaqqaa kee xagari-dig abitittet----woo barittoh aroocal siiratata tan abititte edde anuk, gabah assagolla lem diggoysele.
  - e. Erginná-leelá, sabhalaalaay, tuuriizimiiy, ramaqqaa kee, xagar-dig abitittet yan marak ayfaafay geytam, diggoysele.

### **31<sup>haytô</sup> Maasayya - Icsaaiyyaat kee Deetah Gaaboyso**

1. A sittin-geyit tan baaxooxa, bice le xaagu gaabossam isil teexegeh  
tan----icsaaiyyaat gunán kee, deeta edde anuk.Toh kah abtam, gaabossu hayteek lakal, polisittey a sittin-geyih abnisso catta massossaah, aracata hayta gide. Ta xaagih gaaboysoo kee, abbaxih gexsay addata lem:
  - a. Erginná-leelak canká manoh cuumih dacayri diggoysonuh, deetah gaaboysoh madqá mudaanam kee, gaabowteek lakal,cuumi akak dacrisaanam diggoysele.
  - b. Icsaaiyyaát gaaboysoo kee, xoqoysih gexsayat baada raabit kee, oggol le sahdayiinô garwaa kee, rakiibo

- curriyyatitteey, yalmeydabi radmooma daccarsimtam diggoysele.
2. A maasayya rakiibo abak gaaboweh yan xaagi, bica elle lennal baxaceleeh, a sittin-geyil, baaxooxal tanih tan maktortaatih abnissoh agarad, catele. Erginná-leeláh garwa asgoyya abta waqdi, teetih garaytah tan dugaagih kinnaané kee, sugmenta ascassele.
  3. A sittin-geyit tan baaxooxa, a icsaaíyyaatih baxcissoh gaga- beleeh,erginná-leelaa kee geeri mara, culmâ-geyto edde lem diggoysele.

### **32<sup>haytô</sup> Maasayya – Baadinan Cattiimiyya**

1. A sittin-geyit tan baaxooxa, baadinán cattiimiyyaa kee, kay bisoh hayiyyi, a sittin-geyih qaalaamaa kee, madmoomih abnissoh, agát caddol yakkeh yan macalah xiqaamah, kaxxu-le mamaxxaga tacee.Geeri tattabak kaadu bica-leeh, maqar-le maaqattooti beele, baaxooxâ fanal, qaadá wagittah tan baadinan kee, rakaakáy massoynaanii kee, gabqasah ayyuntâ luk gacak; axcaxcih erginná le mari xisoosâ luk gacak. Too maaqattooti, geerimih fanat a ciggiltam addat taallu dudda.
  - a. Baadinan cattiimiyyi, baadinan dadalih taddiiraari edde anuk, erginná-leelah culmâ-gey lem diggoysele.
  - b. Duddô-xisné bicam bicseleeh, catele—xaagi tabaatabsaay, abak-raagitteey, aydakaakán taddiiraarii kee, tayseh tan abtoota sittat tabsaanam edde anuk.
  - c. Gunanah yakke cattiimiyyaa kee missok metteebaanah ixsigat culmâ-gey bicam-bicsele.
  - d. Metteebannuu kee maddur cato , bica elle lennal acayuk, cattaah, culmâ-gey le metteebanitte, sittâ lih, akah yaallen innah abele.

2. Ta maasayya edde yabtam, hebeltô weeqaa kee dareemu mali, a sittin-geyit tan baaxo, isi ma-kortaatiy, a sittin-geyih addal tani, abtol asissaamah (kibtaamah)

### **33<sup>haytô</sup> Maasayya – Agat abnissoo kee Amô-wagiti**

1. A sittin-geyit tan baaxooxa, leh tan xisnê siiratak amakkaquk, ta sittin-geyih abnisso wagitta caagiidah, inki num akkiyy, wohuk biso akke takke may, sinam muggaaqisele. Kalah kaadu, baxaabaxsa lexxaaxii kee, caddoodal, sittat-culah tan taamoomih bicam-bicsah, doolat addat koobaahissô siirat gacuh kaxxa dahni aceele.
2. A sittin-geyit tan baaxooxa, leh tan madqinan kee xiinnissô siiratittek gexak, aallele, maqarrooysele, muggaaqisele, hinnay kaadu soolisele isi baaxoh addal, amô-baxxaqqa le maknayittek tiya akkek, wohuk biso akke takke may. Toh kah abtam , ta sittin-geyih abnisso bisoh haytuuy, dacrissuu kee amô-wagittu.  
Toonah tan maknayitte muggaaqissaah, soolissa waqdi, a sittin-geyti tan baaxooxa, cisbatat hayta radmoomay, agát xisoosá, sahdaytinan garwah dacayrii kee, bisoh-haytik edde tan caddoodat axawah tanih iyya.
3. Gabqasâ gaanta, axcaxcih erginná-leelaa kee, ken massoynaani amô-wagit gexsayat, kibo le gabah assagolla alle le.

### **34<sup>haytô</sup> Maasayya – Erginná-leelâ garwa dacrissa komité**

1. Erginná-leelâ garwa dacrissa xagaray, ahak wadiril (komité) deqsita soolele. Too xagar a ciggilta abtootat asele.
2. A sittin-gey abtol asam edde qimbisa waktil, a komiteh adoytit taban kee nammay akkele. A sittin-geyit lactam faatacisso tekkeek akal, komiteh aydoytiitit laca num ossimele. Sittat taban kee bacaar akkelon toh ellecabo.

3. Komiteh adoytit numtin-amô duddal taamite le. Usun mamaxxaga le qalalak meeximeeh, moraal leeh, kalah kaadu, a sittin-gey sarisa booxaaxil abak-raag le mara kinnon. Isinni liisá-leelá muggaaqisan waqdi, a sittin-geyit tan baaxooxa, a sittin-geyik 4.3 maasayyal taniimih, cubbi abtam teetik qambalsimta.
4. Komiteh adoytit a sittin-geyit tan baaxooxah gabat doorima, jograafi baxaccah gitat aniyyaay, baxaabaxsa-le bisô-maxcooca awakkaliyyaay, madqinan radmoomah siiratittaay, nadô qeedal-le awakkaliyyaa kee, erginna-leelá tu-taaxagoh gabah assagolla; cisbatat haak.
5. Komiteh-adoytit, a sittin-geyit tan baaxooxa isi baaxoh xaylok xayyossah tan maritteetâ fanak, cuumi waraakit-qidnel, sittin-geyit tan baaxooxah gaaboynah daffeynaanil, doorimele. Too daffeynaaniy, daffeynâ-kibo a sittin-geyit tan baaxooxak namma-sidoctal akak kibbimtal, doorimtu-waytam, yontocowwe anayak mango gaba geeh, sittin-geyit tan baaxooxa awakkaluk yemeete maray, anay yeceek giffita mangaba geeh iyya.
6. Naharsi dooro, a sittin-gey aracat gaceek wadir, lecalsih lakal akkele. Daggowwutek doorok naharat, fereeyheele alsat, Galli-Marok Kaxxa Cuumi Mabbaxi a sittin-geyit tan baaxooxah jawaab aktubele; nammalsih addat, muggaaqisan maritteetah migooqá, ruuba yaanamah. Kaxxa Cuumi Mabbaxi, woo ruuben migaaqiyoow, alifbaatâ yaakumik-ciggiilil hayyaay, ken rubte baaxooxa galab xaggaa heeh, a sittin-geyit tan baaxooxah ruubele.
7. Komiteh adoytit akah doorimam affara liggida. Nammayhaak doorimoonu duudaanam inki adda. Takkay immay, naharsi doorol doorime adoytiitik leca numih wakti, nammayheele liggidih ellecabol, gaba kalele. Too leca numih migooqa, a maasayyah, lanik 5<sup>ul</sup> akah tescsessimê nah, daffeynâ miraacisé, saami meexol doorele.

8. Komiteh adoytiitik ossantani leceeyih dooro, madáb daffeynaanil akkele, a maasayyak woh wagitta ximmoomak amakkaquk.
9. Adoytiitik numuk teyni rabah, hinnay ma faxáh, hinnay kaadu geeri sababah arac caba kaa tekkek, kaa muggaaqisseh tan baaxo,kay aracah woo duddo leeh, a maasayya tascassem kiba num, raaqa waktih ayfaafay yacayuh muggaaqisele.
10. Komite isi gexsayih siiratah, edde-xinta haysite le.
11. Galli-Marok Kaxxa Cummi Mabbaxi a sittin-geyih addal tan komité taamoomih digga-le tamsissooy, faxxiima sahdayi caylaa edde teemitaanam xayyoosele. Naharsi daffeyná teetk miraacisele.
12. A komiteh adoytiitiy, a sittin-geyih addal sooleh yani, Kaxxa Koboxih faaticissol, ken qaaqah assakoxxih konnabah, Galli-Maroh, keenih meklta duyee hirgite lon.
13. A komiteh adoytit, Galli-Maroh mehrat-leelay , tet farmot tani geytah tan bicitteey, baxsa-le garwaa kee dacayri geele, sittin-geyik woh wagitta exxaaxil, Galli-Maroh baxsá-le garwaa kee, dacayri akah tescessimeh taninnah.

**35<sup>haytô</sup> Maasayya - Sittin-geyit tan Baaxoohax Gabbaaqitte**

1. A sittin-geyit baaxoohax umman tiyá, Galli-Marok Kaxxa Cummi Mabbaxih gitaak, kullimi addat le gabbaaquy, a sittin-gey keenil amrisa ma-kortaatih abnissoh, beyte maaqattootii kee , woo migdal tekke tan bisô-maxco elle tascasse, is, a sittin-gey abtol edde asisseh tan, namma liggidih lakal rubta.



2. Tohuk wadiril, a sittin-geyit tan baaxooxa, gabbaaqitte heele, kulli affara liggidal, wohuk kalah komite esserinnaann waqdi ruubele.
3. Komité, gabbaaqitteh addatino wagsiisak, faxe ascossitth margaqa aceele.
4. A sittin-geyit tan baaxoy, naharsi gabbaaqy, kulliimi addat le tatusseek lakal, rubta gabbaaqittel, duma edde yabteemit ma yabta. Komite a sittin-geyit tan baaxooxak essertam,usun gabbaaqitte bicisan wakti, woo bicisiyyi, qadooh, ifu –le gurral yakkem faxximtaama. Toh, ta sittin-geyik 43<sup>haytó</sup> maasayyal tescessimeemih dahni yaceenim.
5. Gabbaaqittel, a sittin-geyih addal tan ma-kortaatih abnissoh caddoodat garaytaah, akke kaltam tenek, wohim tascassu duddah.

### **36<sup>haytó</sup> Maasayya- Gabbaaqitth, cisbatat haanama**

1. Komite kulli gabbaaqu fayya ramma haak wagitele. Wohuk gexak, amolladih ah-akkeh –meqe kee, anni-yaysey teetit celta, a sittin-geyit tan baaxoy, caagid wagtah iyyah ruubele. Sittin-geyit tan woo xaaguk isih doorittam komiteh gacsele. Komité , a sittin-geyit tan baaxooxak, a sittin –geyih abnissot bica –le geeri xaagu essertu duddah.
2. A sittin-geyit tan baaxooxak tiyak teyná, rubtam faxxiimak ten gabbaagu udurrussu hayteeh, neh ruubal teetih aben assocassal sidiicalsa,tibbitek,omite woo baaxol,a sittin-geyih abnissoo kusaq-simtam faxximtaamih ascossa, teetih abele, geyteh tan xaagu gexak. Komite, woo kusaqal, caagid wagita doolat akah geytimtá nah abele. Woo doolat woo caagidil gabbaaqu xayyosse tet tekkek, toysá, a maasayah lanik 1<sup>haytol</sup> tanim baaxo xagta.

3. Galli-Marok Kaxxa Cummi Mabbaxi, gabbaaqitte, sittin-geyit tan baaxooxa inkih kah geytannah abele.
4. A sittin-geyit tan baaxooxa isi gabbaaqitte isinni baaxooxah sadar inkih kah geytannah abele. Woo gabbaaqittel anni-yaysee kee, woh-akke meqet, culmâ-gey akah yaallen innah abele.
5. Komité tatrusele, teetit bica elle lennal, baxsa-le wakaalatitteh, Galli-Maroh maaluu kee taddiiraari. Kaadu dudda-le xagoorah ruubele. Sittin-geyit tan baaxooxak gabbaaqitte amaatele, esser kee yascasseenim wagitak---metteebanni qakkaloysoo kee, catô fayxih; komité mablaa kee, woh-akke-meqe edde anuk.

### **37<sup>haytô</sup> Maasayya -**

#### **Sittin-geyit tan baaxooxaa kee komité cattiiyya**

1. A sittin-geyit tan baaxooxak ummaan tiyá, komité luk cattiiimele, komite akah solte taamoomik taysê fan.
2. Komité a sittin-geyit tan baaxooxâ lih le tan qallih addat, faxxiima cubbi aceele agat duddoh, usun a sittin-gey, abtol elle asisan migdittee kee, gurrittet gaba korisaanâ gideh--baadinan cattiiyyih gitaak.

### **38<sup>haytô</sup> Maasayya - Komité, geeri xagoorâ luk le qalla**

A sittin-geyih, maqar le abnisso dadlisak gexxuu kee, usuk sarisah yan booxaaxil, baadinán cattiiyyá agiirissuh:

- a. Galli-Maroh wakaalatittey baxsa-le farmo le takku, hinnay kaadu aalle waytam takku; isinni farmoomah addat a sittin-geyih abnissol geytimaanamih gar lon. Komiteh faxxiimak tumbulleek, Galli-Maroh wakaalatittey, baxsá – le farmo lee kee, geeri xagoorak, a sittin-geyih abnissoh , ken gexsitih addat tan exxaaxih

mehrat-leelâ qakkaloysso essertu dudda. Toh dibuk hinnay, komité woo xagoorak gabbaaqitte xayyoysa intu duddah.

- b. Komité, isi taamoomik gaba elle kalak gexxaamal, tû bica elle lennal, geeri xagooray sahdaytinan garwak baadinan xaganittet tani, qakkalossu duddah, usun ruubaanah yanin gabbaaqittech ascossitteey, anni-yaysee kee, amolladih woh-akkeh-meqek amakkaquk. Toh kah abtam abtootak qagam-qagit kee, dirribu waassâ gide.

### **39<sup>haytô</sup> Maasayya - Komité Gabbaaqu**

Komité abtah tan taamoomik gabbaaqu, kulli namma liggidal Kaxxa Kobox kee, Maddur kee Ayyuntiinô Qakkaloysâh ruubele. A sittin-geyit tan baaxooxak, geytah tan gabbaaqittek abta kusaq kee, keenik geyta xaaguk amakkaquk, anni-yaysee kee woh-akkeh-meqe tascassu duddah. Too anni-yaysee kee woh-akke-meqe gabbaaqut edde heele; sittin-geyit tan baaxooxa wohul le mabla teellek, edde osisele.

### **40<sup>haytô</sup> Maasayya - A sittin-geyit tan baaxooxah Gaaboyná**

1. A sittin-geyit tan baaxooxa, a sittin-geyih abnisso wagittaamih adda table gidah, madabak tan daffeynaani gexsele.
2. A sittin-gey abtol edde asa waktik wadiril, daggowwutek lacalsat , Galli –Marok Kaxxa Cummi Mabbaxi akah seeca a sittin-geyit tan baaxooxah gaaboyná gexsitele. Cigglta gaaboynaaniy, kulli namma liggidal Galli-Marok Kaxxa Cuumi Mabbaxih seecol , hinnay kaadu, sittin-geyit tan baaxooxah gaaboynah margaqal, takku taaxige.

**41<sup>haytô</sup> Maasayya - Sanditteh Abbaxa**

Galli-Marok Kaxxa Cuumi Mabbaxi, a sittin-geyih sanaditte isi garil abbixele.

**42<sup>haytô</sup> Maasayya - Fermá**

Ta sittin-gey, adoytiitih ennita baaxooxaa kee, qarangubaabih rakaakayittech xisoosah fermah, F.L.L. 30/03/2007<sup>ik</sup> xabba haanam, Niyu yorkik Galli-Maroh salalal, fakimut anele.

**43<sup>haytô</sup> Maasayya - Madqah xiinaanamih ma-kortá (oggolut deberimiyya)**

Ta sittin-gey, ferma hayta baaxooxah faatacissoo kee, hittat-culah tan qarangubâ rakaakayittech xisoosay, ferma haytay diggoysiyyah, fakimut yan. Woo namma marak, duma cule-wayteemih, faxe waqdi fakimut yan.

**44<sup>haytô</sup> Maasayya - Hittat-culah tan Qarangubaabî Rakaakayittech Xisooá**

1. “ Hittat-culah-tan qarangubaabî rakaakayittech xisoosá” kak yaanam , yimixxige rakaakayal tan muddaqiyannu le doolwatwak xissimta eglay, usun, a sittin-gey wagittaamal taamittâ gid, muggaaqiseenih iyya. Tannah tan xisoosa, ken kah muggaaqisen taamoomit gufoonu duudan duddoh caydu ifu luk (qaduk) qaddoysaanam faxximta. Ciggiilak kaadu woo caydut aban aysiisiyyi yenek, sanad yabbaxih yaysixxigeenim le.

2. “ Sittin-geyit tan baaxooxa” yaanam a sittin-geyih addal ferma hayte baaxooxaa kee, lon duddoh guftil, tonnah tan xisoosá yaanama.
3. 45<sup>haytô</sup> maasayyak 1<sup>tô</sup> lanik, 47<sup>haytô</sup> maasayyak 2<sup>too</sup> kee 3<sup>tô</sup> lanitteh sabbatah, hittat-culah-tan qarangubâ rakaakayih xiso, dafesse sanad, loowot ma gaca.
4. Qarangubâ rakaakayih xisoosa, leh tan duddoh caydih addat, sittin-geyit tan baaxooxah gaaboynal anay tacayu duddaamih gar le. Toh dibuk hinnay, ken anay, usun yawikkilen baaxooxa hittat le anayih gid yakke. Is muggaaqissa baaxooxak tiyak teyná isi anayih garat xoqoysimak maacissek; is anay tacayu ma dudda, asqassi kaadu tonna.

#### **45<sup>haytô</sup> Maasayya - abtol asisiyya**

1. A sittin-gey dirkih abtol asam, faatacissok 20<sup>heele</sup> aalat edde daffeysen ayrok, hununuh soddom ayroh laka.
2. Tonnah yan sanad (20<sup>heele</sup>) daffeeek lakal, a sittin-gey faatacisseeh, oggolteh, adoyta tekke baaxok/xiso, tonnah yan isi sanad,aracat hayteek wadir, soddom-heele ayorh lakal, dirkih abtol asa.

#### **46<sup>haytô</sup> Maasayya - Bagwáy –tibbá**

1. Ta sittin-geyih qalaamaa kee madmâ luk gexsite wayta bagway-tibba moggolimta.
2. Bagwáy- tibba faxe waqdi hirgimtu duddah

#### **47<sup>haytô</sup> Maasayya - Aysiisentitte**

1. A sittin-geyit tan baaxooxak faxe tiyá, a sittin-geyih, aysiisenta xayyossu duddah, Galli–Marok Kaxxa Cuumi

Mabbaxih gitaak. Kaxxa Cuumi Mabbaxi, woo aysiisentitte sittin-geyit tan baaxooxah inkih yaysixxige. Woo xayyowteemil margaqá yacoonuh, kobox faxxiimuwaa kaa tekkek, yoo iyysixxiga keenik iyya. Too deerol,adoytiitih tan baaxooxak, daggowwtek inki-sidoctá, kobox faxxiimah ittek; kaxxa Cuumi Mabbaxi, Galli-Maroh amô-wagitul, kobox seecaah, gexsa. Tokkel, daffeynal geytime maray, anay yeceek, namma-sidoctah mangaba geytimtek, woysá, woo aysiisentitte taturtaah, faatacissoh Kaxxa Koboxul xayyowta. Tokkel, faatacsimteek lakal, oggoluh sittin-geyit tan baaxooxâ fan ruubumta.

2. A maasayyah lanik 1<sup>haytol</sup> yintibbixeeh, faatacsime aysiisenti abtol asam, edde faatacsime ayroy, adoytiitik namma-sidoctá edde gufeh iyyak hununah soddomee ele ayro.

Tohuk wadiril, aysiisenti, faxe adoytah tan baaxol, usun isinni oggolih aalat aracat edde heenimik soddomee ele ayro abtol asa. Aysiisentát deberimtam dibuk kaa oggolte baaxooxa.

3. Toysá, sittin-geyit tan baaxooxah gaaboynal, hitta elle geyak madqimtem, a maasayyah lanik 1<sup>haytuy</sup> 34,38,39 kee 40<sup>ul</sup> axawah yanik gexak, kulli baaxo, isi faatacisso aalat edde daffesse ayrok, hunun soddomee ele abtol asele.

## **48<sup>haytô</sup> Maasayya - Giddi**

A sittin-geyit tan baaxooxak faxe tiyá, Galli Marok Kaxxa Cuumi Mabbaxa kutbeh aysaxxaguk, a sittin-gey giddiytu duddah.Woo ciná aracat gactam, kutbeh,kaxxa Cummi Mabbaxa edde guftek ayrok wadiril, inki liggida.

## **49<sup>haytô</sup> Maasayya - Culmá-gey meqe formaata**

A sittin-geyih kutbeytá kullî kel akah geytimtâ nih bici akkele.

**50<sup>haytô</sup> **Maasayya** - **Hunún kutbeebá****

A sittin-geyik Qarabiiy, Ingliiziiy, Faransaawiiy, Chaayinaay, Ruusiyaa kee Asbaaniyah afittet tan kutbeeba inki nihir-le

Ahak gubal migooqa akak tan abbobtiy, le doolatwa, faxximta duddo xagaarat akak hayte, ahak dagal taniimil sumaaqitak ferma hayteh tan.

## **5. Urri Garwah Sittin-Geyi**

Kaxxa koboxih Margaqah ixxima 44/25 F.L.L. 1989

### **Culmeyná**

A sittin-geyit tan baaxooxa

Galli-Maroh Charteril kuktisimteh tan radmoomak gexak, sahda inkih, ginook massakka lem kee, inkigid yakkeeh, keenik baxsime sinni garwa lem ixiggi heenih oggoolanam, baadak curriyyataay, qadaalat kee wagari rakiibo kinnim cisbatat haak,

Galli-Morot tan ummattooti,faatacsitte charteril, sahdaytiinok rakiibô garwaay, konnabaa kee, sahdayti baxih melleb diggossaa kee, ayyuntinán dadal kee, tayse manoh caddo guftuh, maqar kee baxacca-le curriyyatat taamittu-waytam , aracat hayteh tanim, misinkicat haak,

Galli-Marô, Sahdaytinán Garwak Baadinan Baxxaqsoo kee, Sahdaytinán Garwak Baadinan Sittin-geyil kuktisseeh, sitta elle geytam; faxe num,wokkel daffeyte garwaa kee curriyyatittel, hebeltô baxsa, samadal, bisul, nadol, afal, diinil , siyaasal, hinnay geeri mablal, agatal, hinnay ayyuntinan raceenannul, ikol, ubkal,hinnay kaadu geeri qaadoodal aalle kal,yassakaxximem faxximtâ yeenim aaxagauk,

Sahdaytiinô Garwak Baadinan Baxxaqsol, Galli-Marô, urriino, baxsá-le cubbii kee cato faxxa yaanam kuktissem kassitak,

Buxá, ayyuntak rakiibô hortaa kee ,gniô deraafiy, inkih yan buxâ-maraa kee , axcaxcih urri manub kee, nagay-taniinok arac kinnih; faxximta dacayrii kee, cato abaanam, is, le gaantah addal, teetil tan qaaqak edde tawqem kinnim cedak,

Urri, dudda-leeh,meqe dadalah dadaluh, le buxah adda kee, deraafil farcii kee kakanut yanbem faxxintam aaxaguk,



Urri, ayyunti addal canká manoh yaloolu-waah, Galli-Maró charteril kuktisimteemih roocit yanbeeh, axcaxcih wagariiy, konnabaay, xiiqiyy, curriyyataay, inkigid-akkiyyaa kee, qaxok-qaxiitál ken massoosak dadlisaanam faxximtam cisbatat haak,

Urri, lallabot yanbeenim faxximtaamih cusoo F.L.L. 1924 Jeneevil tewqe Urri Garwah Baxxaqsooy, kalah kaadu, Kaxxa Kobox Naharsi-kudok 20/1959<sup>ah</sup> faatacise urri garwah Baxxaqsooy, Sahdaytinán Garwak Baadinan Baxxaqsooy, Gabqasaa kee Siyaasá Garwak Baadinan Baxxaqso, ( axcaxcih 23 kee 24<sup>haytô</sup> maasayya), Madduruuy, Ayyuntinoo kee Qaadá Garwah Xaganak 10<sup>heele</sup> maasayyay, urruh baxsá-leemit yabtaa kee, urri nagaytaniino wagitta baxaabaxsa-le baadinam xisoosah edde-xintittee kee, wohut cula-le sanaditte mamaxxaga geytem misinkicat luk,

Urri Garwah Baxxaqso elle tascassê nal, “Awki xagar kee, misinkicah dadle-weemih sabatah, cubbii kee dacayri ubkak nahar kee, wadiril inkih, bica-le madqinan dacayri edde anuk faxam” misinkicat luk,

Urri nagaytaniinoo kee, dacayrih lallaboh tewqe ayyuntinan kee, madqâ radmoomah baxxaqso, axcaxcih agat kee baadinán caddol, urru taynabe xisoosah madqooqiyy, Galli-Marok urri qadaalatah rammata exxaaxiyy, (Beejingi madqooqi) sissik caalootaa kee, carbi wakti, saymaraa kee urri dacayrih tewqe baxxaqso kassitak.

Baadak kulli baaxol , kaxxam gibdaabina-le caalootat yan urri yanim kee, urri baxsa-le dahni akah yaceenim faxam, aaxaguk,

Ummaan shaqbi leh yan abak-raag kee qaadá, urri nagaytaniinoo kee, dacayrih gitat yan dadalih xoqoyisi lem, cisbatat haak,

Kulli baaxol, axcaxcih dadalat tan baaxooyal, urri mano yaysiisoonuh baadinan cattiiimiyyi , tû-xiiqik lem cedak, ta ciggiltaamal sitta geyneh nan.

# **EXXÁ I**

## **1<sup>haytô</sup> Maasayya**

A sittin-geyil “awka“ kak yaanam 18 liggidak addah yan numu, urru wagitta madqal wohuk addah yan qumri yescessimeh ane week.

## **2<sup>haytô</sup> Maasayya**

1. A sittin-geyit tan baaxooxa, isinni rasitteh addal, a sittin-geyil daffeyte garwa, assakaxxeleeh, abnisso akak diggoysele, kulli awak/awkáh, hinnay kaadu, ken xaltanih kee, ken yaynabeh marah, habeltô baxsa samadal, bisul, nadol, afal, diinil, siyaasâl mablal, agátal hinnay ayyuntinán raceenannul, ikol erginnal ubkaa kee geeri caddoodal, aallekal assakaxxele.
2. A sittin-geyit tan baaxooxa, bica-le maaqattooti inkih beele, awki/awká, kulli qaynatih lagô-baxsak/digaalah caddooy, abititteey, afak raddooy, hinnay kaadu, kay/tet xaltaniiy, kaa/tet yaynabe maraay, wohuk kalah kay/tet buxah mari elle yaamineenimik ugutak, diggalsimaanamak ken dacrisele.

## **3<sup>haytô</sup> Maasayya**

1. Urri wagitti hayta abtootal inkih, sadarim takku, canká meqem-abittoh massoynaanahim takku, madqâ caxaay,xiinissoh abbatinoonahim kee, madqinan xagoora takku, amo beyak raqtam, urruh, tayse maslacat leemi.
2. A sittin-geyit tan baaxooxa isil taaxigem, urri nagaytaniino diggoysaanama, ken xaltaniiy, madqal ken taynaboo kee, geeri maray keenik madqinan qaaqá leh, garwaa kee koltanitteeta cisbatat haak. Too madmah abnissoh, bica-le madqinan kee, xiinissô maaqattooti inkih beele.

3. A sittin-geyit tan baaxooxa,urri lallaboo kee, dacayrih qaaqá fillal akak tan xisoosaa kee, ayfaafay tacee massoynaanii, bica-le abbatinoh biirorak tewqeh tan, axcaxcih , Osod kalaluuy, qaafiyat dacayri, sahdayti caylaay, bicaa kee kataatuk lon inna, diggoysele.

#### **4<sup>haytô</sup> Maasayya**

A sittin-geyit tan baaxooxa, bica-eelli hayta, madqinan, xiinissoo kee, geeri maaqattooti inkih beele, a sittin-geyil mamaxxaga akah tontocowweh tan, garwah abnissoh. Madduruuy, ayyuntiinoo kee qaada garwah tu gactekiiy, a sittin-geyit tan baaxooxa, isih duddu haytaamal inkih, faxximitek kaadu, baadinán cattiiimiyih gitaak abtol asisele.

#### **5<sup>haytô</sup> Maasayya**

A sittin-geyit tan baaxooxa assakaxxale xaltani qaaqaay, garwaa kee, koltaniteeta, elle celtaah, faxximtâ kel kaadu, inkih yan buxâ maraa kee, gaantah assakaxxele, rakaakáy qaadal xissimmak, urru taynabooy, hinnay kaadu, urri xiinisso madqak elle tontocowwe maraa kee, geeri mara, awki a sittin-geyil tan garwat xoqoysima waqdi,anabuk elle gexaamih duddo, cisbatat haa miraacannu, kaah acayuk koboraanama.

#### **6<sup>haytô</sup> Maasayya**

1. A sittin-geyiti tan baaxooxa, faxe awki/awka, manol yaniih/taniimih ginook le gar lem, taaxigeh.
2. A sittin-geyit tan baaxooxa , urri, manol yaniih, dadalaanam , tet duddo guffu haytâ kê fan diggoysele.

## **7<sup>haytô</sup> Maasayya**

1. Faxe urri, elle yooboken innal elle, yaysaqarrimeeniih, muggaqs-imaanah, baaxô-baxiinu geyaanaah, xaltani yaaxigeeniih, ken gabat lallabo geyaanamih, gar le.
2. A sittin-geyit tan baaxooxa, axcaxcih urri, baaxo sinni mara yakkeenimik, isinni agatih madqaa kee, baadinán imik a migdal keenil radda ma-kortaati, assakaxxayuk, abtol assam diggoysele.

## **8<sup>haytô</sup> Maasayya**

1. A sittin-geyit tan baaxooxa, urri garwah assakoxxa isil aaxaguk, usun isinni, kinnaaneey, agattiinooy, migooqaa kee buxâ-mariini qalla akah yaallen innah madqá elle tascassê nal abele,
2. Urri madqak iroh yan gital,le garwak tiyá takku, hinnay kaadu inkih takku bukkusimeenik, a sittin-geyit tan baaxooxa, ken kinnaané, kibo luk sissikuk, keenih akah gactannah,bica – le catoo kee, dacayri, keenih abele.

## **9<sup>haytô</sup> Maasayya**

1. Abbatiino le mari rasul tan madqooqi kee, urri maslacatah tayseh yaanamak amakkaquk, tekkeh akke waytek, urrú le xaltanik baxsaanam ma duudimta.  
Urru xaltanik baxsaanaah elle gacan rike yargiqeenim,woh xaltani , urrul umam bahtam diggowta waqdi, hinnay kaadu xaltanik mariiy rikel yan waqdi. Takke way toh inkih elle meqem urri fayxii kee masacata.
2. A maasayyak 1<sup>haytô</sup> lanil elle tescsessimeh taninnal, caagid wagitan waqdi, usuk wagita xagoora, woo marol geytimak, isinnit celtam yascassoonu duudaanah.
3. A sittin-geyit tan baaxooxa , urruy, le xaltanik tiya akkek, nammayak inkih baxsimeh garwa, assakaxxele. Toh numtin-amô qalla luk raaqaanamal, namma xaltani luk

aggiriqqe sinni, waqdiik waqdi yakke angaaraw yaalleenimi, wonni urruk, tayse maslacet sada kaa, akke waytek.

4. Urri xaltanik edde baxsimam, a sittin-geyit tan baaxooxa beyta maaqattooti tikkitek, ceelalloh namma xaltanik num, hinnay inkih, hinnay kaadu urru tikkitek, casbih takku, dabboh takku, baaxok xiiriyimu, hinnay kaadu casbi addal faxe sababah rabu, bica edde leh tan buxamarak numkteyni, num edde bayê ke esseru duudaah; a sittin-geyit tan baaxoy , caagid wagitah iyya, xaagu tacayu duddah, woo xaagih acwa, urri nagaytaniinol taqabi katassa tet akke waytek.

## **10<sup>haytô</sup> Maasayya**

1. 9<sup>haytô</sup> Maasayyak 1<sup>haytô</sup> lanil tescessimeh tan ma-kortaatik amakkaquk, urri, hinnay kaadu ken xaltani, a sittin-geyit tan baaxooxa culoonuu, teetik yawqoonu, buxaaxi marat yangaleeni gideh xayyoosan essero,meqe intit amballayuk, sahdaytanan kee sissikaane le gurral, abtol assam le.  
A sittin-geyit tan baaxooxa, wohuk kalah tannah tan esseroorah xayyoysi, xayyoysaá kee , ken buxaaxih maral, hebeltoh umaane kataysu duude waama diggoysele.
2. Awkay , xaltanik namuuy baaxol kak yani, baxsá le caalat edde garaa kaa akke waytek, namma xaleenâ luk inki yangooroweemih gar le. Tohim abnisimtuh, 9<sup>haytô</sup> maasayyak 1<sup>haytô</sup> lanil tescessimeh tan ma-kortak amakkaquk, a sittin-geyit tan baaxooxa, awkaa kee xaltani inkih, ken baaxo edde anuk, faxe baaxok yawqeeniih, isinni baaxoh gacaanamih gar, keenih assakaxxele.  
Faxe baaxok yawqeenimih gar, deberimu duudam, madqat axawah gaca waqdi. Baaxô say kee, shaqbi nagaytaniinooy sadar qaafiyat kee, moraalaay, geeri garwaa kee, geeri marih curriyyatittee kee, a sittin-geyil daffeyta garwat axawah yan waqdi,

## **11<sup>haytô</sup> Maasayya**

1. A sittin-geyit tan baaxooxa, urru, madqak iroh, baaxooxak yayyaaqeenim kee, le baaxoh gacse waanamam angiiçillele.
2. Tohim aracet gactuh, a sittin-geyit tan baaxooxa, nammáy, hinnay kaadu, mango marih fanat, sittin-geyitte akah takke nah, hinnay kaadu dumaak sugtem akah maqqarowtâ nah, abele,

## **12<sup>haytô</sup> Maasayya**

1. A sittin-geyit tan baaxooxa, isinni mablá yacayu duuda urruh, ken wagga haytaamal, currik, le mablá qaddoysoonu duudaanamih gar keenih diggoysele. Urri yacee mablaa ken qumrii kee, guftit axawah tan qilsá le.
2. Tohih sabbatah, axcaxcih urru wagitta caaggiida, mabloh, hinnay kaadu, xiinissô xagar wagita waqdi, woo baaxok ossobbâ madqâ lih elle gexsitta gurrall, isih , hinnay kaadu wakiil gitak, hinnay kaadu, bica edde le xagarih kabuuk, yaabbeemih saami geele.

## **13<sup>haytô</sup> Maasayya**

1. Urri isit celtaamih adda , warsitaamih gar le. Woo gar kulli qaynatih xaaguu kee, malâ gorrisiyyaay, hirgitiyyaa kee ruubiyya inkih addat le, hebeltô caydi ken waasekal. Wohim afak yoonu, kutbeh yoonu, hinnay kaadu tabqih yoonu, fanni weelot yoonu, hinnay kaadu, urri dooritinnaan, geeri miidiyah gitaak, qaddoysoonu duudan.
2. Ta garat xoqoysimaanamat deber gacu duudah. Takkay immay, woo deber faxximtaamah yambulleem kee, madqá kaa tascasseemit, axawah yan.
  - a. Geeri marih garwaa kee, migaq-gexxoh assakoxxih sabbatah

- b. Agát saay kee, sadár nagaytaniinooy, qaafiyat kee, moraalih sabbatah.

## **14<sup>haytô</sup> Maasayya**

1. A sittin-geyit tan baaxooxa, urruh mixinkicak/afqadooy, diini curriyyat assakaxxele.
2. A sittin-geyit tan baaxooxa, xaltanii kee, bica teellek urru madqal taynabô garwaa kee, koltanitteeta assakaxxele, urruh meqe afkun taceem keeh. Toh, urri elle yanbeemil, ken dadal lih gexxa garwah abnissoh ascossa.
3. Diinii kee, elle yeemeneenimih asgagoyyat yakke deber, gacek kah gacam, madqal madqimtem kee, ummattâ nagaytaniinoo kee saaya , qaafiyat kee moraala, hinnay kaadu, geeri marih garwaa kee, curriyyatitteh assakoxxi faxxiima waqdi, dibuk.

## **15<sup>haytô</sup> Maasayya**

1. A sittin-geyit tan baaxooxa, urri, eglalait gacaanam kee, salaamah gaaboowaanamih garwa lem taaxigeh.
2. Too garwah abnisso debertam ma tana; dimokraasih ayyuntih addal geeri marih garwaa kee, curriyyatitset, booddeh akke waytek. Kalah kaadu ummattâ nagaytaniinoo kee saayaay, qaafiyat kee maraalat boodda tet akke waytek.

## **16<sup>haytô</sup> Maasayya**

1. Faxe urruk, dibuk lon manooy, buxâ-maraay, muraasalatat annaak, madqak iroh tan fanak-raddo, ma takka. Ken konnabaa kee migaq-gexxot tabaanam ma xiqqimta.
2. Urri, tonnah tan fanat – raddoo kee , dadhok madqâ dacayri le.

## **17<sup>haytô</sup> Maasayya**

A Sittin-geyit tan baaxooxa, maas-miidiya abtah tan taamah kaxxu taaxigeh, tohih sabbatah, urri baxaaxaxsa le agat kee, baadinan raceenaanah xaaguu kee, tumammit culmâ-gey, akah yaallen innah abeleeh, diggoysele; baxsá luk ken ayyuntiinooy, roociinuuy kee, moraál nagaytaniinooy, xagarak misinkicah bisoh hayiyya wagittaamal.

Too madmah, a sittin-geyit tan baaxooxa:

- (a). Urruh ayyuntiinooy kee qaadâ xoqoysih xaaguu kee, tumammiti baxcisiyya abtah gidê maas miidiya aytiku musele.
- (b). Tannah yan xaaguu kee , tumammiy, baxaabaxsa-le qaadaay, agatinan kee, baadinan raceenaanik tanih, murtisiyyaay, milaaguu kee , baxcissoh baadinan cattimiyya, aytikumusele.
- (c). Urri kitoobah murtisiyyaa kee, baxcisso aytikumusele.
- (d). Daggabaa kee, sugeetih yaabuke urruy, afti caagidil , rikek yan abbax faxah, maas miidiya rikeek tanim abtam aytikumusele.
- (e). Uma xaagittee kee tumammiy, ken nagaytaniino dallessak, urru dacrissuh , bica le ascossitteh dadal aytikumusele, a sittin-geyik 13 kee 18<sup>heele</sup> maasayya tascassem, misinikicat luk.



## **18<sup>haytô</sup> Maasayya**

1. A sittin-geyit tan baaxooxa, isih duddu haytam inkih abele, namma xaleena, urri manubuh, hittâ lih le qaaqâh mamaxxaga diggossuh. Xaltanii kee, madqal urru taynabol, urri manub kee dadalah, kulli marak giffita qaaqâ, keenil tan. Urruh yayse maslacet abaanam keenik naharasiino leeh, rakiiboh tan taama.
2. A sittin-geyih addal tan garwah abnisso caabisaanam kee, bisoh warraysaanamah, a sittin-geyit tan baaxooxa, urri xaltanii kee madqal taynaboh bica-le cato abele, urri manubih qaaqak, meqennal yawqeeni gideh. Wohuk kalah, massoynaaniiy, bicittee kee, ayfaafayay urruh abaanah dadlisiyya, diggoysele.
3. A sittin-geyit tan baaxooxa bica-eelli hayta maaqattooti inkih beele, xaltani taamat akak tan urri, urri lallaboh ayfaafayittee kee, bicittey usun edde bicaanat arac geyoonuh.

## **19<sup>haytô</sup> Maasayya**

1. A sittin-geyit tan baaxooxa, bica-eelli hayta madqinanaay , xiinissooy, ayyuntinanaay,, barissoô maaqattooti inkih beele;  
Urri, le xaltanii kee, madqal urru taynabo akkek, hinnay kaadu, faxe numuy urri amo wagtah, gabat yanin waqdi, kulli qaynatih umaanek, xagarak/misinkicahim takku, dalleysiyyak/xaafihim takku tu-hinnak/baaqid-sinnah abbaixihim takku, umabbax kee xukko---fidoh angaarawih qaxuumanna edde anuk, dacrisele.
2. Tannah tan dacayrih maaqattooti, urruu kee urri amo wagita marah, faxximta catooy, ayyuntinan taddiiraarii fidsaanam kee, ahak dagal galab kak xaggiime umensesá akke kaloonuh, tekkeh sugtek, abe num yamaxxaguh, xaagi rubti, wagita xagarah miraasoonuh, kusaaqisoonuh,

daylissoonuh, kataatoonuh, bica elle aallinnaan innal, madqâ caxah xayyooysoonuh duudussaah, digga-le siiratitte inkih addat le.

## **20<sup>haytô</sup> Maasayya**

1. Elle-sugah takku, inkittoh takku, isi buxah –marih deraafik yexxeere urri, hinnay kaadu, ken maslacatah woo deraafik yaxxeerem faxximta urri, doolat dacayri geeleeh, is taceeh tan catottat, loowimele.
2. A sittin-geyit tan baaxooxa, isih leh tan agat madqooqik gexak, wonnah yan urruh, kalah tan (badiil) lallabo geytintam diggoysele.
3. Tannah tan lallabo, geerimih fanat, urru, taynaboh yaceenimiy, Islaam diini yascasse kafaalatah yaceenim kee, baxah loowitak yaynabeenim, addat le. Kalah kaadu urru taynabe massoynaanih yaceenim addat le.  
Bica gorrisan waqdi , cisbatat hee meqem, woo aynabiyyi garuqmalih elle gexsitâ naay, ken agataay, diiniy, qaadaa kee, afti caagiida.

## **21<sup>haytô</sup> Maasayya**

A sittin-geyit tan baaxooxay, urri, geeri marih gubat yanbeemih mamaxxaga taceeh iyya, urruh tayse maslacat, kulliimik daga raqtam kinnim, diggoysele. Kalah kaadu:

- (a) Urru manubuh, geeri maral taceem, tacayu dudda abbatino-leelá takkem faxximta. Woo abbatino-leelá woh elle abtam, bica-le madqaa kee siirat takkem faxximta. Kalah kaadu, yaaminen xaagul xiissiimak, urri xaltaniy, ramad kee madqal taynabô xiinnisoh caalat, urru manubuh geeri maral yaceenim, bictam kinnik/waytam yargiqeenimi. Caagid wagitah yan mari, faxxiima qakkaloysiyyih ayfaafay,geek

wadirillah,urru geeri maral manubuh yaceenim diggoysele.

- (b) Urru elle yooboken baaxol taynabe massoynah, hinnay kaadu buxah-maral yaceenim, bice wayteeh, hinnay kaadu, geeri bica-le migdal yaynaboonu duude weenik, geeri baaxol tan buxaaxil yaceenim badiilih tambulleem xiqqimtam diggoysele.
- (c) Geeri baaxooxal yan buxaaxih-maral, manub yeceen urri, le baaxoh addal yeceen urri, geyyi haa dacayrii kee, lallabo geyaanam diggoysele.
- (d) Geeri baaxooxal yan buxaaxih maral, manubuh yaceen urrih gexsitol, ceele wayta lakqo antacawwe waytâ gid, faxximta maaqatta beele.
- (e) Bice elle aninnaanah innal, nammay akkek, wohuk biso takke baaxooxâ luk bicak, ta maasayyah qalaama, gexsise le. Urru, geeri baaxooxal yan marih gubat yaynabeenimih abto, caagid wagita abbatino-leelah, hinnay kaadu, xagoorah gabat yekkem diggoysele.

## **22<sup>hayto</sup> Maasayya**

1. A sittin-geyit tan baaxooxa, bica-le maaqattooti inkih beele, urruy, baadinan akkiyy, agat madqaa kee gexsayak amakkaquk, dabboh gacam gorrisek, hinnay kaadu, geenih akke yakkeenî may, dibuk yanoonu, le xaltani luk yanoonu, hinnay kaadu, ken amo-wagitâ luk yanoonu, celta dacayrii kee sahdaytinan cato geelon. Toh , ta sittin-gey edde yaaba, ruffa edde yan garwaa kee, baadinan garwa, hinnay kaadu, sahdaytinan aalootay galab kak xaggiime baaxooxa axawah edde tani.
2. Ta madmah sabatah, a sittin-geyit tan baaxooxa, teetit bica elle le gurrall cate le, Galli-Maroo kee doolattite fanat tan xisoosaa kee, doolât xagar aallewayta xisoosay Galli-Marot axawah tanih iyya. Ken elle cattam baye urruh

xaltani gorrisaanamaay, geenik lakal, ken yasgooroweenimi. Xaltanii kee ramadak, num geytimte waa kaa tekkek, urri , elle-sugah takku, hinnay inkittoh takku, (faxe sababah) , le buxah marak baxsime urri eelli haa dacayriy, a sittin-geyil taessessimeh iyya geele.

## **23<sup>hayto</sup> Maasayya**

1. A sittin-geyit tan baaxooxa, misinkicak takku, xagarak takku, erginná-le urri, nagay yan urri eelli haa, kiboo kee rufto le manoy, konnaba diggossaah, isil-rekitto bisoh haytaa kee, urruh gaantah addal, abit –le gabah-assagolla bicissa, aaxige le.
2. A sittin-geyiti tan baaxooxa , erginná-le urruh baxsa-le lallabo abeleeh, aaxigele. Cato akah faxximta urruu kee, ken amo wagita mari---xaltaniiy, madqal taynabo edde anuk, edde yanin caalat wagitak, ken cataanam aytikumuseleeh, cateenik/waytam diggoysele.
3. Erginná le urri baxsa- le fayxiixa lem aaxaguk, a maasayyak 2<sup>haytó</sup> lanil galab kak xaggiime cato, cindah kah geyan in nah, ken xaltanii kee, ken amo wagita mari, maali duddok lenna cisbatat haak. Urri duddo dadlisak, ayyuntat angaluk kah gexan innah aboonuuy, qaadaa kee roocim keenih dadlisonuh, barittooy, aydakaakanaay, qaafiyat kee aqusbusiyyi ayfaafayitteey, taamâ bicaa kee wallitiyyi ayfaafayitte geyaanam diggoysele.
4. A sittin-geyi tan baaxooxa, erginná-le urru wagsiisak, dayli migdal, biyookat elle kalalitan innaay, misinkicaay xagar daylá elle aban innak, baadinán caddol sitta tabsan abak-raag aytikumusele. Tohut , a sittin-geyit tan baaxooxa, leh tan duddoo kee, mehrat aysiisuk, abak raag aymagguk, baritto kee mehrát aydakaakanih ayfaafayitte, wagitak yan xaagu, baxcisaanam kee, geyaanam diggoysele. A migdal, dadalat geytimta baaxooxah fayxiixa, cisbatat haanam faxximta.

## **24<sup>hayto</sup> Maasayya**

1. A sittin-geyit tan baaxooxa, urri, qaafiyatak inkih giffita dagâ caddo yaalleenimih, gar le. Biyak ken yibbixek kaadu, daylak yayse daylaay, qaafiyát angadad geyaanamih gar le.  
A sittin-geyit tan baaxooxa, urri, ta qaafiyat lallaboh ayfaafayittet culmâ-gey geyâ gideh macalele. Too gar faxe urruk bukkusaanam ma bicta.
2. A sittin-geyit tan baaxooxa, a garih abnisso kataateleeh, axcaxcih bica –le maaqattooti beele:
  - (a) Alaaqaa kee urrí raba daggossuh
  - (b) Rakiibô qaafiyatih lallaboh dadalah, naharsiino acayuk, urruh inkih faxxiima daylaa kee qaafiyat ayfaafay yontocowwem diggossuh;
  - (c) Deraafih umaane , sahdâ qaafiyatal, kataasam cedak, saytun lee kee qaawê maaqidda xayyoysak; sahlin metteebannut xoqoysimaanam kee, biyak kee celta maaqoh anee waytit koositaanam diggossuh.
  - (d) Inootih, xalay-nahar kee, xalay-wadír qaafiyat dacrissuh
  - (e) Ayyuntak kulli exxah , axcaxcih xaltanii kee , urruh diggossam, fiiruk xaagu teetik geyaanamaay, geerak baritto culmâ-gey yaalleenimi. Sidoc-haak uri qaafiyatih abbax kee maaqiddat elle xoqoysiman innih ixxigá yaalleenim; angû canaay, hayjiiniy, deraafi nazaafat kee osod kalali edde anuk, diggossuh.
  - (f) Biyookat kalalitoonuu kee, qaafiyat dacayrih cogdaadi aysaasuk yaysiisoonuh, buxâ marih ekraaroh baritto kee ayfaafayitte dadlissuh.
3. A sittin-geyit tan baaxooxa, maqar-leeh, bica-le maaqattooti beele, umá qaadah abtootay, urrul umam katassa bayissuh.

4. A sittin-geyit tan baaxooxa , baadinan cattii miyya bisoh heeleh aytikumusele, a maasayyal yan gar, caddo caddoh inkih abtol asuh. A migdal, dadalat tan baaxooxah fayxiixa, cisbatat gacele.

## **25<sup>hayto</sup> Maasayya**

A sittin-geyit tan baaxooxa , erginnâ lallaboh, dacayrih, hinnay kaadu daylah, baxsa lekkel, abbatino-le mari hee, awkih/awkah abbax elle yaninnaa kee, woo yimixxe aracal akah gacâ yen caaloota, kulli waqdi, kaah/teetih kusaqsimtam lem taaxigeh.

## **26<sup>hayto</sup> Maasayya**

1. A sittin-geyit tan baaxooxa ummaan urri , ayyuntinan caabi edde anuk, ayyuntiinô saayat xoqoysimaamih gar lem taaxigeh. Ta gar abtol asuh , faxximta maaqattooti isinni agatih madqak amakkaquk beele.
2. Too xoqoysitte akah amcawweh meqem , urruu kee ken qaaqá gabat le mara , usun edde yanin caalat kee, maalu cisbatat haak. Tohuuy urru akkiy, urru awakkaluk xayyoowe mara akki takke.

## **27<sup>hayto</sup> Maasayya**

1. A sittin-geyit tan baaxooxa, kulli awki, manoh caddooy, xagaraay, misinkicaay, roociiy, moraal kee ayyuntinan dadal kaak leh tanim, yaallem faxximtaamih gar lem, taaxigeh.
2. Xaltani, hinnay kaadu geeri maray urruk qaaqá gabat le, naharsi qaaqá keenik, isinni duddoo kee maalut , urruk manub elle yayse caalatat ken haanama.
3. Xaltanii kee urruk qaaqá gabat le mari, a gar abtol asisoonuh, a sittin-geyit tan baaxooxa, isinni baaxooxah caalootaa kee, ken duddi yakkeh gidel, ken cattuh bica-le

maaqaattooti beele. Axcaxcih, maaqididaay, sartan kee iraawok ceyitan waqdi, cato keenih abele. Taddiiraari massoysele.

4. Xaleenaa kee urru taynabó, baaxoh addal tanu, hinnay kaadu irol tanu, urruh ruuban masruf urru aleeluh, sittin-geyit tan baaxooxa, bica-le maaqaattooti beele. Baxsá-luk urruh masruf rubta gaba, usun elle yanin baaxok irol tenek, adoytiitih tan baaxooxa , woo abto yayfoofe, baadinan sittin-geyitte abaanam, aytikumusele. Geeri, bica-le bicitte, bicam-bicsele.

## **28<sup>hayto</sup> Maasayya**

1. A sittin-geyit tan baaxooxa urri baritaaamih gar lem taaxigeh. Ta gar caddok caddol,kulli numuh inkigid yakke saamil, yantacawweh yaanamih radmol xissiiimak, taamal asuh:
  - a. Naharsi caddoh baritto, dirki takkem kee, kulli urruh , cindah gufsaanam abele.
  - b. Amolladi baritto kee, mehrat baritto edde anuk, baxaaxaxsa-le nammeyhaytô caddoh baritto akah tamaggê nah aytikumusele. Barittok tonnah tan qaynoota urru inkih akah guftâ nah abele wohuk fulah yan taqabi edde yan bariteenit, baritto cindah geytaah , lakqo cato geytam kee, tonna tonnah tan maaqaattooti beele.
  - c. Elle bicinnaan innal, kaxxa caddoh baritto,duddo rakiibo abak, kulli num akah guftâ nah abele.
  - d. Baritto kee, meharta xaagittek ascossitte, kulli urruh, akah guftannah abele.
  - e. Barittô buxaaxil geytimiyyaa kee, rada urri dagoowam aytikumussuh, maaqaattooti beele.
2. A sittin-geyit tan baaxooxa, barittô buxah ossobbah dacrissoh, urruk sahdaytinan konnabaa kee , a sittin-geyi

luk gexak elle mirracsimtâ na diggossuh, bica aallinnaan maaqatta beele.

3. A Sittin-geyit tan baaxooxa, barittoh cagiida wagittaamal, baadak iggimaa kee alifbaatissô---sinnâ amotlih baysaanam kee, missoo kee metteebannán ixxiga, kulli mara akah guftannaay, qasri baritto cogdaadi kaadu, kullî ke akah guftannah aboonuh, baadinan cattiiimiyya aytikumusele. A migdal, dadalat tan baaxooxah fayxiixá, baxsa le cisbatat gacele

## **29<sup>hayto</sup> Maasayya**

1. Sittin-geyit tan baaxooxa , sitta elle geytaah, urruî barisso elle afkuneh meqem:
  - a. Urruk numiinooy, duddaay, misinklcaa kee xagar dadalay, ellecabô caddo fan yakke.
  - b. Sahdaytinan garwaa kee, rakiibô curriyyatitth, assakoxxah yakke dadal kee, radmoomay Galli Maroh Charteril daffeyteh tanih yassakaxxeenimi.
  - c. Assakoxxay urri xaltanih abaanaay, qaadá kinnaaneey, ken af kee nihiritteey, urri elle yan baaxoh agát nihiriyy, usun kak yanin baaxoh nihir kee , cadaaratithey kenimik baxsa leh, aban assakoxxi aracat gacaama.
  - d. Kulli, ummattooti, kedooda, agatittee kee, diini hortitteey, kalah kaadu sugeetik yan mari, hittâ luk elle yaloole, currik yan ayyuntih addal, sitta cedak, wagaril, hitta xiqak, nadoh inkigid-akkiyyal aamanuk,kataysiini roocil gexsitta manoh, urru massoysaanama.
  - e. Ginô deraafi yassakaxxeenimih afkun dadlisaanama.
2. A maasayyak 1haytô lanil daffeyteh tan radmoomaa kee, caagid wagita baaxo, barisso elle abtuh, kulli waqdi tayyaaqeh tan caddooda, elle taninnal elle anuk; a maasayyak, hinnay kaadu, 28<sup>haytok</sup> faxe lanil numitin-



amol, hinnay kaadu, baxaabaxsa-le xagooral, hinnay barittô xisoosa soolissuh kee, miraacissuh leh tan garat, fanak–raddoh culaanam, xiqsissah yaanamal yabbixeenim, ma faxximta.

### **30<sup>hayto</sup> Maasayya**

Mangabah shaqbii kee kedooda, diini hortittee afti hortitte, hinnay kaadu sugeetih yan mari elle yan baaxooxal, woo marak marak teynah yaabuke awka/tooboke awká, isinni marâ luk le qaadá, le diiniy, le siirat yassakaxxem, hinnay kaadu, le afat xoqoysimaah/xoqoysimtaamih gar, ma bukkusimaay/ma bukkusimta.

### **31<sup>hayto</sup> Maasayya**

1. A sittin-geyit tan baaxooxa, urri, ramaqqaa kee sabhalaalah; ken qumri elle gexsita digir kee, sabhalál angoyyat yangaleenim kee, qaadaa kee fannit, currik gaba yassagalleemih gar lem, taaxigeh.
2. A sittin-geyit tan baaxooxa, urri, qaadaa kee fanni migdal, gaba yassagalleemih garay leh iyya, keenih yassakaxxeeniih qikaanaah, fannii kee, sabhalál taddiiraarit inkih gaba yassagalleenimih saami , inkigid keenih akkuk, keenih elle bicâ na aytikumusele.

### **32<sup>hayto</sup> Maasayya**

1. A sittin-geyit tan baaxooxa, urri,maddúr xukkok,osod keenil gufaamak, baritto keenik soolisaanamak, hinnay kaadu, qaafiyatat, xagarat, misinkicat, roocit, ayyuntinan dadalat, keenik booddaamak, dacayri geyaamih gar lem, taaixgeh.

2. A sittin-geyi tan baaxooxa, bica-leh tan madqinan, xiinisso, ayyuntinan kee, barissô maaqattooti beele,a sittin-geyih abnisso, aracat haytâ gideh.

Tohim madmaa kee, baadinán sanadittel daffeyteh tan, bica-le madqooqi cisbatat haak, sittin-geyit tan baaxooxa, axcaxcih;

- (a) Taamat gacoonu rammaya qumrii kee fayyaya qumri argiqe le.
- (b) Taamah bica-le saaqootaa kee, caaloota argiqele
- (c) A maasayya elle faxximtâ nal abtol asisuh, faxximta digaalaa kee celta geeri maaqattooti beele.

### **33<sup>haytô</sup> Maasayya**

A sittin-geyit tan baaxooxa,bica le maaqattooti inkih beele---- madqiaanaay, xiinissooy, ayyuntinan kee barissô maaqattooti edde anuk. Urru, kalaata yekke coox kee, kas mudák cattuh, baadinan sittin-geyittel akah tecessimeh taninnah. Kalah kaadu, woo kalaata yekkeh yan kasmudá cooxut kabxá abaanaah, baxcisaanamak ken waassuh.

### **34<sup>haytô</sup> Maasayya**

A sittin-geyit tan baaxooxa, urrut , faxe qaynatih fidoh angaarawih dirki, abe kaltu-waytam, isil teexegah tan,

Tahim abtot asissuh, sittin-geyit tan baaxooxa, bica-eelli hayta agataay,nammaafaa kee, mangaafâ maaqattooti, inkih beele, a ciggiltam waassuh:

- a) Urru, gita malih tan fidoh angaarawittet gutuqaanam kee dirkisaanamak
- b) Urru, fidoh angaarawih dirkissoh gututtuqaanam kee, kalah tan uman-kabanittet asisaanamak.

- c) Urru, qasnán takkookaa kee tumammit dirkisaanamak

### **35<sup>haytô</sup> Maasayya**

A sittin-geyit tan baaxooxa, bica-eelli hayta agataay, nammaafaa kee mangaafal xissiima sittin-gey abak, maaqattooti inkih beele, urru, faxe madmahaay, faxe gurrat, kudsanam, yaylammeenim kee, kabxá keenit abaananam, waassuh.

### **36<sup>haytô</sup> Maasayya**

A sittin-geyit tan baaxooxa, urru, kulli qaynatih xukkoy, ken nagaytaniino ullullussak dacrisele.

### **37<sup>haytô</sup> Maasayya**

A sittin-geyit tan baaxooxa, a ciggiltam massakaxxa geytam, digoysele.

- a) Urri biyaakissaah, aliino leeh, sahdaytinanak iroh taniih, tet tasqunxee digaalah ma diggalsima. 18 liggidak addah yan urri, baahe baatilih, raba akkek , amo-sinni casbih digaagala, keenit ma takka.
- b) Faxe urruk annaak, madqá maliinoh, le curriyyat ma bukkusima. Urri elle yantibixximem, kobor gubat gacam, hinnay kaadu, yamcibbisem madqak amakkaquk ikkal, annaak hinna. Casbi,urruk, ellecaboh edde yamaateenim ikkal, naharat haanam hinna. Yekkek kaadu, nabam dago waktih yakkem le.
- c) Le curriyyat akak bukkusen urri, sahdaytinán konnabal yabbixeenim le. Ken elle yabbixen gurri kaadu, ken qumrit yan urri, le fayxiixa cisbatat haa gurra yakkem faxximta. Keenih taysem tekkeh akke waytek, curriyyat akak bukkusime urru, kaxxam marâ luk haanam ma faxximta. Baxsá-le caalat,

maacisa kaa akke waytek, urri farmoo kee angaarawal inkih le  
buxah marâ luk garayamih gar keenih dacrisaanam le.

- d) Curriyyat akak bukkusime urruk, faxe awki, fitcii kee, faxe qaynatih cato sissikuk geyam le. Ah-macah-yot-tekkeh essero qadaalat cacal, hinnay kaadu, abbatino-le, malakmisah yan numul xayyoysitaah, kaak sissik margaqá geyaamih, gar le.

### **38<sup>haytô</sup> Maasayya**

1. A sittin-geyit tan baaxooxa, carbi wakti, urruh dacriseh meqe sahdayiinok baadinan garway, keenil ma-kortaatih tani yassakaxxeenim kee, tessekexximem diggoysele.
2. A sittin-geyi tan baaxooxa, 15 karmak qumri addah kak yan urri, duudimmitam, carbit akah cule waan innah abele.
3. A sittin-geyit tan baaxooxa, 15 karmak adda yan mara, macxi qandeh ma taktuba, 15 – 18 fanal yan marah tu gactekiiy, karma fayyal akak xayi mara, naharal yaktuben.
4. A sittin-geyit tan baaxooxa, sahdaytinan abbaxak baadinan madqah ma-kortaatik amakkaquk, gabqasá nagaytaniinoo kee, carbi taqabi, elle gufa urrih dacayrii kee, cubbi yakkem diggossuh, beyoonu duudan maaqattooti inkih beele.

### **39<sup>haytô</sup> Maasayya**

A Sittin-geyit tan baaxooxa, lallabô waytik, xukkok, umá abbaxak, qansarissok, hinnay kaadu, faxe qaynatih aliinooy, sahdayiinok iroh anek, kaa tasqunxuse digaala akkek; carbit biyaakite awki, xagaral takkuu; misinkical takku kaa gufeh yan biyaakak yangadgadu kee, ayyuntat yangaluh bica-le maaqattooti beele. Tonnah yan angadgad kee ayyuntah gacsiyyi, elle yakkem, awkí qaafiyatah bica-leeh, konnabâ cuso elle geyu duuda deraafi, takkem faxximta.

## **40<sup>haytô</sup> Maasayya**

1. A sittin-geyit tan baaxooxa , baatil digalah madqat yeeqeteh, yeeqeteh weeqá kaak xayyowteh tan, hinnay kaadu, yeeqetem kak tamixxige num (awki/awká) isih xagarih konnabaa kee, mellebih geeyi haam/haytam, geeri marih sahdaytinán garwaa kee, rakiibô curriyyatitteh konnaba diggoysam kaal/teetil tan. Ayyuntat angaluk gaantah addal kay qumrî luk gexa meqe doori digirá gideh, cato kaah abaanam faxximtam, cisbatat haa abbaax, geyaamih gar lem, taaxigeh.
2. Ta qalaama aracet haytuh, sittin-geyit tan baaxooxa, bica edde le baadinán sanaditte cisbatal haak, ta ciggiltam diggoysele:
  - a. Aben saaku, agat kee baadinán madqal, baatilih orbe waak ten abtoh , urruk weeqá ma xayyowtaay, madqat yeeqeteenim ma deqsitta.
  - b. Baatileyni digalah madqat yeeqeteh axcuk, hinnay kaadu, yeeqeteemih mataakimeh kak yan num (awki/awká) , a ciggilta caabi le.
    - i. Woo baatil madqá kaal soolissi haytam ,usuk barih yanim.
    - ii. Kaal xayyowte weeqá kaa akkiyy, kay xaltanik/taynaboh gitaak akki, geyam faxximta. Kaak xayyoyseenimih kalaluh madqaa kee, geeri catoy wohut culale geyam.
    - iii. Abbatino-le , currik yan mablô xagar, madqal xissiiimak, caagid udurrute kal, gitat kaah yableeniih yargiqeenim. Kay caagidit yaaban waqdi, madqá akkek geeri cato geyam kalah kaadu, kay qumrii kee usuk edde yan caalat cisbatat haah, awakah, xoqoysi mali iyyan ken akke waytek,kay mablol xaaleena,

hinnay kaadu, kaa yaynabe mari kaah  
geytimam;

- iv. Sumáq qangara yaceenim kee, baatil  
baaheemil yaamanuh ma dirkisima, kaal  
sumaaqite maral essero heek, hinnay  
haysiise yakkem duudah. Usuk kah  
seece sumaq, geeri marih sumaaqâ luk,  
inkigid akkuk yantaabbimuu kee,  
esserimu yaaxigem,
  - v. Baatileyni digaalah madqat yeeqeteh  
axcuk, cokmi elle yekke num,  
(awki/awká) woo cokmii kee, kaal  
xissiismak been maaqattootri inkih,  
abbatino-le, currik yan, malakmisah  
yan abba, hinnay kaadu, mablo aba  
xagar, madqá rakiibo abak, kaah akah  
kusaaqisâ nah abam,
  - vi. Edde taamitan af cede weeh,edde  
yaabu aaxige week, afti gacsi num  
cindah geyam,
  - vii. Kay caagid faxe caddol kaah yabloonay  
immay , canká curriyyatih assakoxxa  
geyam,
3. A sittin-geyt tan baaxooxa, baatileyni digaalah madqat  
yeeqeteh kak yen numuuy, yeeqeteemih sabbatah, weeqá  
akak xayyowte num kee, edde yeeqetem timixxigih akak  
tan num; urru wagitta madqooqil, ossobbaabil, taamá  
buxaaxii kee xisoosal , axcaxcih baxsa-luk
- a. Urri baatileyni digaalah madqat yaaqitoonu akak  
dude waan inkih addah yan qumri caagid  
yargiqeenimi,
  - b. Sahdaytinan garwaa kee, madqâ dacayri, bica-  
leeh, faxxiima assakoxxah tessekexximek, urri  
caagiiday tah celta,mablo caxah gexsayak iroh,  
maaqattooti elle beyan siirat fidisaanama.

4. Baxaabaxsa-le lallabooba kee farci, miraacannuu kee lowsis amritte, qakkaloysiyyi ayfaafayitte, gabbatu, aynabiyyi amô-wagitih cubbi, barittoo kee mehrat agdakaakanih taddiiraari, kalah kaadu, xisoosâ lallaboh aracet gacta baxaabaxsa-le badiilte abele. Tohim, urri nagaytaniinoh digga lem takkeemi, usun edde yanin caxxa kee, baatil luk gexsittuh.

#### **41<sup>haytô</sup> Maasayya**

A sittin-geyith addal taniimik hebetô tiyay,urri garwah abnissoh, tayse gital takkeemit boodda, ma tan. Wohim:-

- a) Sittin-geyit tan baaxoh madqal, hinnay, kaadu
- b) Baadinan madqay, woo doolatal taamittal

### **EXXÁ II**

#### **42<sup>haytô</sup> Maasayya**

A sittin-geyit tan baaxooxa, a sittin-geyih radmoomaa kee maasayyooyi, kas-lee kee, urri gari inkih, timmixxig abtam, isil teexegeh tan.

#### **43<sup>haytô</sup> Maasayya**

1. A sittin-geyit tan baaxooxa, a sittin-geyik isil teexegeh tan ma-kortaatik, abnisseh gide tamaxxaguh, urri Garwa wagsiisak komité soolele. Too komité a ciggiltam abele.
2. A komité taban kee bacra mixigik xissimele. Too mari kaxxa migáq-gexxo leeh, a sittin-gey sarisa caagiidal, timixxige ixxiga le mara. Komiteh adoytit a sittin-geyit tan baaxooxah xaylô fanak, le baaxooxa doorta maray, cankah taamita.

Dooro takke wakti , baaxok jograafi xisnee kee timixxigih tan madqâ siiratitte awakkaluk akah dooriman innah , dahni antacawwele.

3. Komiteh adoytit, sittin-geyit tan baaxooxa rubteh tan liisa-leelah fanak,cuumi waraakit qidnel doorime le. Sittin-geyit tan baaxooxak, ummaan tiyá isi marih fanak inki num muggaaqisseh ruubele.
4. Komitek naharsi dooro, a sittin-gey abtol edde ase ayroh lakal, leceeyheele alsak udurrutekal akkele; wohuk wadiril kulli nammayheele liggidal akkele. Daggowwu intek, kulli doorok naharal affaralsal, Gallik-Marok Kaxxa Cuumi Mabbaxi, sittin-geyit tan baaxooxah jawaab aktubele, liisá-leeláh muggaaqissen marih migooqa namma alsih addat ruuba yaanamah. Ciggiilak Kaxxa Cuumi Mabbaxi, alifbatisso yaakumik ciggiilil, massoysele kaa gufteh tan migooqa, ken rubteh tan baaxooxah migooqa edde haak. Tohih lakal, kaxxa Cuumi Mabbaxi, a sittin-geyit tan baaxooxah ruubele.
5. Dooro elle takkem, Galli-Marok Kaxxa Cuumi Mabbaxi aba seecol, sittin-geyit tan baaxooxa, Galli-Maroh salalal abta koboxu. Sittin-geyit tan baaxooxak namma-sidoctá geytimtek daffeynô-kibo takkeh.  
Anay yeece marak mangaba geeh, sittin-geyit tan baaxooxa, awwakaluk yemeete marih anayak, giffo-le mangabak biso gee mari, komiteh adoytit yakke.
6. Komiteh adoytit akah doorimtam affara liggida.Nammayheele dooroh doorimoonu xiqaanah, le baaxooxah afak muggaqsimeenih, yemeeten ken tekkek. Doorimte komiteh adoytiitik kooná numih wakti, nammayheele liggidih ellecabol yamurruqe. Too konooyih migooqa, naharsi dooro gaba elle kaltennal elle, komitê saqal, saami waraakit qidnel meexa.
7. Komiteh adoytiitik numuk teeni rabek, hirgimek, hinnay kaadu, faxe sababah geytime waa kaa tekkek, kaa muggaaqisseh sugte baaxo, kay aftok geeri mixig, rubta,



- raaqe waktik gaba kalâ gideh; wonniiy, komiteh oggolut axawah yan.
8. Komite isi taamah gexsiah siiratah edde – xinta daffeysele.
  9. Komite isi reedon, namma liggidah doorele.
  10. Komitê daffeynaani, xefelih Galli-Maroh salalal akkelê may, wohuk  
kalah, komite bica leh kak itta aracal, gexsittu duddah. Komite liggidal inki adda daffeyta. Daffeynaani sugtah gideey, a sittin-geyit tan baaxooxah koboxul argiqimelê may, Kaxxa Koboxih oggol esserta.
  11. Galli–Marok Kaxxa Cuumi Mabbaxi, a komiteh faxxiima sahdayi  
caylaa kee, bicitte , a sittin-geyih abnisso, maqâr lennal orobtâ gideh, bicisele.
  12. Kaxxak Koboxih faatacissoo kee, isi elle teseessêna rakiibo abak,  
komiteh adoytit tecee ayfaafayih meklá, Galli-Marok, hirgittu dudda.

#### **44<sup>haytô</sup> Maasayya**

1. A sittin-geyi tan baaxooxa, isil taaxigem, Galli-Marok Kaxxa Cuumi Mabbaxih gitaak, komiteh gabbaaqitte, rubtaama. Too gabbaaqittel tascassem, ta sittin-geyih abnissoh beyteh tan maaqattootii kee, bisô-maxcoy sinam woo garwah abnissoh geyteh tani waktikiy.
  - a. Woo baaxo, a sittin-gey abtol asisseemik, namma liggidih addat
  - b. Wohuk wadiril ummaan kooná liggidal
2. A maasayyal kelitak ruuban gabbaaqitte, abnissoh gareeh yan gibdaabina ascassele (yenek). Gabbaaqitte wohuk kalah komiteh faxximmi iyya xaaguy, woo baaxol a sittin-geyih caagiida guftekke kee , elle gexsittâ na ascassele.

3. A sittin-geyit tan baaxo, kulliimi addat le gabbaaqy, naharak komiteh rubteh iyyal hayte xaagu, sarrak maasayyak 1<sup>haytô</sup> lanik(b) rubtah taniimil ma qagissa.
4. Komité, sittin-geyit tan baaxooxak, a sittin-geyih abnissok, faxxiima raaqe xaagi yenek, ruuba axcele.
5. Komite abtah tan taamoomih gabbaaqitte, kulli namma liggidal, Maddur kee Ayyuntinan Qakkalaysáh gitaak, Kaxxa Koboxuh ruubele.
6. A sittin-geyit tan baaxooxa, isi gabbaaqitte, sadarah, kulli aracal akah geytimtâ nah abele, le baaxooxah addal.

### **45<sup>haytô</sup> Maasayya**

A sittin-geyih abnissok maqar le macal abtuuy, baadinán cattiiyya aracat haytuh;

- a) Baxsá-le farmooma le Galli-Maroh wakaalatitte-Galli-Marok Urri Maalih Massoynaa kee geeri massoynaani a sittin-geyih maasayyooyih abnissok, cisbatat elle haa rikel, geytime le. Galli-Marok Urri Maalih Massoynaa kee , geeri massoynaaniy, is, bica edde le kak ittah iyyah , mixigwâ qakkaloyle, a sittin-geyih abnissok ken daaratih addal taniimil fayyaceeni gideh. Wohuk kalah kaadu , komité, Galli-Marok Urri Maalih Massoynaa kee, geeri massoynaanih seecele, a sittin-geyik, ken daaratal raddaamih abnissok wagsiisak, gabbaaqitte xayyooya intuh.
- b) Komité, bica lem tekkelek, Galli-Marok baxsá-le wakaalatitte-Galli-Marok Urri Maalih Massoynaa kee , geeri massoynaanih inkih tabsele, gabbaaqitte a sittin-geyit tan baaxooxa rubta. Too gabbaaqittel xoyyowta esseroora kee, metteebanni fayyuu kee catoh fayxiixay, yaybulleenil, isi mablaa kee , ah-yot-ceta (tenek) osissi hayteh tatrusele.
- c) Komité, Kaxxa Koboxuh, woh-akke-meqeh ascossay, Kaxxa Cuumi Mabbaxi, tet aftok, timixxige caagiiday,

urri garwat axawah tanil cubbusoosa gexisam meqe, akak intah iyya tatrusele.

- d) Komité, a sittin-geyik 44 kee 45<sup>heele</sup> maasayyal,yontocowweh yan xaaguk amakkaquk, anni-yeysee kee, woh-akkeh-meqe ascossa abtu duddah. Tonnah tan anni-yaysee kee, woh-akke-meqe, caagid wagitah yan baaxoh tatusimele. Kaxxa Koboxuh kaadu, sittin-geyit tan baaxooxa tescessemedde osisak, ruubele.

### **EXXÁ III**

#### **46<sup>haytô</sup> Maasayya**

A sittin-gey, baaxooxa inkih elle tafarramuh fakimit gacele.

#### **47<sup>haytô</sup> Maasayya**

A sittin-gey faatacissoh xayyoowele. Faatacisso edde aban aaloota Galli-Marok Kaxxa Cuumi Mabbaxih garil daffeele.

#### **48<sup>haytô</sup> Maasayya**

A sittin-gey faxe baaxo kaa oggoltuh inki fakimut anele.Oggol kee ossitiná elle aban sanaditte Galli-Marok Kaxxa Cuumi Mabbaxih garil daffeele.

#### **49<sup>haytô</sup> Maasayya**

1. Sittin-gey faatacissook labaatanna heele aalat, Galli-Marok kaxxa Cuumi Mabbaxih garil edde daffeyte ayrok, soddomeele ayro, a sittin-gey abtol asa.
2. Faatacissook, labaatanna heele aalat, aracal gaceek lakal, a sittin-gey oggoltaah, faaticissa baaxo,isi faatacissoh aalat (sanad), daffeysitte ayrok lakal, soddomeele ayro, a sittin-gey abtol asa.

## **50<sup>haytô</sup> Maasayya**

1. A sittin-geyit tan baaxoosak, faxe baaxo, aysiisenta, Galli-Marok Kaxxa Cuumi Mabbaxah xayyossu duddah. Kaxxa Cuumi Mabbaxi, tohim kaa elle guftâ kel, woo aysiisentay xayyoowe, sittin-geyit tan baaxoosah ruuba, a qaadah, kobox faxaanak/waytam ascassuk. Edde oggoleenimit woo deero kaa edde gufta ayrok, daggowwu intek affara alsih addat, baaxoosak inki-sidoctá neh takkay intek, Kaxxa Cuumi Mabbaxi, Galli-Maroh amô-wagitiil gaaboyna gexisa. Aysiisentay, geytimteh, anay tacee sittin-geyit tan baaxoosak, mangaba gee, Kaxxa Koboxih faatacissoh tatura.
2. Aysiisentay, a maasayyah lanik 1<sup>haytoh</sup> gexak daabime, abtol asam, Galli-Marok Kaxxa Kobox kaa faatacisaa, sittin-geyiti tan baaxoosak namma-sidoctah mangaba kaa oggolta waqdi.
3. Aysiisenti abtol asa waqdi, isit yaxeem, kaa oggolte baaxooxa. Geeri baaxoosah tu gactek, usun axawah edde gacaanam ta sittin-gey kee, dumaak oggoleenih aninnaan aysiisentitte.

## **51<sup>haytô</sup> Maasayya**

1. Galli-Marok Kaxxa Cuumi Mabbaxi hirigeleeh, kulli baaxoh, bagwáy-tibbay baaxooxa bette, tatrusele.
2. Bagwáy-tibbay, a sittin-geyih madmaa kee qalaamâ luk, gexsite waytaay, arac ma taalla.
3. Bagwáy-tibba, faxe waqdi, Galli-Marok Kaxxa Cuumi Mabbaxah kutbeh aysaxxaguk hirigoonu duudaanah, usuk kaadu kulli baaxo yaysixxigeh. Too kutbe kaxxa Cuumi Mabbaxa edde gufte ayrok loowimta.

## **52<sup>haytô</sup> Maasayya**

Sittin-geyit tan baaxo, a sittin-gey kutbeh tan aysaxxaagel, Galli-Marok Kaxxa Cuumi Mabbaxa aysaxxaguk giddi yaanam bictah. Woo giddi aracat gacam, usuk kaxxa Cummi Mabbax edde gufe ayrok, inki liggidih laka.

## **53<sup>haytô</sup> Maasayya**

Galli-Marok Kaxxa Cuumi Mabbaxi, a sittin-gey yabbaxih muggaqsimih yan.

## **54<sup>haytô</sup> Maasayya**

A sittin-geyih asliy, Qarabiiy, Ingliiziiy, Fransaawii kee Chaayinaay, Ruusiyaa kee Asbaaniyah affitet gacteh tani, asli kak leh tan nahir luk, Galli-Marok Kaxxa Cuumi Mabbaxih garil daffeele.

Tohul sumaaqitak, ahak gubal ferma akak tan, le baxooxa kaxxa duddo, akah acayuk rubteh ten mari, a sittin-gey raabiteeh, oggoleh.